

Lucas' pilla

Diosa' mika ura kuinda

Lucas Teófilonu piikendu tsandimi.

1 ¹Kaspele Dios lala' kejtsapala titi deke' puikaamuwañauba juntsa piikenu tyatu, pure' chachilla piikenu deki'keeve. ²Tsejtu kaspele ajke' tsa-i' puinu tinbunun tsaintsu keenamu rukula, matyu yala Dioschitiba kiike' ya' kuinda veelanu wandis nenu tiramulan lalanu tsandi dewainñu, lala tyee demijañauba juntsaa depiikive. ³Tsenñu' mitya, in estennu Teófilo, i bain juntsa ajke' tinbutala naa naa-i' puimuwañauba yumaa kayu ura' demanguere' mijatu, ñunu bain piike' eeñu urave pensanguiyu, ⁴tsenmalaa ñunu naake mijakaamuwa deeñuba uwain tsaañu mijamiya kayu ura' aseetanguenutsu.

Juan Mungaamu nakayanan juñu mijakara

⁵Herodes, Judea tusha uñi chunu uwanu ma judío ruku chumuwaami, ya' momu Zacarías. Juntsa ruku chachilla' mitya Diosnu kalen jimu juwaami, matyu Abías' chachillaba buuna' yaiba chachilla' mitya Diosnu kalen jimu juwaatu. Zacarías' shinbuya Isabel momuwaami, Aarónnu sera' jimu bulu na'ma. ⁶Yalaa Diosa' ajuusha ya naakesa tyañauba tsanguen chumu chachi jula, tsenmin Bale Ruku naa naakidei tiñuba tsa tsangue meenguen chumu jula. ⁷Tsaaren yala na miyajtula, Isabel nakatyu shinbu juñu' mitya, tsenmin yala yumaa derukuula.

⁸Ma malu Zacaríasba bulu taawasha ke' chachilla' mitya Diosnu kalen jimulachee Diosa' ajuusha manbunu malu tiyaña, ⁹chachilla' mitya Diosnu kalen jimutatala tsanguemu de' mitya, munaa tyulla luñuba juntsaa Diosa' pupunanu yasha vi' aindyunguikaantsumi ju'kenuu juñu mijanu deke' keeñu, Zacaríasya tsanguenuu faami. ¹⁰Tsenñu Zacarías, ju'ke' aindyunguikaantsumi ikakaantsuñu, kumuinchí chachilla avindala wa'namulaya Diosba kuinda kentsula. ¹¹Tsanaren Zacaríasnu Bale Rukuchi ma anjee aindyunguikaantsumi ju'kenu keesha urandya kelusha

uina' katawañu, ¹²kata' wapantu jelanchin naaken tsandyami. ¹³Tsenñu juntsa anjee Zacaríasnu tsandimi: Jeetyatyude, ñu Diosnu tyee kisa ty'a pañuba meeve. Tsa' mitya ñu' shinbu Isabel na main kanu tsuve; tsenmala juntsanu Juan momu pude. ¹⁴Tsainmala ñu pure' sundyainu tsuve, naa vee chachilla bain ñu' na nakayañu' mityaren mikä sundyanu detsuve. ¹⁵Yaa Bale Ruku' ajuusha tsamantsa aawa juu katawanu tsuve. Ishkala kushtyu junu tsuve, tsenmin kayu nakayai'mujchin Espíritu Santo' mityaa tiba kiihemu tiraajunu tsuve. ¹⁶Tsejtu pure' Israel chachillanu veta' pensa demangare', yala' Bale Ruku Diosnu mangueenguikaanu tirenu tsuve. ¹⁷Juanya Diosa' mitya pamu Elías naajuwañuba juntsaa ju', yaa naaju pudeñuba tsangue', apalanu ya' nalaba estyanu mandire', naa masmi' firu' kiihen chumu chachillanu bain aseetanguikare', Dios naakesa tyaañuba tsanguen chunu demandirekaanu tsuve, tsejtaa Bale Ruku janmala chachilla ura' mikakenuu tirekaantsunu tsuve, timi.

¹⁸Tsenñu Zacarías anjeeenu pake'meetu: ¿Naa itaa uwain tsainuuñu bain iya mijanu juwa? Naa i bain, in shinbu bain yumaa pure' ruku deeyu, timi.

¹⁹Tsenñu anjee pakatu tsandimi: Iya Gabrielyu; iyaa Diosa' ajuusha pu' ya' uuden meenguemu juyu. Diosya inu ñuba kuinda kisa ti', entsa yachi mikä ura kuinda ñunu mijakaanu eeve. ²⁰Tsaaren iya ñunu naatiñuba tsainu tsuve tyatyu' mitya, ñu challa papatyui shuwanu tsuve, tsejtu iya ñunu naatiñuba juntsaa de-i' pullaindyuya tsaa tsananu tsuve, timi.

²¹Tsenñu Zacarías anjeeba tsandi' kuinda kendaa piyaintsuñun, avindala yanu keenamu chachillaya nejtun chaiba Diosa' pupunanu yasha mafalendyumi tin keenala.

²²Tsandindetsun Zacarías mafaatu, patyu ju' señaschi tene juu mafaañu, Diosa' pupunanu yasha tyeeba Dios keewaañu kata' wapantuumete tya' aseetanguila. Tsa' mitya papatyu juu tiya', tsaa señaschi tene juu tiyaimi.

²³Tsejtu Zacarías yachiya aa eleshasha taawasha kenu malu de-iñu, yasha miimi.

²⁴Bene ya' shinbu Isabel navimi. Tsai' navitu man chu'chaya avindala falendyumuñchi ya' yashan tsanami, ya' pensashaya: ²⁵"Uwain Bale Rukuren inu tsaisa tya' tsanguinuve, tsenmalaa veela inu nakatyu shinbuve ti' vera' tya' keemuwa deju' bain tsa mangui'nudetsu", tya', pensanguike' mitya.

Jesús nakayanu juñuba ma anjee wainmi.

²⁶⁻²⁷Isabel naviñu mandishmain chu'chaya puiñu, Dios, anjee Gabrielnu Galilea tusha Nazaret pebulubi, ma panna María mumunu: Ji' keede, titu eemi. Tsaaren juntsa panna Josénu kayanu palaa juwaami, rei David' bulu rukunu. ²⁸Tsenñu anjee juntsa panna' chuinbi vijitu tsandimi: ¿Naaju chuyu? Dios ñu' mitya yuj sundyave. Bale Ruku ñuba juve, timi.

²⁹Anjee tsandiñu, María meenbashtu, ¿yanu nenñaa entsandi pañanga? tya' pensanguemi.

³⁰Tsenñun anjee tsandimi: María, jeetyatyude, ñu' myta Dios yuj sundyave.
³¹Ñu navinu tsuve, tsangue' nakatu, Jesús momu punu tsuve. ³²Yaa aa bale ruku junu tsuve. Tsenmala aa kai'sha chumu Diosa! Nave detimala, naa Bale Ruku Dios bain yanu ya' bulu ruku David naaju rei bale chumuwañauba juntsangue bale ruku mannu tsuve, ³³tsenmalaa Israel chachillachi naauwanuba rei juu chunutsu. Yaa naa-uwanuba tsanguen chunu tsuve, timi.

³⁴Tsenñu María anjeenu pake'meetu tsandimi: ¿Naa itaa tsainu juwa, iya kayu naaju unbeenuba tsa-i' kerajtuba? timi.

³⁵Tsandiñu anjee pakatu tsandimi: Espíritu Santo ñunu pajanu tsuve. Aa kai'sha chumu Diosa' pudeechi ñunu viyakaanu tsuve. Tsa' myta entsa kaana kayamu Dioschin juunu tsuve. Diosa' Nave tinu detsuve. ³⁶Naa ñu' bulu shinbu Isabel bain, yaa deshinbu ju', nakan jutyuu shinbuve detiñu bain, naviñu yumaa mandishmain chu'chaya juve. ³⁷Matyu Dioschiya naa ti bain in jutyuuya dejutyuve, timi anjee.

³⁸Tsenñu María tsandimi: Iya Bale Rukuchi taawasha kemu chachi juñu' myta, ñu inu naati pañu bain, Bale Ruku inu juntsanguisa, timi.

María tsandiñu, anjee miimi.

Isabel' junga María ji' keemi.

³⁹Tsenñu juntsa malutala María Judea tusha kuyinbenainsha chumu pebulusha, jei ji' tyuinajitu, ⁴⁰Zacarías' yasha vitu Isabelnu, ¿Naanayu, ura chuyu? timi. ⁴¹Tsenñu María juntsandi pañu, Isabel meenmalaren, ya' kaana ya' ama' ajkasha tsaa julluke tse'kemi. Tsenñu Espíritu Santo Isabelnu pakaañu, ⁴²Maríanu daran palaachi patu tsandimi: Diosya ñunaa kayu vee shinbulanuba pullake ura' ikare' sundyawaave, tsenmin naa ñu' nanu bain tsaren ura' ikaave. ⁴³¿Tsejtu iya maa juñaa, ñuya, in Bale Ruku' ama jumun, inu ja' keejatu iyu? ⁴⁴Matyu iya nei'ba ñu' palaa meekenmalan, in na, na'masha pumun sundyatu julluke tse'kive. ⁴⁵Ñuya Bale Ruku ñunu naakenu tsuyu tiñu bain uwain tsainu tsuve tyañu' myta, ñunu mika ura' ikaave, timi Isabel.

María Diosnu yuj urave timi.

⁴⁶Tsenñu María tsandimi:

In tenbukasha Bale Rukunu tsamantsaave ti' yuj urave tintsuyu.

⁴⁷Tsenmala Diosya inu livee kemuñu' myta,
in tenbukasha ya' myta yuj sundenve,

⁴⁸naa iyaa yachi taawasha kemu shinbu juñuba,
yaa in myta mijapetse kive.

Tsenñu' myta umaa inu naajulaba entsa ajkeshaya
Dioschi mika ura' imu tiitinu detsuve,

⁴⁹matyu tsamantsa pude ruku Diosren in myta tsamantsa uukeraa
keñu' myta tsa tsandinu dejuve.

Mu bain yaba pareju dejutyuve.

⁵⁰Diosya naajulaa yanu balenguumu deeñuba

juntsalanuya naa-uwanu' mityaba tenbityamu juve.

⁵¹ Yaa dajtyamu rukula naaken chunu ty'a pensanguen chumuwa deeñuba,
yaa tsanguenuu jutu, tsanguen jutyungue tireve,

⁵² tsenmin naa tsamantsaayu tyan chumu reilanu bain millangare',
yala' uudenguen chunu chunbullanu mangalare',
dajtyan chutyu chachillanaa junu machujtive.

⁵³ Ti fin tsaa chumu chachillanaa panda yamuj chun jutyungue mandiretu,
umaa tarukulanaa ti fin tsaa chunu mandireve.

⁵⁴ Kaspele lala' aa-apa Abrahamnu bain,
naa yanu sera' jimu chachillanu bain

⁵⁵ naa-uwanuba tsanguenbera kentsuyu timuwa' mityaa,
yachi taawasha kemu Israel chachillanu yala' mitya juntsanguetu,
tenbitya' keewaave Dios, timi.

⁵⁶ Tsejtu María pen chu'chayatalaa Isabel' junga chutu, bene ya' yasha
miimi.

Juan Mungaamu nakayami.

⁵⁷ Isabelchi nakanu malu chayañu unbeena kami. ⁵⁸ Tsai' Isabel nakañu
demijatu, ya' ya keetaa chumula bain, naa ya' bulula bain, Isabelnu
dekeejii' sundyave'la, yanu Bale Ruku tenbitya' ura' keñu' mitya.

⁵⁹ Tsejtu yumaa mandishpen malu iñu juntsa kaananu Dioschi señas
kekaanu, chachilla' mitya Diosnu kalen jimula' junga tajila, tsejtu veelaya
ya' apa' momu Zacarías manbunu tyala. ⁶⁰ Tsenñun ya' ama tsandimi: Tsa
jutyuve. Ya' mumuya Juan junu tsuve, timi.

⁶¹ Tsenñu veela Isabelnu tsandila: Nu' bululaya muba juntsaa momu
dejutyuve, tila.

⁶² Tsanditu ya' apanu bain señaschi pake'meela naaju mumaa punu
tyañu bain mijanu. ⁶³ Tsenñu ya' apa ta'pa main kuka ti' señas keñu deka'
kuñu, juntsa ta'panu piiketu: "Ya' momu Juanve", piikemi. Tsangueñu,
chachilla keenbashii shuwala. ⁶⁴⁻⁶⁵ Tsenñu juntsa uwanun Zacarías
papatyu chuturen, pamu mandiya', Diosnu yuj urave ti' pantsuñu,
kumuinchi junu ji' pumulaya tsamantsa keenbashintsula. Tsejtu
kumuinchi junga kuyinbenanu Judea tusha tyee i' puiñuba kuinda kiikila.
⁶⁶ Tsenñu kumuinchi Judea tusha chumu chachilla demijatu entsangue
pensanguila: "¿Entsa kaana naa junuuñaa tsaiñu detin?" tyatyaila, matyu
Bale Rukaa juntsa kaananu ura' ikare' jijiintsuñu' mitya.

Zacarías Diosnu aawa kuremi.

⁶⁷ Juanchi ya' apa Zacarías, yanu Espíritu Santo tsandikaañu, Diosnu
yuj urave ti' pandu tsandimi:

⁶⁸ Bale Rukunu, matyu Israel chachilla' Diosnu mika urave tisai,
yaa ya' chachillanu la'ka' livee kenu jañu' mitya.

- 69 Lalanu livee kenu main tsamantsa pude rukunu eeve,
yachi taawasha kemu ruku Davidnu sera' jamunu.
- 70 Yaa yumaa tinbunuren yachin juu ya' mitya pamu rukulanu tsandikaatu,
tsanguenbera kenu ti' entsaaya pamuwaave:
- 71 Lala' kundaala' tyaapasha, tsandityu'ba,
lalanu tyutymula' tyaapasha firu' ikaaken chukaan jutyu' livee
kenu tsuyu,
- 72 lala' tinbu aa-apalanu bain tenbityamu ju!,
yaren tsandi' veta' veta' tsanguedaa tiñu juntsa bain pashin jutyuyu
timuwa' mitya.
- 73 Lala' tinbu aa-apa Abrahamnu, Dios uwain tsanguenbera kenu tsuyu
titu entsandimuwaami:
- 74 Iya ñnulla' kundaala' tyaapanu livee kenu tsuyu,
tsenmalaa ñnulla' kundaalanu jelajtu dechu',
inchi taawasha ken chunudetsu.
- 75 Tsenmin ñnulla ura' kemu chachi deju',
meengue' naa-awanuba ñnulla' chungamaya inchin juu chunudetsu,
timuwaami Dios.
- 76 Tsenmala ñunu laapu' panmalaya, ñu in naya,
aa kai'sha chumu Diosa' mitya pamu ruku mumu junu tsuve,
matyu ñaa Bale Ruku' ajkesha puu ajke' ji',
ya' chachillanu ura' pensa demanguikare',
- 77 naa yala' ujcha' mitya bain
demanbitsale' livee kenu juñuba wandis nenuu juve,
- 78 matyu lala' Diosya tsamantsa tenbityamu' mityaa,
naa lala dishkejtsa chun tsa denañuba,
yaa aa kai'sha pu' ja' kepenene pajta danjurukeñunguemu juve,
- 79 tsejtaa aa dishkejtsa chun tsa denañuba dangaanu,
tsenmin lalanu tiba bulla jetyu ura' chukare' jikaanu, timi Zacarías.
- 80 Tsenñu juntsa kaana awa' jintsumi, tsejtu tiba Dioschi kiikenatalaya
kayu aseetaju tiya' ne jiintsumi. Tsaaren tiba den chutyunu tenashaa chumu
jumi, ya tyee kiikenu ju'ba Israel chachillachi kayu tsai katawai'mujchiya.

Jesucristo' nakayanu malu
(Mateo 1.18-25)

2 ¹Juntsa malutala César Augusto, romanola' kayu aa uñi, ya' washken
chunu tusha nan dechuñuba mijanu tyatu, kumuinchi chachilla yala'
mumu kiikanu depillasa tya' uudenguemi. ²Entsangue' ajke' bijee momu
depiike' kalaya, Quirinio, Siria tusha uñi chunu uwanaa tsanguila. ³Tsenñu
kayu aa uñi tsaa uudenguñi' mitya, kumuinchi chachilla main main nuka
nuka chumuwa deju'ba yala' pebulusha demiji' momu piikekutinu jula.

⁴Tsenňu, José Galilea tusha Nazaret pebulubi chutun, Judea tusha Belén pebulubi miimi, junaa rei David milla nakayamuwaña. Tsejtu José junbi ya' mumu piikekutinu miimi, yaa Davidnu sera' jimu rukuwa' mitya. ⁵Tsejtu juntsa pebulusha miimi yaba chunu jumu María pannaba, tsaren yaa yumaa napuumi. ⁶Tsejtu Belénnu puren Maríachi nakanu malu chayaña, ⁷junu ya' kasna kami. Tsejtu jalichi pinguike!, animaa panda fifikenu kajunnu pu' tsuula, matyu naaju yashaba chachi tyuwa denaňu nuka tsun tsa de' mitya.

Anjeela uveja washkemulanu katawala.

⁸Belén pebulu keesha mantsala uveja washkemula kepemee panbasha yala' uveja keekeenala. ⁹Tsadenan uveja washkemulanu Bale Rukuchi ma anjee katawami. Tsenňu yala' keetala Bale Rukuchi tsamantsaa keewara jumu pi'juru keňu mika wapanla. ¹⁰Tsenňu anjee tsandimi: Jeetyatyudei. Kumuinchi chachillanu sundyawaakenuu jumu, uraa kuinda kenu jayu. ¹¹Uma, David' chunu pebulunu na main kayave ñullanu livee kemu. Juntsa livee kemu Dioschi Mi'ke! Kayamu Bale Rukuve. ¹²Juntsa kaananu depingue' tsuuňu animaa panda fifikenu kajunnu tsuranave. Tsa' mitya ñulla juntsana dekatajishu juntsaa, naa juntsaňuba mijanu detsuve, timi anjee.

¹³Tsenmala juntsa uranuren juntsa anjee keetala kayu vee anjeela bain selusha pajatu pure' katawaila. Tsejtu Diosnu yuj urave ti' papatitu, ¹⁴tsandila: Aa kai'sha chumu Diosnu yuj urave detisa tenve, tsenmala naa tusha chumu chachilla bain yachi tenbikeramulaya tiba bulla jutyu dechusa tenve, tiitila anjeela.

¹⁵Tsai' anjeela selusha demaluňu, uveja washkemula veta' veta' kuinda ketu tsandila: Tsaashu juntsaa, Belén pebulubi ji' keesai, tyee iñaa lalanu Bale Ruku mijakaanu eetaa tsandiňuba mijanu, tila.

¹⁶Tsejtu Belén pebulusha jei dejitu, Maríana bain, Josénu bain katala, tsenmin juntsa kaananu bain kajunnu piyaa tsuna katajila. ¹⁷Tsana dekatajitu, anjeela yalanu juntsa kaananu laapu' patu, naadetiňu bain tsandi kuinda kila. ¹⁸Tsenňu kumuinchi chachilla meenamulaya yuj meenbashintsula. ¹⁹Tsenmala Maríaa entsa detiňu kuinda ya' pensasha tana' naa-awanuba tengaya chumi. ²⁰Tsejtu uveja washkemu rukula anjeela dekatawatu, naadetiňu meena' Belénsha ji' bain tsana dekata', yala' uveja washkensha miindu, Diosnu yuj urave tisai miila.

Jesúsnu kayiimala Diosnu keewaajila.

²¹Tsenňu juntsa kaana kayaňu, mandishpen malu iñu, Dioschi señas kekare' mumu putu, Jesús tila, kaspele María naa naba putyunuren anjee yanu katawatu entsandimuwaña: Nakatu, Jesús mumu pude, ti' kuinda kemuwaaňu' mitya.

²²Moisés' wandya leiya, nakamulaya tsantsa malu iinmalaren Diosa' ajuusha ura' mangurana juve timuwaña' mitya, juntsai keeditu, José

bain, María bain Jesúsnu Jerusalén aa eleshasha tajila Bale Ruku Diosa' ajuusha keewaanu. ²³Matyu Bale Ruku' leichiya, *Kumuinchi kasna kayamulaya Bale Rukuchin juunu juve*,^a ti' pillañu' mitya, yala tsanguila. ²⁴Tsejtu Bale Ruku' leiya: *Naa pai wa'pupu kunaa ju' bain, naa pai paluma nakunguu kunaa ju' bain tsanguenu dejuve*,^b tiñu' mitya, José bain, María bain Diosnu kunutsumi juntsai tajila.

²⁵Juntsa tinbunu Jerusalénbi ma ruku, Simeón momu, chumuwaami. Juntsa tsamantsa aa ura ruku ju', Dios naakesa tyañuba tsanguen chumuwaami. Tsaju' mitya, Israelsha chullanu Dios mandinbu livee kesa pensa chumuwaami. Tsaaren Espíritu Santo Simeónnu chumu' mitya, ²⁶mijakaamuwaami Bale Rukuchi Mi'ke' Kayamunu katai'mujchiya peyan jutyuñuba. ²⁷Tsa' mitya Espíritu Santo Simeónnu aa eleshasha miya' jiñu, juntsa uwanuren Jesúschi ya' apala, Moisés' wandya leichiya, kailla' mitya naa naakenu uuden juñuba tsanguenu Jesúsnu aa eleshasha demiya' jiñu, ²⁸Simeón Jesúsnu ya' tyaapachi angue' tadiru, Diosya mika urave titu tsandimi:

²⁹Bale Ruku, ñu inu, ñu' chachinu,
kaspele naati pamuwaañu bain
yumaa juntsa ura tiyañu' mitya,
ñu umaya inu tiba bulla jutyu peyasa tyañuba urave.

³⁰Chachillanu livee kemunu in kapukachin keemijayu.

³¹Tsenmala kumuinchi chachilla bain livee kenu jamunu katanu detsuve.

³²Juntsa livee kemu ñillu tsaa dangare'
veela Israel chachi jutyulanu aseetanguekaanu tsuve.

Tsenmin ñu' Israel chachillanu bain balengurenu tsuve, timi.

³³Tsejtu Simeón Jesúsnu laapu' patu Diosnu tsandi' pantsuñu, ya' apala meenbashintsula. ³⁴Tsejtu Simeón yalanu: Dioschi ura' de-isa tenve, titu, bene ya' amanu tsandimi: Entsa kaana mantsa Israel chachillanu Diosnu keranguikaatun, mantsa chachillanuya Diosnu ura' keranguityu detirenu tsuve. Tsaju' yanuya mantsa chachilla meranguityu' keeminchaaba tiyanu detsuve, ³⁵tsenmalaa pure' chachilla yala' pensa naa naadejuñuba entsai katawanutsu. Tsaaren kumuinchi entsa ñu' tenbukasha mika llakindyaware' peeniyachi tsutekiñuu jujuunu tsuve, timi.

³⁶Junu ma shinbu, Diosa' mitya pamu Penuel' na'ma pumi, Asernu sera' jimu, ura ya' mumuya Ana. Juntsa shinbu kaa pannaaren unbee kayatun mandishpai añu yaba chunamin, ya' ruku peyañu maali shuwamuwaami. Tsaaren yumaa deshinbumi. ³⁷Ya' ruku yumaa peyañu, 84 añu ju shinbumi. Tsaa shinburen naa-uwanuba aa eleshasha Diosnu aawa kurendu ba'kityu jujuumi, junga Diosnu pensangue' panda fityu jujuundu, tsenmin Diosba kuinda kiikendu. ³⁸Tsejtu juntsa uranuren Ana yala' junga ji' katawatu, Diosnu tsamantsa yuj urave ti' patu, bene Ana Jesúsnu laapu' pamí naaju Israel chachillaa livee kisa tya' dekeenañu

bain. ³⁹José Maríaba Bale Ruku' lei naati uudengueñuba tsa deketu, bene Galilea tusha, yala' pebulu Nazaretbi miila. ⁴⁰Tsenñu Jesús awantsumi naa deranchi bain, tsenmin kayu aseetanguenchu bain. Tsenmala Dios bain yanu estyan chumi.

Jesús kayiimala aa eleshasha

⁴¹José bain, María bain Nazaret pebulubi chuturen aňumee Jerusalénsha jijiimuwaala. Kaspee rukula Egiptosha chuumala, Dios yalanu livee kemuwaaňu, juntsa malu machaňu, Jesúschi ya' apala Jerusalénsha miji' wa'dila Dapulla' livee kiňu fandangu ken punu.

⁴²Tsejtu Jesús 12 aňu itu, ya' bululaba Jerusalénsha jimi, naa-uwanu bain aňumee tsa tsaimuwa deeňu' mitya. ⁴³Tsai' junbi ji', fandangu malu jumula depulla' miindu José ya' shinbu bain, naa veela bain buluu miintsula Nazaretsha. Tsai' miindu, Jesús ya' apala mijaindetyuren Jerusalénbi shuwaimi. ⁴⁴Tsenñu yala' pensaa veelabaa miintsumee tyatu, ma malu neepachi miila. Tsejtun bene naa yala' bulula' junga bain mami'ke'kera, tsenmin yachi keranu chachilla' junga bain mami'ke' keekitun mangatanbudei'tu, ⁴⁵Jerusalénsha miila Jesúsnu mami'kenu. ⁴⁶Tsai' mami'kendu entsaba pen malu insha Jerusalénbi aa eleshasha Jesús vi' chuna!, Moisés' wandya lei mashtuu bale rukulaba kuinda ke', tsenmin yala depanmala meedi' pake'meemee kentsu katajila. ⁴⁷Tsenñu kumuinchi meenamulaya meenbashiintsula, Jesús yuj bibu' juňu' mitya, tsenmin depake'meeňu bain mi' paka pakakeňu' mitya. ⁴⁸Tsandintsu, Jesúsnu ya' apala mangatatu yuj keenbaishtu, bene María tsandimi ya' nanu: Apa, ¿ňu nenňunayu tsanamii? Iya ñu' apaba pure' wapanaa ñunu mami'kes nendetshaashubaa, timi.

⁴⁹Tsenñu Jesús pakatu: ¿Naa kenaña ñulla inu mami'kes nendetshuyu? ¿Nulla mijdetuu naa iya in Apa' taawasha kenu menesteňuba? timi.

⁵⁰Tsenñu yala Jesús naatitaa tsandiňuba jaiba aseetangui'lla.

⁵¹Tsandi' panduren Jesús ya' apalaba Nazaret pebulusha miimi. Tsejtu, ya' apala naadetiňuba tsanguen chumi. Tsenmala ya' amaya kumuinchi entsa pashtyu' ya' tenbukasha tengaya chumi.

⁵²Tsenmala Jesús tsanaturen ya' pensa bain, naa ya' bulu bain de-aawaintsumi. Tsenñu Dios bain, naa chachilla bain Jesúsnu kayu estyan chula.

Juan tiba den chutyu tenasha mungares nemi.

(Mateo 3.1-12; Marcos 1.1-8; Juan 1.19-28)

3 ¹Kaspee tinbunu Tiberio César, romanola' kayu aa uňi, yumaa ¹⁵aňu uudenguen chunu tinbunu Poncio Pilato Judea tusha uňi juwaami; tsenmala Herodesya Galilea tunu uňi pumuwaami; tsenmala Herodes' uňaku Filipoya Iturea tunu bain, Traconítide tunu bain uňi pumuwaami; tsenmala Lisaniasya Abilene tunu uňi pumuwaami. ²Tsenmala Anásya Caifásba juntsa tinbunu chachilla' mitya Diosnu kalen

jimula' kayu aa bale ruku juwaala. Juntsa tinbutala Zacarías' na Juan, tiba den chutyu tenasha neneintsu, Dios pakare' kuinda mijakaakaami.

³Tsenñu Juan, kumuinchi Jordán pi keetalaya chachillanu demijakares ne', yalanu veta' pensa demangue' Diosnu meengue' mungaradei, tsenmala Dios ñnulla' ujcha pitsaanu tsuve, tis neneimi. ⁴Entsaa puimiya Diosa' mitya pamu ruku Isaías naati pamuwaañuba tsaitaa tsaimi, entsandimuwañañu:

Tiba den chutyuin tenasha main entsandintsuve:

*Bale Ruku' janu miñu ura' mandei,
ñnulla' tenbukasha ya' miñu ura' mantse'kaadei.*

⁵Kumuinchi tu jatsuwatalaya pareju' dematsure',
naa butyutala bain kumuinchi pareju paki' mandei.
Tsenmala binda' miñutalaya ura' mantse'kare',
miñu ura' jutyundalaya jatsuwa' mannu dejuve.

⁶Tsenmala Dios chachillanu livee kemu juñu mu bain katanu detsuve, ^c ti'
piikemuwaami Isaías.

⁷Tsenñu Juan' junga pure' chachilla mungaakutinu jijideiñu, yalanu entsa entsandimi: Ñulla piñi juuñuu anbutimu chachillanuba, ¿maa ñullanu Dioschi taaju i' puinu kaledenashuba, engu jataa livee inu dejuve tiñaa dejayu? ⁸Veta' pensa mangue', veelachiba uwain entsala Bale Ruku' miñusha demaañuve tenna keewaadei, ne ñui tene, "Lalaya Abrahamnu sera' jamu deeyu", tya' daj pensaa keewatyudei. Matyu uwaindiyu Diosren tsanguindyatuya, naa entsa shupukanu bain Abrahamnu sera' jimu chachi juula bain tirenuu juve. Tsa' mitya tsandyatyudei. ⁹Chi tuumu jacha telelebi ma tulekemu jacha yumaa tyaya ma tsunave. Tsaju' naaju chi bain ura' puka ityuya dedala' ñinbaasha keviimu deeve, timi Juan.

¹⁰Tsenñu chachilla pake'meetu tsa tsandila: Tsaashu juntsaa, ¿naa kenu dejعوا? tiitila.

¹¹Tsenñu Juan pakatu tsandimi: Pai jali tashu juntsaa, tajtu rukunu ma jali kuwade. Tsenmin mun panda finu tana' bain, veela tajtulanu vele' kuwade, timi.

¹²Tsenñu deechu' mitya lushi kamu mantsa rukula bain mungaakutinu deja', Juannu pake'meetu tsandila: Rukui, ¿lalaya tyee kenuu dejعوا? tila.

¹³Tsenñu Juan pakatu tsandimi: Bale rukula ñullanu lushi naa naake kanuu juve detiñu bain tsantsan kaketu, yapa katyudei, timi.

¹⁴Tsenñu mantsa suutadula bain pake'meetu: Tsenmala ¿Lalaya tyee kenuu dejعوا? tila.

Tsenñu Juan pakatu tsandimi: Munu bain firu' ken jutyuren tsandi', jeekaapu' anbuti' taanguityudei. Tsenmin naake depaangueñu kan dechu' bain juntsan juuren mikave tyan chudei, timi.

¹⁵Tsenñu junu pumu chachilla yala' pensashaya, “¿Naaju rukutun?” ty'a, Juannu yuj keenbashintsula: “Entsaaba Dioschi Mi'ke' Kayamu jamaaba jumeete”, tyatya deitu.

¹⁶Tsaaren Juanya kumuinchí chachillanu pakatu tsandimi: Uwain iyaa ñullanu pichee mungaakaakyu, tsaaren bene jamuya Espíritu Santaa kuwanmala ñulla juntsachee mungaraiñuinu detsuve, tsenmin ñichi bain mungaanu tsuve. Juntsa rukuya kayu inu pulla pudeve. Ya tsaañu iya baleñu' jutyunchin, naa ya' sandalia chuwan juuba malanbu' kuwakenuba jutyuyu. ¹⁷Juntsa jamu rukuya trigu wa'kare' te'kamu jun tsaa ju', ya' tyapasha tyami puja'tee pala tanave, trigu ñi ya' chiba devela' kalaanu. Tsanguemiya trigu tsurensha uukare', ya' kuyaa naa-uwanuba manbetyu ñinbaasha kepu' ikakaanu tsuve, ti' laapu' pamí Juan.

¹⁸Tsandi' kayu pure' uumi'te' papatitu, Juan Diosa' mika ura kuinda mijakaakaa kemi chachillanu. ¹⁹Tsenmin uñi Herodesnu bain Juan nepami, yaa ya' uñaku Filipo' shinbu Herodíasnun mangañu' mitya, tsenmin kayu vera ti juula bain firu' kiiken chuñu' mitya. ²⁰Tsejturen kayu jungajte Herodes meenguityu' entsa bain firu' ketu, Juannu tsaa peesu pukemi.

Jesús mungarami.

(Mateo 3.13-17; Marcos 1.9-11)

²¹Juan kayu peesu vityumujchi chachillanu mungaantsuñu, Jesús bain mungarami. Tsejtu Jesús Diosba kuinda kentsunu uwanu tsaa selu jurudimi, ²²tsenmalaren Espíritu Santo entsai katawa' wa'pupu keraa yanu pajaimi, tsenñu selusha main entsandiñu meejamí: Naa in estyanu Nave. Ñu' mitya yuj sundenve, timi.

Jesúscchi tinbu aa-apala

(Mateo 1.1-17)

²³Jesús 30 aña juunatalaa ya' taawasha peepumi. Jesúsyá José' nave tyamuwaala.

Tsaju' Joséya Elí' nawaanmala,

²⁴Elíya Matat' nawaami.

Matatya Leví' nawaanmala,

Levíya Melquí' nawaami.

Melquíya Janai' nawaanmala,

Janaiya José' nawaami.

²⁵Joséya Matatías' nawaanmala,

Matatíasya Amós' nawaami.

Amósyá Nahúm' nawaanmala,

Nahúmya Eslí' nawaami.

Eslíya Nagai' nawaanmala,

²⁶Nagaiya Máhat' nawaami.

- Máhatya Matatías' nawaanmala,
 Matatíasya Semeí' nawaami.
 Semeíya Josec' nawaanmala,
 Josecya Joiadá' nawaami.
- ²⁷ Joiadáya Johanán' nawaanmala,
 Johanánya Resá' nawaami.
 Resáya Zorobabel' nawaanmala,
 Zorobabelya Salatiel' nawaami.
 Salatielya Nerí' nawaanmala,
- ²⁸ Neríya Melquí' nawaami.
 Melquíya Adí' nawaanmala,
 Adíya Cosam' nawaami.
 Cosamya Elmadam' nawaanmala,
 Elmadamya Er' nawaami.
- ²⁹ Erya Jesús' nawaanmala,
 Jesúsya Eliézer' nawaami.
 Eliézerya Jorim' nawaanmala,
 Jorimya Matat' nawaami.
 Matatyáya Leví' nawaanmala,
- ³⁰ Levíya Simeón' nawaami.
 Simeónya Judá' nawaanmala,
 Judáya José' nawaami.
 José Jonam' nawaanmala,
 Jonamya Eliaquim' nawaami.
- ³¹ Eliaquimya Meleá' nawaanmala,
 Meleáya Mená' nawaami.
 Menáya Matatá' nawaanmala,
 Matatáya Natán' nawaami.
 Natánya David' nawaanmala,
- ³² Davidya Jesé' nawaami.
 Jeséya Obed' nawaanmala,
 Obedya Booz' nawaami.
 Boozya Sélah' nawaanmala,
 Sélahya Nahasón' nawaami.
- ³³ Nahasónya Aminadab' nawaanmala,
 Aminadabya Admín' nawaami.
 Admínya Arní' nawaanmala,
 Arníya Hesrón' nawaami.
 Hesrónya Fares' nawaanmala,
 Faresya Judá' nawaami.
- ³⁴ Judáya Jacob' nawaanmala,
 Jacobya Isaac' nawaami.

Isaacya Abraham' nawaanmala,
 Abrahamya Térah' nawaami.
 Térahyia Nahor' nawaanmala,
³⁵ Nahorya Serug' nawaami.
 Seruya Ragau' nawaanmala,
 Ragauya Péleg' nawaami.
 Péleya Éber' nawaanmala,
 Éberya Sélah' nawaami.
³⁶ Sélahya Cainán' nawaanmala,
 Cainánya Arfaxad' nawaami.
 Arfaxadya Sem' nawaanmala,
 Semya Noé' nawaami.
 Noéya Lámeč' nawaanmala,
³⁷ Lámecya Matusalén' nawaami.
 Matusalénya Henoc' nawaanmala,
 Henocya Jéred' nawaami.
 Jéredya Mahalaleel' nawaanmala,
 Mahalaleelya Cainán' nawaami.
³⁸ Cainánya Enós' nawaanmala,
 Enósyá Set' nawaami.
 Setya Adán' nawaanmala,
 Adánya Diosa' nawaami.

Dyabulu Jesúsnu ujcha lawaanu kemi.

(Mateo 4.1-11; Marcos 1.12-13)

4 ¹Jesús Espíritu Santo' mityaa tiba kiikemu juu Jordán pisha malumi. Tsenu Espíritu Santo Jesúsnu tiba den chutyuin tenasha miya' jiimi. ²Tsejtu junga 40 malu tsanañu Dyabulu ujcha lawaanu kiikemi. Juntsa malutala panda fajtu nendu bene panda mutyami. ³Tsenu Jesúsnu Dyabulu tsandimi: Ñu uwain Diosa' Natuya, entsa shupukanu pan tirede, timi Dyabulu.

⁴Tsenu Jesús Dyabulunu pakatu: Diosa' Kiikanu entsa pillave: *Chachilla panda findun chunanu dejutyuve*,^d tive, timi. ⁵Tsejtu bene Dyabulu aa butyusha Jesúsnu miya' lu-i', tu kuraa jeke dekeeware' dyatu ⁶tsandimi: Kumuinchí entsa tu tsamantsa naraa judeeshu juntsala ñunu tene dekuwanu tsuyu, ñu uudenguen chunutsu, matyu inchi deeñu munaa kuwandenuba kuwanuu ju' mitya. ⁷Tsa' mitya ñu teledi' inu aawa kure' keewaashu juntsaa, ñunu dekuwanu tsuyu, timi.

⁸Tsenu Jesús pakatu tsandimi: Diosa' Kiikanu entsa pillave: *Ñu' Bale Ruku Diosnuren aawa kure' keewaake', yachiren tiba kiikemu juude*,^e tive, timi.

⁹Tsenñu bene Dyabulu Jesúsnu Jerusalénsha miya' ji', aa elesha mishbui'sha kayu katyu tenabi miya' luitu tsandimi: Ñu uwain Diosa' Natuya, enun tusha yanbude. ¹⁰Matyu Diosa' Kiikanu entsa pillave: *Dios ñunu tiba ikaan jutyu ya' anjeelanu washkekaanu eenu tsuve.* ¹¹Tsenmala: *Anjeela dejá' ñunu tyapachi yali' tadinu detsuve, ñu' neepa tusha tyuika' shupukachi tapan jutyu,*^f tive, timi.

¹²Tsenñu Jesús pakatu tsandimi: Diosa' Kiikanu entsandive: *Ñu' Bale Ruku Diosnuya ti ken tsangue tirenu kityude,*^g ti' pillave, timi.

¹³Tsejtu Dyabulu Jesúsnu kayu naake' ujcha lawaren tsaatu, juntsa malatalaa ba'ke' miji' manbullaki'mi.

Jesús Galileasha mijakares nenu peepumi.

(Mateo 4.12-17; Marcos 1.14-15)

¹⁴Tsejtu Jesúsnu Espíritu Santo tsanguikaañu, tiba kiikemu juuya Galileasha miimi, tsenñu Galilea keetala chumu chachilla ya tyeenguiikeñuba mijala. ¹⁵Jesúsyra cha' waku wakudinu yatala yaiba wa'di' Diosa' mika ura kuinda mijakaakaa kemi, tsenñu kumuinchii chachilla Jesúsnu balengure': Yuj urave, tiitila.

Nazaret' chulla Jesúsnu tu'nu tyala.

(Mateo 13.53-58; Marcos 6.1-6)

¹⁶⁻¹⁷Jesús Nazaretbii miimi, ya' awanu pebulubi. Tsejtu Jesúsyra naauwanuba tsaimu' mitya, saaduma lekanu malunu chachilla' waku wakudinu yasha vimi. Tsejtu Jesúsnu Diosa' mitya pamu ruku Isaías' pillaa kiika dekuwañu, ka' uidi' lennu ja'letu, entsaa pillaa katami:

¹⁸*Bale Ruku inu mi'ke' kañu' mitya, ya' Espíritu inu chuve.*

Juntsa Espíritu Santo inu kuwamiya lastemaa chumulanu yachi mika ura kuinda mijakaanaa tsanguive,
tsenmin veelachi kaya' ji' manda-in chumulanu bain livee iwaanu,
tsenmin kapuka dandajtulanu bain danguikaanu,

¹⁹*tsenmin Bale Ruku naamaa chachillanu ura' kenuu juñu bain mijakaanu.*^h

²⁰Tsejtu Jesúspare' dyatu, kiika manbijte' cha' waku wakudinu yasha tiba kivetan pumu chachinu manguwa' chudimi mijakaanu. Tsenñu junu cha' waku wakudinu yasha pumu chachilla Jesúsnu tene yuj keenala. ²¹Tsenñu Jesúspare' padundatu tsandimi: Ñulla' ajuusha lenguikeeshu juntsa kiika naatiñuba uma tsaa puintsuve, timi.

²²Tsenñu mu bain Jesúsnu laapu' patu yuj urave ti' papatila, tsenmin ya tyee uomera' papatiñuba juntsaatala bain mika meenbashintsula, tsejtu yai tene entsandi pake'meemeekila: ¿Entsa, José' na jutyuu? tiitila.

²³Tsenñu Jesúspare' tsandimi: Ñulla inu entsandi'bandinu dejuve: Dilu ura' mandiremu ruku, ñuren maali ke' matsatiyade. Tsenmin entsandi'bandinu

dejuve: Lala Cafarnaúm pebulusha ñu naakeñu demeeñu bain, enu ñu' tunu bain tsanguide, ti'bandinu dejuve, timi. ²⁴Tsejtu Jesús kayu pa' jindu entsa bain tsandimi: Uwaindiyu, Diosa' mitya pamu rukula naajula bain lu'tsa' tushaya balengura' keewaratu deeve. ²⁵Tsenmin uwaindiyu kaspele Diosa' mitya pamu ruku Elías chunu tinbunu, Israel tusha pure' biyuda shinbula chunamuwa deeve. Tsenñu juntsa tinbutala naa nukaba pen aña medya shuwa jatyu!, panda yamuj tiyañu ti fin tsaa tiyaimuwa deeve. ²⁶Tsa denaren Diosya Elíasnu juntsa Israel biyuda shinbula' chuinshaa eetyumujchi, main Sidón pebulu keesha Sarepta pebulubi chumu biyuda shinbu' jungaa Elíasnu eemuwaami.

²⁷Tsenmin Diosa' mitya pamu ruku Eliseo chunu tinbunu bain Israel tusha manbityu bishpeechi dilu chachilla pure' chunamuwaala. Tsaaren mu bain Israelsha chumu dii rukulaya Eliseochi manbirekaraindetyu!, Siriasha chumu Naamánren ya! dii peya ura' mandiyaimuwaave, timi Jesús.

²⁸Juntsandiñu cha' waku wakudinu yasha pumu chachilla demeetu Jesúsnu yuj ajaatyala. ²⁹Tsejtu chachilla dewa'di' Jesúsnu pebulu kapasha tsaa ka' tajiila, matyu pebuluya ma butyunu ne chunañu, juntsa kapa keesha aa kujtu juñu, junga tyuleepunu detya' mitya. ³⁰Tsa deiñuren Jesús yala' kejtsapalan tsaa manbulla' ne mijimi.

Bu'chulla puu rukunu Jesús ura' mandiremi.

(Marcos 1.21-28)

³¹Jesús Galilea tusha Cafarnaúm pebulubi jitu, saaduma lekanu malunu chachillanu Diosa' kuinda mijakaantsumi. ³²Tsenñu chachilla mika meenbashintsula naati pa' mijakare' bain, yaa uwain tsandinuu ju' papatiñu' mitya.

³³Tsenñu yala' waku wakudinu yasha ma rukunu Dioschi urajtu kuraa tiremu bu'chulla puutu uti' tsandimi: ³⁴Nazaretsha chumu Jesús, ¿tyeenguenaa jayu; lalanu millangaanaa jatu iyu? Iyaa miyu ñu muñu bain. Nuya Dioschin juu chachi jumuve, timi.

³⁵Tsenñu Jesús nepatu tsandimi: ¡Patyude; aantsa rukunu malude! timi.

Tsenñu dyabulu kumuinchi chachilla dekeenaren juntsa rukunu tsungue tyapukare' malu' miituren tiba firu' kendyumi. ³⁶Tsenñu kumuinchi chachilla dewapantu veta' veta' tsa tsandila: ¿Entsa ruku naati patundin? ¿Tsenmin maa tsanguikaañaa tsaa Dioschi urajtu kuraa tiremu bu'chullanuba maludei ti' me-e'laatunguen? tiitila.

³⁷Tsenñu kumuinchi juntsa tenatalaya Jesús tyee kes neneiñuba kuinda demijaintsula.

Jesús, Pedro' anchamanu ura' mandiremi.

(Mateo 8.14-15; Marcos 1.29-31)

³⁸Tsejtu Jesús cha' waku wakudinu yanu mafale' miitu, Simón Pedro' yashaa vimi. Tsenñu Simón' anchama penguma jupee dilu tsuñu, veela entsa shinbunu

ura' mandiresa tyatu, Jesúsnu pala. ³⁹Tsenñu Jesús juntsa shinbu' ajuusha wayu'kake' pengumanu: ¡Manbiyade! ti' pañu, juntsa uranuren penguma ishanabajtekemi. Tsenmin juntsa shinbu mangujpa' yalanu tyeeba ke' kudundai.

Dilu purenamulanu Jesús ura' mandiremi.

(Mateo 8.16-17; Marcos 1.32-34)

⁴⁰Kepenusha, pajta vinu uranu, kumuinchchi chachilla tichi'baasa dilu tanamulaya Jesús' junga tajila. Tsenñu Jesús dilulanu main main ya' tyaapachi ta'katu de-ura' mandiremi. ⁴¹Tsanguiñu pure' chachi diluu jumulanu dyabulula demalundu: Ñuya Diosa' Nave, ti' uti utindila.

Tsenñuren Jesús dyabululanu nepatu, pakaatyu jujuumi, matyu juntsa dyabululaya Jesús Dioschi Mi'ke' Kayamu juñuba mideenú' mitya.

Jesús vee mujtu bain Diosa' palaa mijakares nemi.

(Marcos 1.35-39)

⁴²Dechayañu kepenene, Jesús pebulunu malu' miitu, muba den netyuin tenashaa jimi. Tsenñuren chachilla demi'kiitu Jesús nuka puñuba jungan jila. Tsejtu vee mujtusha erendyai'tu, yala' junun ka' tadinu kila, ⁴³tsenñu Jesús tsandimi: Vee mujtu pebulusha bain ji', Diosnu rei juu tananu mika ura kuinda mijakaanu juyu, matyu Dios inu tsanguenaa eeñu' mitya, timi.

⁴⁴Entsaitaa Jesús judíola' tusha cha' waku wakudinu yatala mijakares neneimi.

Simón Pedro alla pure' kakemi.

(Mateo 4.18-22; Marcos 1.16-20)

5 ¹Jesús ma bijee Genesaret pusu pikee ñiipesha ji' pumi. Tsanan, chachilla Diosa' kuinda meedinu tyatu, Jesús' junga ujkijtui jila. ²Tsa deiñu, Jesús pai kaa baaku pi keesha udena katami. Juntsa baakulanu ainguemulaya depajtya' yala' waaku manbitsalentsula, ³tsenñu Jesús ma baakusha viimi. Tsenñu juntsa baakuya Simónchiñu, Simónnu: Entsa baaku jayu shasha tyuleeke' ungaakide, timi.

Tsanguiñu Jesús juntsa baaku juusha chudi' Diosa' kuinda mijakaantsumi ñiipesha uinamu chachillanu.

⁴Tsejtu, chachillanu Diosa' kuinda demijkare' dyatu, bene Jesús Simónnu tsandimi: Baakuchi kayu shasha luitu, waaku manbajte' alla mandei, timi.

⁵Tsenñu Simón tsandimi: Rukui, lala waakuchi alla ju'linanan dechaturen maliba kaindetyuyu. Tsaaren ñu tsanguenu uudenguiñu' mitya, manen waaku maju'lilu tsuyu, timi.

⁶Tsenñu yala kayu shasha lu-i' maju'lila. Tsangue' waaku mangalarendetsun alla pureiñu, allachiren waaku kiyuujinundiantsumi, ⁷tsenñu yala' keranu ainguemu chachilla kalen depuñu, Simón jawa'ka jawa'kakemi, yalanu alla kalaave'jakai tyatu.

Tsenñu alla kalaave'nu dejitu, pai baaku alla tene chukangumake ka' pula. ⁸Tsanguetu Simón Pedro Jesús' ajuusha telenajitu tsandimi: Rukui, iya ujcha lamu rukuñu' mitya, inu baka' mijiide, timi.

⁹Entsandimiya Simón bain, naa yaba ya' baakunu ainguemula bain tsamantsa alla deka' wapanaa deju' mityaa tsandimi. ¹⁰Tsenñu naa kama baakusha yaba bulu ainguemula bain tsaren wapanla Santiago bain, Juan bain, matyu Zebedeo' nala. Tsenñu Jesús tsandimi Simónnu: Jeetyatyude. Kaspele naa ainguemu rukuwa ju' bain, umaa entsa ajkeshaya chachillanaa ainguen tsanguemu junu tsuve, timi.

¹¹Tsenñu yala' baaku ñiipesha dejul'i' tsure', kumuinchi yala' buli deshuikike', Jesúsnu buudi' bendaa jila.

Manbityu bishpeechi dilunu Jesús ura' mandiremi.

(Mateo 8.1-4; Marcos 1.40-45)

¹²Ma malu Jesús ma pebulusha puñu, ma ruku manbityu bishpeechi diluu jumu jimi. Tsejtu Jesús' ajuusha teedi' wayuke' patu tsandimi: Rukui, ñuren tsanguenu tenñuya, inu ura' mandireka; iya mijayu, ñu in dilu peya manbirenuu juñuba, timi.

¹³Tsenñu Jesús ya' tyAAPachi ta'katu tsandimi: Uwain tsanguenu tenve. ¡Ura' mandiyade! timi. Tsenñu juntsa uwanuren ya' bulu kuraa manbityu bishpee tene juuren narai mandiyami.

¹⁴Tsenñu Jesús juntsa rukunu tsandimi: Veelanu kuinda kityude. Tsaaaren chachilla' mitya Diosnu kalen jimu rukula' jungaa ji' keekutide. Tsejtu juntsan mitya Moisés tyee kenu dejuve timuñuba juntsaa ke' Dioschi ura' kuraa mandiyayu ti' keewaanu ufeenda tají' kuwade, tsejtaa diluren ura' mandiyayu ti' keewaanmala veela bain ñu uwain ura' mandiyañuba mijanudetsu, timi.

¹⁵Tsenñuren Jesús tsa tsanguive tiñu kuindaya malumere nukaba mijá' ne jiintsula. Tsejtu chachilla pure' ja-i' waku wakudila kuinda meedinu, tsenmin dilulaya ura' mandikutinu. ¹⁶Tsenñuren Jesúsya muba den netyuinsha maali vela' jijiimi, Diosba kuinda kiikenu.

Dedeelaa dii rukunu Jesús ura' mandiremi.

(Mateo 9.1-8; Marcos 2.1-12)

¹⁷Ma malu Jesús mijakaren pu, fariseola bain, naa Moisés' wandya lei mashturula bain deja' chula. Yalaya Galilea kaa pebulutala bain, Judeasha chulla bain, naa Jerusalénsha chulla bain jamulaa tsanala. Tsenmala Jesúsya Bale Ruku Dios tsanguikañu dilulanu ura' mandire mandirekiñu, ¹⁸veela bain mainnu dedeelaa rukunu wandunu tsuu tajila. Tsejtu Jesús' junga tajinu tyaturen, ¹⁹chachi puredenañu' mitya, naa-i' Jesús' junga vin tsaaatu, pakikii ya mishbui'sha lu-i' dellajikiikatu, dii rukunu wandunu tsuu Jesús' ajuusha pajtekila cha' kejtsapala.

²⁰Tsenñu Jesús kata' naa yala dekeranguiñuba mijatu, Jesús dilunu tenbityatu tsandimi: Ruku, ñu' ujcha demanbitsalave, timi.

²¹Tsenñu Moisés' wandya lei mashturula bain, fariseola bain entsandyala: “¿Entsa naaju rukutundin tsandi' Diosnu kentsure' pantsumi, ujchaya Diosren ujcha' mitya manbitsaakenuu juunuba?” tyala.

²²Tsenñu Jesús, yala naatyandetsuñuba mijatu tsandimi: ¿Nenñaa ñulla' tenbukasha aantsangue pensanguendetsuyu? ²³¿Matyu entsa rukunu: Ñu' ujcha' mitya manbitsalave, tityumujchin: Mangujpa' miide, tiñu bain tsaren jutyuu? timi. ²⁴Tsaaren uwain Chachi Tiya' Nakayamuya entsa tusha chachilla' keñu ujcha manbitsaanuu juñu bain ñulla mijanudetsu keewaanu tsuyu, titu, dedeelaas tsumu dii rukunu tsandimi: Mangujpa', ñu' tsunu wandu manga', ñu' yasha miide, timi.

²⁵Tsandiñu dilu dedeelaas tsumu ruku yala' ajuusha jei mangujpa' ya' wandu manga' yasha miindu, Diosya yuj ura' kemu rukuve, tisai miimi.

²⁶Tsenñu kumuinchí chachilla dewapana' keenbashiitü, Diosnu yuj urave, ti': Naa-uwanuba entsaa uukeraa keñuya kata' kerajdetuyu, tiitila.

Jesús, Levínu ya' disipulu tirenu mikami.

(Mateo 9.9-13; Marcos 2.13-17)

²⁷Tsangue' dya' bene Jesús mafaatu, buli tajimulanu Roma uñichi deechu' mitya lushi kamu rukunu lushi kainsha chuna katami; juntsa ruku ya' momu Levími. Tsenñu Jesús yanu tsandimi: In bendala ja' in disipulu tiyade, timi.

²⁸Tsenñu Leví tiba millangue shuike', Jesúsnu buudi' bendaas jimi.

²⁹Tsejtu bene, Leví Jesús' mityaren ya' yabi wa'di' panda finu fandangu kemi. Tsenñu pure' chachilla deechu' mitya lushi kamula bain, naa kayu veela bain bulu chudi' panda fintsula. ³⁰Tsenñu fariseola bain, naa fariseolaba bulu taawasha kemu Moisés' wandya lei mashturula bain dekeena' na'baasa pandu, Jesús' disipululanu tsandila: ¿Nenñaa ñulla deechu' mitya lushi kamu rukulaba bain, tsenmin vejan ujcha lan chumu chachillaba bain buudi', yaibaa panda fi' kujchindu dekiyu? tila.

³¹Tsenñu Jesús pakatu tsandimi: Tiba dilijtu chachillaya dilulanu ura' mandiremulanu menestejdetuve, tsaaren dilulaya meneste deeve.

³²Tsaju' iyaa Dios naakesa tyañuba tsanguen chumu chachillananu mikanu jaindyuyu; iyaa ujcha lamu chachillanaa mikanu jayu yalanu veta' pensa demangaanu, timi Jesús.

Diosnu pensangue' panda fi'natala

(Mateo 9.14-17; Marcos 2.18-22)

³³Tsenñu yala Jesúsnu entsandi pake'meela: Juan Mungaamu' disipulula bain, naa fariseola' disipulula bain Diosnu den pensangue' panda fityu juju dejü' Diosba kuinda kiidekive, tsaanuren ¿nejtaa ñu' disipululaya tsanguityumujchi panda fi', kuchi kujchideken? tila.

³⁴Tsenñu Jesús tsandimi: ¿Matsumu ruku ñuiba bulu punuren, bulu puve'nu mikayamu chachillananu ya' mitya ti' panda fikaan jutyuu junu

dejuu? ³⁵Tsaaren mandinbu nuviyunu manga' miinu malu janu tsuve, tsenmalaa umaa fandangu kemula ya' mitya ti' panda fin jutyuu tiyanu detsuve, timi.

³⁶Tsenmin main laapu' kuinda juu ketu bain Jesús tsandimi: Mu bain kasa jai petse daaka' uinbu jalinu mangaaputyu deeve. Matyu kasa jai petse uinbu jalinu mangaapunmalaya, kasa jali mushanu juve, tsenmin naa uinbu jali bain kasa jaliba mangaapuñu ura' keran jutyuve. ³⁷Tsenmin tsaren juve, kasa binu bain uinbu ki' buusanu putyu deeve. Tsanguishu juntsaa, kasa binu chiyatu, uinbu ki' buusanu kiyuu-ere' mushkenmala, binu bain desejiinu juve. ³⁸Tsañañu' mitya kasa binuya kasa ki' buusanaa punuu juve. ³⁹Tsenmin mu bain yumaa binu pumu kujchishu juntsaa, kasa binu mangushnu tyatyu deeve, yalaya: Yumaa pumu binaa kayu urave, deti' mitya, timi Jesús.

Lekanu malunuren Jesús' disipulula trigu ka' fila.

(Mateo 12.1-8; Marcos 2.23-28)

6 ¹Ma malu Jesús ya' disipululaba saaduma lekanu malunu vijpaatala pulla' jintsumi, tsenñañu ya' disipulula trigu walla' ka' ya' ñi tyAAPachi dellajchaa inde' fifikila. ²Tsenñañu mantsa fariseola tsandila: ¿Nenñaña saaduma lekanu malunuya tsanguenu jutyunuba aantsanguendu dekiyu? tila.

³Tsenñañu Jesús tsandimi: ¿Ñulla lengue' kerajdetuu ma bijee rei David yaba bulu nemulaba panda demutyatu, ⁴Diosa' yasha vitu Diosnu keewara tsumu pan, matyu juntsa panya chachilla' mitya Diosnu kalen jimu rukulan fikenuu juwañañuba, David ka' fi', naa yaba bulu nemulanu bain kumuwañañuba? timi. ⁵Tsejtu entsa bain tsandimi: Chachi Tiya! Nakayamuya naa saaduma lekanu malutala bain tyeenguenet yta'ba tsanguenu juve, timi.

Tyaapa ejke ruku

(Mateo 12.9-14; Marcos 3.1-6)

⁶Masku saaduma lekanu malutala manen Jesús cha' waku wakudinu yasha mavi' Diosa' kuinda mijakarentsumi. Junu ma ruku uran dyaaapa yujka dedeela pumi. ⁷Tsenñañu junu Moisés' wandya lei mashturula bain, naa fariseola bain Jesúsnu dus keetanala saaduma lekanu malunuren ura' mandireñañuba kata', yala juntsan mitya Jesúsnu kuipta faawaanu tyatu.

⁸Tsenñañuren Jesúsya yala naake pensanguendetsuñañuba mi' bain, tyaapa yujka dedeela rukunu tsandimi: ¡Aanu kejtala kujpa' uidide! timi.

Tsenñañu juntsa ruku kujpa' uidíñu, ⁹Jesús veelanu tsandimi: Iya ñullanu pake'meenu tsuyu: ¿Saaduma lekanu malunu tyee keñaa uranu jun? ¿Uraaya kenuu jun? Tsa jutyu'ba, ¿urajtu juuya kenuu jun? ¿Chachillanu livee kenuuya jun? Tsa jutyu'ba, ¿peyawaaakenuya jun? timi.

¹⁰Tsandituu Jesús kumuinchu uinamu chachillanu dekera' yatetu, juntsa dii rukunu tsandimi: Ñu' tyaapa usakide, timi.

Tsenñu uskemiren ya' tyaapa narai mandimi.

¹¹ Tsenñu veela keenatu mika ajaatyala, tsejtu yai tene patu: ¿Jesúsnu naa kenu dejuwa? tiitila.

Jesús 12 ruku mi'ke' kami.

(Mateo 10.1-4; Marcos 3.13-19)

¹² Juntsa malutala ma bijee Jesús bui'sha lumi Diosba kuinda kenu. Tsejtu juntsa kepe Diosba kuinda kenanan chayami. ¹³ Tsejtu dechayañu kepenene ya' bendaa nemulanu demikatu, 12 ruku mi'ke' kami. Tsejtu juntsalanu ya' mytya kuinda kenu lara' eramu ruku detiremi. ¹⁴ Juntsa 12 rukula entsalaa jula: Simón, tsenñuren Jesúsya juntsanu Pedro mumu pumi, Simón' naatala Andrés bain, Santiago bain, Juan bain, Felipe bain, Bartolomé bain, ¹⁵ Mateo bain, Tomás bain, Alfeo' na Santiago bain, Simón, Diosaa lei naatiñuba tsa deki'ñu selandyamu tinu ruku bain, ¹⁶ Santiago' na Judas bain, tsenmin Jesúsnu firu' kekaanu wandi' kakaamu Judas Iscariote bain.

Jesús mijakare' dilulanu ura' mandiremi.

(Mateo 4.23-25)

¹⁷ Jesús ya' mytya kuinda kenu lara' eramu rukulaba bui'sha pu' manabajatu manbela jatsuranu miila. Tsenñu ya' bendaa nemu chachilla purenala, naa vee chachilla Judeasha chulla bain, Jerusalén' chulla bain, kayu veela fera keesha Tiro pebulu' chulla bain, naa Sidón pebulu' chulla bain ji' pula, ¹⁸ matyu Jesús' palaanu meenanu jimula, tsenmin yala' diipeya bain ura' mandiresa tya' jimula. Tsejtu naa Dioschi urajtu kuraa tiremu bu'chullachi taaju in chumu deju' bain ura' mandiya mandiyaila. ¹⁹ Tsa' mytya Jesúsnu kumuinchchi chachilla ta'kanu tyatyaila, matyu yaa tsanguenuu ju', naaju dilulanu bain ura' mandirekeñu' mytya.

Naajulaa sunden chunuu dejuñu bain

(Mateo 5.1-12)

²⁰ Jesús ya' disipululanu keetu tsandimi:

Ñulla lastemaa chumu chachillaya

Dioschi ura' imu deeve,

matyu Dios ñulla' rei juñu' mytya.

²¹ Tsenmin challa panda yamujka chumulaya

Dioschi ura' imu deeve,

bene tyubanbera fifikentsunu deju' mytya.

Tsenmin challa llaki juu chumulaya

Dioschi ura' imu deeve,

bene masundaya' uukanu deju' mytya.

²² Tsenmin Dioschi ura' imu deeyu tyanu dejuve,

ñullanu chachilla deyutyula'kera, deveeka'kera, firu' pa'kera,

tsenmin Chachi Tiya' Nakayamu' mityaren firu' kure dekiñu bain.

²³Tsa' myta juntsainu malunu mika sundyadei, ñulla selusha tsamantsa balen juu kanu deju' myta, matyu juntsa chachilla' tinbu rukula bain juntsangue firu' kiikemuwa deeve Diosa' myta pamu rukulanu.

²⁴ Tsaaren challa ñnulla tarukula sunden chudenashu juntsalaya taaju inu detsuve, matyu ñnullaya yumaa sunden pullandetsu' mitya.

25 Tsenmin ñulla challa tsamantsa panda ura' fin chumulaya,
taaju inu detsuve,
matyu bene ti fin tsaanu deju' mitya.
Tsenmin ñulla challa tsamantsa sunden chumulaya,
bene yui llakindya' waren chunu detsuve.

26 Tsenmin kaspee tinbunu anbutitun Diosa' mitya pamu rukuyu
timulanu bain
yuj urave ti' papatimuwa deeve.
Tsa' mitya mu bain ñullanu tsandin dechunmalaya,
ñulla anbutikayamu de' mitya,
taaju inuu junu detsuve.

Jesús kundaalanu estyadei ti' mijakaami.

(Mateo 5.38-48; 7.12)

²⁷Tsaaren ñulla inu meedenashu juntsa chachillanuya tsandinu tenve: Ñulla' kundaalanu estyadei, naa detyutyañu bain, yalanu ura' judei.

²⁸Nullanu, Dioschi firu' in chusa timulanu bain, ñullaya yalanu Dioschi ura' in chusa tidei, tsenmin tejkureken chumula' mitya bain Diosba kuinda kiikidei. ²⁹Mun ñunu mashpelenu kidekiñuba, masku pasha bain kikutide. Mun ñuchi jandaa pannu jali chipakeñu bain, naa tansha pannu jali bain kakaade. ³⁰Mun ñunu tyeeba pa'ñu bain kuwade, tsenmin ñuchi tyeeba chipakiñu bain manba'tyude. ³¹Nullanu veela naadekesa tenñuba, ñui bain yalanu tsanguen chudei.

³²Tsenmin ñullanu estyamulanun ñui bain estyaishu juntsaa, ¿ti' mityaa ura' iinuu kentsunu dejuyu? Matyu naa ujcha lan chumula bain estyamuutalaya tsaren estyamu deeve. ³³Tsa' mitya ñulla ura' ken chumuutalan ura' kiidekishu juntsaa, ¿ti' mityaa ura' iinuu kentsunu dejuyu? Matyu naa ujcha lan chumula bain ura' ken chumuutalaya tsaren dejuve. ³⁴Tsenmin ñullanu tyeeba mangunu ti' depa'ñu kuwatu, juntsan mitya kayu manguwakenuulanaa dekuwashu juntsaa, ¿ti' mityaa ura' iinuu kentsunu dejuyu? Matyu naa ujcha lan chumula bain tsaren kiikemu deeve.

³⁵Tsa' mitya ñullaya ñulla' kundaalanu estyan chu' uraa ken chudei, tsenmin tyeeba mangunu til' depa'ñu kuwake' bain, juntsan mitya tyeeba kachuyu tyai'mujchi kuwadei. Nulla tsanguen dechushu juntsaa, bene tyeeba tsamantsa naraa kanu detsuve, tsenmin aa kai'sha chumu Diosa'

na junu detsuve, matyu yaa naa firu' chachillanu bain, naa ura' kive pensa jutyulanu bain tenbitya' ura' kiikemu Dios ju' mitya.

³⁶Tsaju' ñui bain ñulla' Apa Dios naajuu tenbi puñuba, juntsaa dei.

³⁷Veelanu tsa deeve ti' na'baasa patyudei, tsenmala Dios bain ñullanu tsaren junu tsuve. Veelanu kuipa putyudei, tsenmala Dios bain ñullanu kuipa pun jutyuve. Veela ñullanu ti urajtu dekeñu bain, kuipa faawaatintsun jutyu tiyadei, tsenmala Dios bain ñullanu tsaren kenutsu.

³⁸Veelanu kuwadei. Tsanguishu juntsaa, Dios bain ñullanu kuwanu tsuve. Matyu tyuwake' tyuli' pu' seepaijllake pu' manguwakeñuu kenu tsuve. Ñulla veelanu naadekeñu bain, Dios bain ñullanu tsa mannu tsuve, timi.

Jesús laapu' kuinda kemi.

(Mateo 7.1-5; 7.17-20; 7.24-27; 12.34-35)

³⁹Tsejtu Jesús ya' disipululanu laapu' kuinda juu ketu tsandimi: ¿Kapuka putyuutalan main miya' jimishtinuu junu jun? ¿Yala kapuka putyuutalaren jindu palluren tujuusha pajtyanu dejutyun? ⁴⁰Naajuu disipulu bain ya' mashturunu pullaa jutyuve, tsaaren ya bain bene narai mijashu juntsaa, ya' mashturu naajuuñuba tsai tiyanu tsuve.

⁴¹¿Nenñaa ñu' naatala' kapukanu kaa ujtupen punamunaa kata'ba, ñu' kapukanu aa tepulla ma punañuu jumunaa katatyu jutuuyu? ⁴²Tsaju', ¿nejtaa ñu' naatala' kapukanu ujtupen punamunaa mangalaanu panu juyu, ñu' kapukanu aa tepulla punañuu jumunaa katatyumujchiba? Tsa jutyuren tsaañungue keewaamu chachi, ñu' kapukasha aa tepulla pumunaa ajke' mangalaade, tsejtaa, ñu' naatala' kapukanu ujtupe puñuba kayu ura' kata' mangalaanu tsuve.

⁴³Naajuu ura chi bain mushaa pukaya kun jutyuve, naajuu urajtu chi bain uraa pukaya kun jutyuve. ⁴⁴Ti pu'chi juñu bain ya' pukanu keetun ne mijakeyaimuve; pu chinuya igu puka ityuve, naa pijchuwatala bain uva puka ityuve. ⁴⁵Ura' chachiya tiba uraa tene pamuve, ya' tenbukasha ura' pensaa puñu' mitya. Tsenmala firu' chachiya tiba urajtu juu tene pamuve, ya' tenbukasha firu' pensaa puñu' mitya. Tsaju' mu bain ya' pensasha tyee kayu aa pensanguen chumu ju'ba juntsaa pamuve.

⁴⁶¿Nenñaa ñulla inu, Bale Ruku, tiideti'ba, iya naatiñu bain tsanguityu juju deeyu? ⁴⁷Mun in junga ja' meedi', iya naatiñuba tsangue meenguemushu juntsaa entsaañuu juve, ⁴⁸ma ruku ya kenu tyatu, tujuru deke' shupu' jandala yatyutya de-uikaataa ya kemu ruku juuñuuve. Tsenñu pillu daran ja' juntsa yanu pi deenchuwa' tya'keñu bain tiba juikityumi, matyu yatyutya daran sha' wajka' mitya.

⁴⁹Tsaaren mun iya naatiñuba meeturen tsanguityuya, ma ruku, tusha yatyutya mu'pu'mujchi ya kemu juuñuuve. Tsenñu pillu daran ja', juntsa yanu pi deenchuwa' tya'kenmalan, juntsa ya desenaa ji' bujiiñu, matyu tsaa tenbiyaimu juuñuuve, timi.

Suutadu ama' chachinu Jesús ura' mandiremi.

(Mateo 8.5-13; Juan 4.43-54)

7 ¹Jesús chachillanu ya' palaa demijakare' dyatu, Cafarnaúmsha miimi. ²Tsenñu junu main romano suutadu ama chumi. Tsaaren entsa bale rukuchi manda-i' taawasha kemu chachi, ya' estyanu ruku pure' diluu, peyanun jutyuu tsumi. ³Tsenñu juntsa suutadu ama Jesúsnu laapu' pandetsu meetu, judío bale rukulanu mantsa eemi, Jesúsnu ji' u'tadeti' miya' jadei, tsenmala dilunu ura' mandirenutsu titu.

⁴⁻⁵Tsenñu juntsa rukula Jesú's junga jitu, u'tadeti' miya' jinu ty'a patu tsandila: Entsa suutadu ama lala' chachillanu estyamutu, lala' waku wakudinu ya bain kekaamuwaave; tsaañu' mitya, yanu bain la'kave'mishtiñu urave, tiitila.

⁶Tsenñu Jesú yaiba jitu yumaa yasha kalen jindetsuren juntsa suutadu ama mantsa yachi ura' kera chachillanu Jesúsnu kuinda eetu tsandimi: Rukui, mandaaju jatyude, iyaa tiba balejtu chachi ju', naake' ñunu in yasha mikan tsaayu. ⁷Tsaju' mityaa iren ñunu mi'kenu jai'yu. Nu uudenren ne kikide, tsenmala inchi manda-i' taawasha kemu chachi ura' mandiyantu tsuve. ⁸Naa i bain tsaren veelachi uuden imuyu; tsaaren i bain in suutadulanuya uudenguemuyu. Matyu iya mainnu: Jide, tinmalaya, jimuve; naa veranu bain: Jade, tinmalaya, jamuve. Tsenmin naa inchi manda-i' taawasha kemunu bain: Tyeeba kide, tiñu bain, kemuve, ti' kuinda eemi. ⁹Tsejtu tsandita dejíñu, Jesú juntsa rukunu meenbaishtu, ya' bendaajim uchachillanu ke-eetu entsandimi: Uwain, naa Israel' chumuualaba entsa ruku tsaa tsamantsa kerangueno pensa detañu kerajtuyu, timi.

¹⁰Tsenñu uuden i' eramu rukula yasha demiitu, juntsa bale ruku' chachi yumaa ura' mandiyaanu mangatajila.

Biyuda shinbu' nanu Jesús ura' mandiremi.

¹¹Tsangue' dyatu Jesú Naín pebulusha jimi, tsenñu ya' disipulula bain, kayu veela bain pure' bendaajilila. ¹²Tsai' jindetsu Naín pebulu juukapa jiimalaren, Naín pebulu' chulla pemu mennu tajindu juukapanu falekentsula. Tsaaren juntsa pemu, biyuda shinbuchi juntsaren main na juumi. Tsenñu pure' chachilla juntsa shinbunu bendaajilila. ¹³Tsenñu Bale Ruku juntsa shinbunu kata' tenbityatu, yanu tsandimi: Waatyude, timi.

¹⁴Tsandimin Jesú kalen ji' ujkungulenu ta'kakiñu, take' jimula uidila. Tsenñu Jesú tsandimi juntsa nakun rukuren pemunu: Iya ñunu mangujde ti' uudenguentsuyu, timi. ¹⁵Tsenmalaren juntsa pemu mangujpa' chudi' mabandundami. Tsejtu Jesú ya' amanu mangumi.

¹⁶Tsanguíñu dekatatu kumuinchí chachilla dejeetya', Dios yuj urave, ti' papatitu entsandila: Main laachi pude, Dios'a' mitya pamu ruku jañuve, tiitila, tsenmin entsa bain tsa tsandila: Dios ya' chachillanu la'kanu jañuve, tiitila.

¹⁷Tsenñu kumuinchi Judea tu' chulla bain, naa juntsa keetala chulla bain Jesús naakeñuba demijaila.

Juan Mungaamu' era chachilla Jesús' junga jila.
(Mateo 11.2-19)

¹⁸Juan Mungaamu ya' disipulula yanu dekuindakiñu kumuinchi juntsa demijami. Tsejtu Juan, yachi pai disipululanuya mikatu ¹⁹Bale Ruku Jesús' junga pake'meenu eemi: ¿Ñaa uwain engu Jainuushu juntsayu? ¿Kayu vee rukunu janu keenanu dejuwa? ti' pake'meenu.

²⁰Tsenñu Juanchi eramula Jesúsnu kalen jitu tsandila: Juan Mungaamu lalanu ñunu pake'meenu eeve, ñu uwain entsa tusha Jainuushu juntsa jañuba mijanu, naa kayu veranu keenanuu juñu bain mijanu, ti' pake'meenu eeve, tila.

²¹Tsenñu juntsa uranuren yala dejíñu, chachilla tichi tichi dilu deeñuba ura' demandiremi, naa mantsa firu' bu'chulla pudeju' taaju' ken chumulanu bain, naa kapuka katatyula pure' jiimulanu bain ura' demandiremi. ²²Tsejtu pake'meenu jimulanu Jesús tsandimi: Miitu Juannu ñulla naake kata' bain, naake mere' bain, tsandi kuinda manjidei: naa kapuka putyula bain katamu detiyave, naa ura' netyula bain ura' demandiyave, naa manbityu bishpeechi dilula bain ura' demandiyave, naa pungui merajtula bain meemu detiyave, naa pemula bain demangujve, tsenmin lastemaa chumulanu bain Diosa' mika ura kuinda mijakaandetsuve. ²³Tsenmin mun iya tsa tsanguiñu kataataake'ba in mitya kundaa tyatyu' bain, juntsaya Dioschi ura' imuve, timi.

Jesús, Juan Mungaamu muñuba kuinda kemi.

²⁴Juan' mitya kuinda kenu eramu chachilla demiiñu, Jesús Juannu laapu' pa' chachillanu kuinda ketu tsandimi: ¿Nulla tiba den chutyuin tenasha jitu ti katanaa dejiyu? ¿Ñañi ishuwachi balla' juya juyaintsu katanaa dejii? ²⁵Tsa jutyushu juntsaa, ¿tyee katanu dejiyu? ¿Ma ruku balenchi jali panaanu katanaa dejii? Nulla mideeve balenchi jali panaalaya tiba ura' dechu', reila' yatalaa chumu deeñu bain. ²⁶Tsaaya, ¿tyee katanaa dejiyu? ¿Diosa' mitya pamu ma rukunu katanaa dejii? Tsaave, uwain tsa deive, Diosa' mitya pamu rukunu katanaa dejive, tsangues nemu rukuutalaa kayu pullaa jumunu. ²⁷Matyu Juannu laapu' pataa Diosa' Kiikanu entsa pillave: *In mitya wainmu rukunu main ñu' ajkesha erentsuyu, tsenmalaa ñu tyeengues nenuñuba tsanguenu peepu' tsuunutsu,*ⁱ *ti' pillave.* ²⁸Uwaindiyu naaju chachillaba Juannu kayu pullaa dejutyuve, tsaaren Diosnu yala' rei juu tanamulachiya kayu balejtu ruku juuñuulaa Juannu pulla deeve, timi Jesús.

²⁹Naajula bain Juan pañu meenamulaya, naa deechu' mitya lushi kamula bain Dios uwain ura' kemuve tyatu, Juanchi demungarave. ³⁰Tsaaren fariseola bain, naa Moisés' wandy lei mashturula bain, juntsalaya Juanchi mungarai'la, yalaya Dios yalanu naake uraa kenu tyañu bain tsanguekuti'tu.

³¹Tsejtu Jesús tsandimi: ¿Challa chumu chachillanu tibaa laapu' panu juwa? ³²Matyu cha' den neneindala kaila dewa'di' aikendu yaitala entsandi papatimu juuñu deeve: Naa pujkuna depakaañuba, ñulla beela dekityuwa; naa llaki beesa dekiñu bain, ñullaa dewaatyuwa, timu kaila juuñu deeve. ³³Matyu ñullaya Juan Mungaamu ja' nendu Diosnu pensangue' panda fityu junmala, naa binu bain kushtyu junmala, ñullaya: Entsa ruku dyabulu puu rukuve, timu deeve. ³⁴Tsenmala umaa Chachi Tiya' Nakayamu ja', veelaa Diosnu pensangue' panda fityu juju deeñuba, yaa panda fimin, naa binu bain kujchimu junmala: Entsa rukuya panda janbeendu, vin ruku, matyu romano uñichi deechu' mitya lushi kamulaba ura' kera ruku, tsenmin ujcha lan chachillaba bulu nemuve, timu deeve ñulla. ³⁵Tsaaren titi i' pullantsuñuba juntsanu keetaa, naa Diosya tsamantsa aseetaju' keewara juñuba aseeta imuve, timi.

Jesús ma shinbunu ya' ujcha manbitsaami.

³⁶Ma fariseo ruku, Jesúsba bulu panda finu ti' mikami. Tsenñu Jesús yasha vitu, tsanguemu deeñu, kelu' tsudimi panda finu. ³⁷Tsenñu juntsa pebulunu na'baasa palaa pakaren chumu shinbu, Jesús fariseo' yasha panda finu viñu mijatu, juntsa shinbu ma alabastru lemetanu pindyupi puu tajimi. ³⁸Tsejtu yasha vitu, Jesús' neepa kelunu uidi' warentsu ya' kali pajtya' Jesús' neepanu ajkiñu, bene ya' achuwachi tene demanguijistikemi, tsejtu ya' neepanu estitu pindyupi mungui munguikemi. ³⁹Tsenñu Jesúsnu mikamu fariseo chachi, tsanguiñu katatu maali entsangue pensanguemi: "Uwain entsa ruku Diosa' mitya pamu jutuya, naaju shinbaa yanu tsangue' ta'kantsuñuba mijachuve, naa juntsa shinbuya na'baasa palaa pakaren chumuñuba", tyami.

⁴⁰Tsenñu Jesús fariseo rukunu tsandimi: Simón, ñuba jayu kuinda kenu tenve, timi.

Tsenñu Simón pakatu: Mashturu, ti pandenñuba pade; meenanu tsuyu, timi.

⁴¹Tsenñu Jesús tsandimi: Mangunu ti' lushi depa'ñu kuwa kuwakemu rukunu pai ruku lushi neenala. Mainya 500 paki lushi neenami, tsenmala kamainya 50 paki lushi neenami. ⁴²Tsaaren neenamula manbaanguenu dejui'ñu, juntsa pai rukulanu mangan jutyu shuwami. Tsa' mitya, Simón, ¿ñaa, naa tinu juyu? Entsa pai rukula yalanu lushi mangan jutyu shuwáñu, ¿naajaa kayu yanu estyanu jun? timi.

⁴³Tsenñu Simón pakatu tsandimi: Inchiya, naaju rukaa lushi kayu aa neena'ba, juntsaa kayu estyanu juve, timi.

Tsenñu Jesús tsandimi: Ura' pave, timi.

⁴⁴Tsanditu Jesús juntsa shinbunu keetu, Simónnu tsandimi: Simón, ¿entsa shinbunu katayu? Iya naa ñu' yasha vijañu bain, ñuya in neepa manbitsaanu pi kuwaitindyuñuba, entsa shinbuya in neepanu ya' kapichi tene pitsale' ya' achuwachi demanguijve. ⁴⁵Tsenmin ñuya inu ura' jave tya' estindyuñuba, entsa shinbuya iya vijañu estimin, chaiba in neepanu estintsuve. ⁴⁶Tsenmin ñuya inu ura' jave tya', naa in mishpukasha bain muli munguindyuñuba entsa shinbuya ya' pindyupichi tene in neepanu munguive. ⁴⁷Tsa' myta ñunu entsandintsuyu: Ya naa pure' ujcha laimu shinbu ju' bain, ya' pure' ujcha jumula demanbitsala' mytyaa inu mika estyave, tsaaren jayu ujcha' mytya manbitsalaimu chachillaya jayun estyaimu deeve, timi.

⁴⁸Tsejtu juntsa shinbunu tsandimi: Ñu' ujcha' mytya manbitsalave, timi.

⁴⁹Tsenñu veela junu bulu puve'nu mikayamula bain yala' pensasha entsandyala: "¿Naaju rukutundin naa ujcha jumula bain manbitsalave timi?" tyala.

⁵⁰Tsenñu Jesús juntsa shinbunu kayu pa' jindu tsandimi: Uwain ñu tsainu tsuve tya' kerangue' mytyaa ura' mandive; tiba bulla jutyu ura' miide, timi.

Jesúsnu kivetes nemu shinbula

8 ¹Bene Jesús naaju pebulatalaba, naa aa pebulatala bain, naa kaa pebulatala bain Diosnu rei juu tananu mika ura kuinda mijakares nentsumi. Tsenñu 12 rukula ya' mytya kuinda kes nenu eramula bain Jesús' bendaa nentsula. ²Tsenñu mantsa shinbula firu' bu'chulla me-e'laramula bain, naa dilu nenduren ura' mandimula bain Jesúsba bulu nentsula. Juntsa shinbula: mainya María, kama mumu Magdalena tinu shinbu mandishpai dyabulu me-e'laramu bain, ³naa Herodeschi tiba tañu jumula keena' washken chumu Cuza' shinbu Juana bain, naa Susana bain, naa kayu vee shinbula bain Jesúsba bulu nentsula. Tsejtu yala ti tanenduba Jesúsnu bain, ya' 12 chachillanu bain kuwakila.

Ñi waakemu ruku

(Mateo 13.1-23; Marcos 4.1-20)

⁴Pure' chachi pebulatala chumula Jesús' junga ji' meenala. Tsejtu pure' chachi jideiñu, Jesús ma kuinda laapu' patu tsandimi: ⁵Ma ruku ñi waakenu jimi. Tsejtu ñi waakiñu mantsa ñiya miñutala pajmi. Tsenñu chachilla yuj tere' neila, tsenmala naa pishkula bain paja' defikila.

⁶Tsenmala mantsa ñiya shupu' tsundala pajmi. Tsejtu jeke deshu'ke' awaturen jundala tu aa tsutyuñu' mytya, pi ura' kushkai'tu ma ejkeila.

⁷Tsenmala mantsa ñiya puchi chundalaa pajmi, tsenñu puchi bulu de-awalan juntsa kiyalanu depijtek' ura' awakaatyula. ⁸Tsenmala mantsa ñiya ura' tunu pajmi. Tsejtu shu'ke' awa' papa ila, mantsalaya ma kuyamee

100 ñi kuwakena' bain tsa tsaila. Tsejtu Jesús tsandi kuinda ke' panduren daran patu tsandimi: ¡Mun pungui pu'ba meedi' aseetanguidei! timi.

⁹Tsenñu ya' disipulula Jesúsnu pake'meetu tsandila: ¿Ñu lalanu challa aantsandi' laapu' kuindajuu ketu, tyee aseetanguikaanu kitaa tsandiyu? tila.

¹⁰Ya' disipulula tsa detiñu, Jesús tsandimi: Diosnu rei juu tananu deeñu tyee ju' pantsunañuu juñu bain ñullanuya dekeewaakive, tsaaren veelanuya laapu' kuinda juuchi tene mijakarave, *tsenmalaa naa keena' bain katai'nudetsu, naa meena' bain aseetangui'nudetsu,*^j timi.

Ñi walalu laapu' patu tyee mijakarañu bain

(Mateo 13.18-23; Marcos 4.13-20)

¹¹Iya ñullanu laapu' kuinda juu kikeeshu juntsa entsanditundiyu: Ñi juushu juntsaya Diosa' kuinda juuñuuve.

¹²Mantsa ñi miñtala pajtya deive tyeeshu juntsaya, chachilla Diosa' palaa meeñuren, bene Dyabulu jamin tenbukasha juntsa ñi wajkaañuu jumu kuindanu demanbashwaakenmala, Diosnu keranguityu demandiya', naa livee i bain in jutyuu mandiyamula juuñu deeve.

¹³Tsenmala mantsa ñi shupu' tsundala pajtyaive tyeeshu juntsaya, chachilla Diosa' kuinda mika sunden meedi' nenduren, ura' dera' keenguinu jutyumin, wajtunuren keengueno yuj taaju' faanmalaren, Diosa' kuinda manbashiimula juuñu deeve.

¹⁴Tsenmala mantsa ñi puchi chundala pajtya deive tyeeshu juntsaya, chachilla Diosa' mika ura kuinda meeturen, titalaba aa pensaa deju'kera, lushi laanun pensaa deju'kera, naa-iñaa ura' chukeechunga pensa tene aa ken chumiya, Diosa' palaanuya tsaa manbashinchi iimulaa juntsaañu deeve. Tsaju' awatyu' puka ityu chi juuñu deeve.

¹⁵Tsenmala mantsa ñi ura tunu pajtyaive tyeeshu juntsalaya, chachilla Diosa' palaa mere' ura' deechu' pensangue', naa-uwanuba manbashtyu' Dioschi tiba ajkesha ke' jimula juuñu deeve. Tsaju' yalaya naa chi ju'ba bene puka pure' iiñuu imula deeve, timi.

Tyee pantsunañuu ju'ba katawanu tsuve.

(Marcos 4.21-25)

¹⁶Mu bain lanpara chakaatu, shulla pandainsha pukityu deeve, tsanguityu'ba, tsunjuu pandainsha chakare' chungaatyu deeve. Lanpaa chakaamiya kai'tala dejtelanu teeka' chungaamu deeve, tsenmalaa mun yasha viñu bain danguenutsu. ¹⁷Tsaren ju', tyee pantsunañuna' bain naa-uwanuba katawan jutyuuya jutyuve, tsenmin tyee challa maalin miiyu tenna jumula bain bene mijakaan jutyuuya dejutyuve, bene kumuinchu narai mijanu detsuve. ¹⁸Tsa' mitya tejan meedidei. Naajulaa aa detañuba

yalanuya kayu aa manguwanu tsuve, tsaaren tajtulanuya naa ka jayun tadeeñuba juntsala bain demachipainu detsuve, timi Jesús.

Jesúschi ura ya' bulula
(Mateo 12.46-50; Marcos 3.31-35)

¹⁹Jesús' puinsha ya' ama bain, ya' naatalala bain jila, tsaaren chachi pure denañu' mitya, naake' kalen jin tsaala. ²⁰Tsenñu ma ruku Jesúsnu kuinda kiitu tsandimi: Ñu' ama bain, ñu' naatalala bain avindala putu ñunu katanu detyave, timi.

²¹Tsenñu Jesús tsandimi: Naajulaa Diosa' kuinda mere' juntsanguemu deju' bain, juntsalaa in ama deeve, tsenmin in naatalala deeve, timi Jesús.

Jesús ishuwanu bain, pisundanu mandyawaami.
(Mateo 8.23-27; Marcos 4.35-41)

²²Ma malu Jesús ya' disipululaba baakusha vitu bejkusha tyakanu ti' lu'jila.

²³Tsejtu Jesús baakuchi tyakandun, kasandyatu baakusha kasuimi. Tsenñu ya' disipululan juu jindetsu, wajtutalan ishuwa daran juiñu pisunda pure' laimi. Tsenñu ya' disipulula wapanantsula, baakusha pi pure' viintsuñu baivikeenu juve detya' mitya. ²⁴Tsejtu Jesús kasu'tsuñu mandengaajitu tsandila: ¡Mashturu, mashturu, lala ma baiviindetsuyu! tila. Tsenñu Jesús mandenga' kujpatu ishuwanu bain, pisundanu bain mandyasa ti' pañu, ishuwa bain, naa pisunda bain mandyala, tsenñu wajtunun pisunda putyu, nejui mandiyami.

²⁵Jesús tsangue' dyatu, bene ya' disipululanu tsandimi: ¿Nejdeeyu ñulla Diosnu ura' keenguityu jula? timi. Tsenñu ya' disipulula wapan kajuruu keenbashiitu, yaitala veta' veta' tsandila: ¿Entsa naaju rukutunguen? ¡Naa pisundanu bain, naa ishuwanu bain mandyadei tinmala meenguemu jula! tila.

Gerasasha chumunu firu' bu'chulla me-e'laami.
(Mateo 8.28-34; Marcos 5.1-20)

²⁶Tsejtu bene Jesús ya' disipululaba Gerasa tusha tyakala Galilea tu bejkundala. ²⁷Tsa-i' Jesús tusha pajtya' jintsuñu, ma ruku juntsa pebulusha chumu kalen jimi. Juntsa ruku kaspeleren firu' bu'chulla puu' mitya, naa jali bain panajtu, naa yasha bain chutyu ju', ujkun mennanu tujuushan chunamu jumi. ²⁸Tsejtu Jesúsnu katamiren ya' ajuusha telenajil' wayu'kakitu, daran palaachi tsandimi: ¡Jesús, ñu tsamantsa aa kai'sha chumu Diosa' Na! ¿nenña inu bulla kenu jatu iyu? Tsantsaya inu taaju kikaatyuka, timi.

²⁹Tsaaren Dioschi urajtu kuraa tiremu juntsa bu'chulla tsandimiya Jesús malude tiñu' mityaa, tsandimi. Pure' bijee bu'chulla juntsa rukunu des-iwaawaa kemiuwaami. Chachillaya juntsa rukunu ka' jeru chuwachi neepasha bain, tyaapasha bain tele telekila tsangue' tiba firu'

kikaren jutyu ka' tadinu. Tsenñuren juntsa ruku jeru chuwa daa-ee-eekemuwaami. Tsangue' firu' bu'chulla juntsa chachinu maali tiba den chutyuin tenasha nepiware' ee-eekemi.

³⁰Tsenñu Jesús pake'meetu: ¿Ñu, ti mumuyu? timi.

Tsenñu pakatu: Sera mumuyu, timi. Tsandimiya bu'chullala juntsa rukunu pure' videi' mytyaa tsandimi. ³¹Tsejtu juntsa firu' bu'chullala Jesúsnu: Lalanu tsantsaya jelekenuu juwan jurusha putyuka, tila.

³²Tsejtu kujtusha ku'chi purena' panda findetsuñu' mytya, juntsa firu' bu'chullala, ku'chilashaa eepuka, tila Jesúsnu.

Tsenñu Jesús juntsa ku'chilashaa devikaami. ³³Tsenñu juntsa firu' bu'chullala cha' rukunu demalu' miitu, ku'chilanu tene maviila. Tsa deinmalan juntsa ku'chila daran deji', aa kujtusha deyanbu' pisha pajtya' dechukakila.

³⁴Tsenñu ku'chi washkemu rukula ku'chila tsa deiñu katatu, daran miji' pebulusha chullanu bain, jeenbaasha chullanu bain dekuindakikila.

³⁵Tsenñu tsaa dekuindakeñu mijamu chachilla naa-itaa tsaiñuba keenu jila. Tsai' Jesús' puinbi dejitu, bu'chulla me-e'laramu ruku Jesús' neepasha tiba jutyu jali manbanaa chuna dekatajitu, yuj jeetyala. ³⁶Tsenñu naa-itaa juntsa pure' bu'chulla puu ruku ura' mandiyañu bain keenamulaya kuinda kila jamulanu. ³⁷Tsenñu kumuinchí Gerasa tusha chumula tsamantsa dejeetyatu, Jesúsnu junu malu' vee mujtusha miide, tila. Tsenñu Jesús baakunu mavi' miinu nentsuñu, ³⁸juntsa pure' bu'chulla me-ee'laramu ruku Jesúsnu bulu miya' jika timi. Tsenñuren Jesús, miya' jinu pai'tu, ³⁹tsandimi: Ñu' bulula' jungaa miji', ñunu Dios naakeñu bain dekuindakide, timi.

Tsenñu juntsa ruku miitu, pebulu kuraa yanu Jesús tyee keñu bain millandi kuindakes nemi.

Jairo' na'ma bain, main dii shinbu bain

(Mateo 9.18-26; Marcos 5.21-43)

⁴⁰Jesús pusu bejkusha pu' mandyakajiñu chachilla sundyala, yala Jesúsnu maasa tya' dekeena' mytya. ⁴¹Tsenñu ma ruku, ya' mumu Jairo, cha' waku wakudinu yasha bale ruku pumu, Jesús' neepasha telenajitu, ya' yasha miya' jinu pami, ⁴²matyu ya' na'ma 12 aña juuren, tsenmin yachi main juuren, penundiyantsuñu' mytya.

Tsenñu Jesús Jairo' yasha jintsu, pure' chachi jiindu, Jesúsnu tsaa demijcha' tyulikentsula.

⁴³⁻⁴⁴Tsenñu junu ma shinbu asa senduwaraa dilu chuturen 12 aña ma iintsu'ba, ura' malai'mujchi tsaa tsanamu shinbu bain chachilla' kejtsapala putu, Jesús' benesha kalen jitu, ya' jai mutunu ta'kakemi. Tsejtu naa asa senduwaraa ju'ba juntsa uwanun dya'kawaakemi, naamika ura' malanu tya' dilu ura' manmula' junga ji', lushi tsamantsa millangaanduba ura' malai'mujchi chumuren.

⁴⁵Tsenñu Jesús pake'meetu: ¿Maa inu ta'kan? timi.

Tsenñun mu bain, ta'kaindetyuyu, tiidetiñu' mitya, Pedro tsandimi: Mashturu, chachi kelu kelu puredena' mitya, mishketun tsa dekive, timi. ⁴⁶Tsenñu Jesús manbatu: Mallee inu deta'kave; inchi pudee luñuba mijayu, timi.

⁴⁷Tsa-i' mijau, juntsa shinbu naa-i' pantsudin tsaatu, jelanchin dejullukendu Jesús' junga ji! ya' ajuusha teledimi. Tsejtu ya nenñaas Jesúsnu ta'ka'b'a cha' kejtsapalaren millandi kuinda kemi, tsenmin ta'katu naa-i' juntsa uwanun ura' mandiya' bain tsandi dekuindakemi.

⁴⁸Tsenñu Jesús tsandimi: Kaa na'ma, uwain ñu tsainu tsuve ty'a' kerangue' mityaa ura' mandiyave; tiba bulla jutyu ura' miide, timi Jesús.

⁴⁹Tsejtu Jesús kayu tsandi' pantsuren, main Jairo' yasha chumu jit, Jaironu tsandimi: Ñu' na'ma yumaa peyave; mashturunu bulla ki'ñu urave, timi.

⁵⁰Tsenñu Jesús meetu tsandimi: Jeetyatyude, inu uwain tsanguenu juve ty'a' keranguide, tsemala ñu' na'ma mantsatinu tsuve, timi Jesús.

⁵¹Tsa-i' yasha dejitu, veelanuya ya juusha mikatyumujchi, Pedronu bain, Juannu bain, Santiagonu bain, pemu' apanu bain, ya' amanu bain mikakemi. ⁵²Tsenñu kumuinchu ware' vishkiindintsula juntsa na'ma peyañu' mitya. Tsenñu Jesús yalanu tsandimi: Waatyudei, juntsa na'ma peyaindyuve, kasu'tsuturen tsanave, timi Jesús.

⁵³Jesús tsandiñu veela demeetu ne uukapundila, yalaau uwain peyañuba mide' mitya.

⁵⁴Tsenñuren Jesús ya' tyaapachi juntsa kaa na'ma' tyaapanu kake', daran patu tsandimi: Kaa na'ma, ¡mangujpade! timi.

⁵⁵Tsandinmalan juntsa uwanu aama maviñu jei mangujpami, tsenñu Jesús: Panda mafikaadei, timi.

⁵⁶Juntsaiñu ya' apala yuj keenbaishla, tsenñu Jesús yalanu patu tyee iñu bain veelanu kuinda kityudei, timi.

Jesús ya' 12 disipulula tyee kenu deeñuba wandi' eemi.

(Mateo 10.5-15; Marcos 6.7-13)

9 ¹Jesús ya' 12 disipululanu dewa'kaatu, naaju dyabululanuba me-e'laanuu bain, naa dilulanu ura' mandirenuu bain tiremi. ²Tsejtu Jesús, Diosnu rei juu tananu kuinda mijakaanu bain, tsenmin naa dilulanu bain ura' demandires nenu eemi. ³Tsejtu tsandimi: Miñutala menestenguikuenu tiba ta'tyudei, naa tyutyan cha'li juu bain, naa jali punu buusa juu bain, naa panda juula bain, naa lushi juula bain, tsenmin naa vera manbannu jali juula bain ta'tyudei. ⁴Tsenmin nunbatza yanu dejil' tsu' bain vee mujtu pebulusha malu' miji'mujchiya junun tsanadei. ⁵Tsenmala naaju pebulunu demikai'ñu bain, juntsa pebulunu malu' miindu neepasha ujtupe mangasha'pudei, tsanguetaa yalanu Dioschi urajtu chachi dekure' taaju inu detsuve ti' keewaanu, timi.

⁶Tsenñu yala dejitu pebulu kuraa Diosa' mika ura kuinda mijakares ne', naa dilulanu bain ura' mandires neneila.

Maa Jesúsñuba Herodes ura' aseetanguityumi.
(Mateo 14.1-12; Marcos 6.14-29)

⁷Galilea uñi Herodes, Jesús naa naakentsuñu bain meemeekemi. Tsaaren maa tsangues nentsuñu bain naake' ura' aseetanguen tsaami, matyu mantsalaya: Juan Mungaamu pemuren mangujpañuve detinmala; ⁸mantsalaya: Dios'a' myta pamu ruku Elásyaa mangatawañuve, tiidetinmala, kayu veelaya: Kaspee tinbunu Dios'a' myta pamu ruku mangujpa'ba imeete, tiidetiñu' myta. ⁹Tsejtu Herodes tsandyami: "Iyaren Juannu mishpuka daapukare' tu'kaawaasuba, ¿tsen, entsa naaju rukuña entsaa kuinda meeja meejaitu-in?" tyami.

Tsa' myta Herodes Jesúsnu katanu tyatyaimi.

5.000 pullaa chachillanu Jesús panda fikaami.
(Mateo 14.13-21; Marcos 6.30-44; Juan 6.1-15)

¹⁰Jesús' myta kuinda kenu lara' eramu rukula dene' miitu, yala naa naake' demiji' bain Jesúsnu kuinda kila. Tsenñu Jesús yaiban juu Betsaida pebulu jinu miñuu jimi. ¹¹Tsenñuren chachilla demijatu Jesús' bendaajila. Tsenñu Jesús ura' tya' mikatu, Diosnu rei juu tananu kuinda mijakaami, tsenmin dilulanu bain ura' demandiremi.

¹²Tsanguentsuren yumaa dekepentsuñu, ya' ¹³disipulula Jesúsnu ji' patu tsandila: Engu tiba den chutynu tenasha depu' myta, chachillanu deme-eede, tsenmala kalen chunu kaa pebulutala dej'i, ya depake' tsudi' panda demi'ke' ka' finudetsu, tila.

¹³Tsenñu Jesús tsandimi: Nullaa yalanu panda kuwadei, timi.

Tsenñu yala tsandila: Tsaaren panda aa detanatyuyu, man paki pan ju', alla bain pallu juuve, tsaañu' myta kayu ati'kaji'shu juntsaa, entsa pure' chachillachi naaken tsaanu juve, tila.

¹⁴Tsaaren unbee rukulan juuren 5.000 chachillaa ma juula. Tsenñu Jesús ya' disipululanu: 50 chachimee buungare' chujtikidei, timi.

¹⁵Tsenñu ya' disipulula juntsangue', kumuinchchi chachillanu manchungaka juuñungue chujtila. ¹⁶Tsenñu Jesús juntsa man paki pan bain, pai alla bain katu, selusha ke'laadi', panda' myta Diosnu yuj urave ti' dyatu, pan dedale', ya' disipululanu kuwami, tsenmalaa kumuinchchi chachillanu veenudetsu. ¹⁷Tsenñu kumuinchchi chachilla panda tyubanbera defiñu, laramu mande'kakitun, 12 kubi jungue mande'kala.

Pedro: Jesúsya Dioschi Mi'ke' Kayamuve, timi.
(Mateo 16.13-19; Marcos 8.27-29)

¹⁸Ma malu Jesús ya' disipululaban juu jitü, Diosba kuinda kentsumi. Tsejtu ya' disipululanu pake'meetu tsandimi: ¿Chachillaya inu, muve tiidetin? timi.

¹⁹Tsenñu pakatu tsandila: Mantsalaya ñunu Juan Mungaamuve tiidetive; tsenmala veelaya ñu Elásve tiidetive; tsenmala kayu veelaya

ñnu, yumaa tinbunu Diosa' myta pamu ruku mangujñuve tiidetive, tila.
 20 Tsenñu Jesús yalanu manbake'meetu tsandimi: ¡Tsen, ñnullaa inu muve detiyu? timi.

Tsenñu Pedro pakatu: Ñuya Dioschi Mi'ke! Kayamuve, timi.

Jesús peyanu ju'ba wainmi.
(Mateo 16.20-28; Marcos 8.31—9.1)

21 Tsaaren Jesús tsandimi: Munu bain jaiba entsa kuinda kityudei, timi.
 22 Tsejtu tsandimi: Chachi Tiya! Nakayamuya pure' taaju i' pullainu tsuve. Matyu bale rukulachi bain, naa chachilla' myta Diosnu kelen jimula' bale rukulachi bain, naa Moisés' wandya lei mashturulachi bain mutyan kerai'nu tsuve. Tsejtu tu'nu dejuve, tsaaren pen malu insha mangujtanu tsuve, timi.

Naa-itaa Jesúsnu bendaan jinuuñu bain

23 Bene Jesús kumuinchí chachillanu patu tsandimi: Mun in bendaan janu tenñuba maali balenguutyu!, in myta tutainuu juu, tu'vinu kuusa nanakiñungue!, malumere in bendaan janu dejuve. 24 Matyu mun ya' chungamaya maali balengurenu tyashu juntsaa uwain naa-uwanuba tsana chuntsumi katan jutyuve; tsaaren in mytan ya' chungama maali balenguutyushu juntsaa naa-uwanuba tsana chuntsumi katanu tsuve. 25 Matyu ¡tyee balenu jun, mu bain entsa tusha tiba detaditun, naa-uwanuba tsananu jutyuushu juntsaa? 26 Mun in myta bain, naa in kuinda' myta bain deyujtyashu juntsaa, Chachi Tiya! Nakayamu bain ya' myta yujtyanu tsuve, ya' Apa tsaa, rei juu tsamantsaa, Dioschin juu anjeelaba pi'juruu maatu. 27 Uwaindiyu mantsa enu pumu chachilla Diosnu rei juu tiyantsu katai'mujchiya peyan dejutyuve, timi.

Jesús vera' lai' katawami.
(Mateo 17.1-8; Marcos 9.2-8)

28 Tsandi' puitu bene mandishpen malutala Jesús bui'sha lumi Diosba kuinda kenu; tsejtu Pedronu bain, Juannu bain, Santiagonu bain miya' lumi. 29 Tsa-i' Jesús Diosba kuinda kentsuren ya' kajuru vera' tiya-i', ya' jaliya defibaba' la-i' pi'jurumi. 30 Tsenñu pai ruku Jesúsba kuinda kendu' katawala. Juntsala tinbunu chumu rukula Moisés bain, Elías bain juula. 31 Tsejtu yala' kelu kelu pi'juruu uinatu Jesús Jerusalémbi peya' selusha miinu juve, ti' pantsula. 32 Tsenñu Pedro yaba bulu nemulaba, naa tsamantsa kasundyantsu' bain keenala, tsejtu Dioschi tsamantsaa keewara jumu bain dekata', naa juntsa pai ruku Jesúsba bulu uinamulanu bain katala. 33 Tsejtu juntsa rukula Jesúsnu baka' mijindetsuñu, Pedro, Jesúsnu tsandimi: Mashturu, lala enu yuj ura' pukeeñuve. ¡Tsa! myta pen kaa yapaya kenu detsuyu! ¡Ñuchi main, Moiséschi main, Elíaschi bain main! timi Pedro. Tsaaren Pedro juntsa uranu tyee

panduba mijturen ne tsandintsumi. ³⁴Tsejtu Pedro tsandi' kayu pantsuren yalanu ma ñivijcha ja' dishukeñu, ñivijchasha putu yuj jeetyala. ³⁵Tsenñu juntsa ñivijcha juusha entsandiñu meejamia: Entsaa in mi'ke' kañu Nave. Yanu meedidei, timi.

³⁶Tsenñu juntsandi pañu demeenmalaren bene Jesús maali uyuna' ne mangatawaimi.

Juntsai' puiñu dekata' bain, juntsa tinbutala munu bain tsaa kuinda ki'la.

Jesús firu' bu'chulla puu kaananu ura' mandiremi.

(Mateo 17.14-21; Marcos 9.14-29)

³⁷Juntsa ayunchi Jesús pen disipululaba bui'sha pu' kujtusha demaviñu, pure' chachilla Jesús' junga jiila. ³⁸Tsenñu cha' kejtsapala ma ruku daran patu tsandimi: Rukui, tsantsaya in nanu tenbi keede, inchi entsan na main juuve. ³⁹Tsaanuren ma firu' bu'chulla pu' yanu tituba kikaakaakeñu des-i' vishkiikiindi' fi'pakisha chinbijpu laalaakive. Tsaju' yanu firu' ketu mandyaiken dyatyu jujuuve. ⁴⁰Tsenñu iya ñu' disipululanu tsantsaya me-e'laakaanu pa'ñuren, naake' me-e'laren tsa deeve, timi.

⁴¹Tsenñu Jesús pakatu: Keranguityu chachilla, ñulla firu' chachilla, ¿naama jina ñuiba tsana' puulan chunijtuwa? Ñu' kaananu in junga taade, timi.

⁴²Tsenñu juntsa kaana Jesús' junga kalen jintsuñu, dyabulu tusha tsunere' desmee ma-iwaakemi. Tsenñu Dioschi urajtu kuraa tiremu bu'chullanu Jesús nepa', juntsa kaananu ura' mandiwaatu, ya' apanu mangumi. ⁴³Tsenñu kumuinchi chachilla keenbashiila Dios tsamantsa pude' uukeraa keñu' mitya.

Jesús peyanu ju'ba mawainmi.

(Mateo 17.22-23; Marcos 9.30-32)

Tsejtu Jesús tyee kikeñu bain chachilla keenbashiindetsuren, Jesús ya' disipululanu tsandimi: ⁴⁴Entsa kuinda ura' meedi' manbashtyudei: Chachi Tiya' Nakayamuya firu' kemu chachilla' tyaapasha kuwanu tsuve, timi.

⁴⁵Tsaaren Jesús naati' tsandiñuba ya' disipulula aseetanguityu jujuula, yalanu chaiba Dios ura' aseetanguenu kikarendyuñu' mitya, tsenmin Jesús naati' tsandiñu bain ura' manbake'meenu jeetya jeetylaila.

¿Maa kayu bale juñanga?

(Mateo 18.1-6; Marcos 9.33-37)

⁴⁶Tsenñu ya' disipulula veta' veta' pake'meela maa yaitala kayu bale ruku juñanga titu.

⁴⁷Tsenñu yala naake pensanguendetsuñuba Jesús mijatu, ma kaananu kake', ya' keesha taditu ⁴⁸tsandimi: Mun in mityan entsa kaana juuñulanu mikake' bain, inu mikakeñunguentsuve, tsenmala mun inu mikä' bain inu eemunu bain mikakeñunguentsuve. Tsa' mitya ñuitala maa kayu balejtu juuñuu ju'ba, juntsaa kayu aa bale juve, timi.

Kundaa kityulaya laaba buunamu deeve.
(Marcos 9.38-41)

⁴⁹Tsenñu Juan tsandimi: Mashturu, lalaya ma ruku, ñu' mitya ti' dyabulu me-e'lalaakentsu dekatayu, tsaaren laaba bulu nemu jutyuñu' mitya: Tsa manyude, ti' depayu, timi.

⁵⁰Tsenñu Jesús tsandimi: Tsangues netyude tityudei, naajulaba ñullanu kundaa kityulaya ñuiba buunataa tsaanu dejuve, timi.

**Jesúsnu, ya' disipululaba
 Samaria' chulla mikandyai'la.**

⁵¹Jesús tusha pu', kai'sha mamikalaranu ura kalen jantsuñu, Jerusalénsha jinbera inu pensangue' jintsumi. ⁵²Tsejtu ya' mitya kuinda kemulanu ajkesha mallee eemi ya pake' dekeenasa tyatu. Tsenñu Samaria tusha dejitu ma kaa pebulunu jila. ⁵³Tsenñuren Samaria' chullaya ya kuwai'la, Jesús Jerusalénshaa jintsuñuba demija' mitya. ⁵⁴Tsenñu ya' disipulula Santiago bain, Juan bain mijatu, tsandila: Bale Ruku, ¿juntsa chachillanu de-ikakaanu selusha ñi pajasa tinu dejعوا? tila.

⁵⁵Tsenñu Jesús yalanu malu'te' keetu, daran nepami.

⁵⁶Tsejtu junu dapuitu vee kaa pebulushaa miila.

Jesúsnu bendaan jinu naaju taajuñu bain
(Mateo 8.19-22)

⁵⁷Tsejtu Jesús ya' disipululaba miñusha jindetsuñu, ma ruku Jesúsnu tsandimi: Ñu nuka jijiiñuba inu bain jinu tenve, timi.

⁵⁸Tsenñu Jesús pakatu: Naa jeengucha juula bain yaichi vi' tsutsudinu tuuju tadeeve, naa pishku juula bain yaichi yatape tadeeve, tsaanuren Chachi Tiya' Nakayamuya naa nuka bain mishpuka llai'kare' tsuunuba ma tajtuuve, timi.

⁵⁹Tsejtu Jesús kama rukunu tsandimi: In bendaan jade, timi.

Tsenñu juntsa ruku tsandimi: Rukui, tsaashu juntsaa, in apanu ajke' menjinu tsuyu, timi.

⁶⁰Tsenñu Jesús pakatu tsandimi: Inu keranguityu chachillaya yumaa peyaiñuu dechu' mitya, yaitala demensa, tsaaren ñuya jatu, Diosnu rei juu tananu mika ura kuinda mijakares nede, timi.

⁶¹Tsenñu kama ruku tsandimi: Rukui, ñu' bendaan nenu tsuyu, tsaaren in yasha chumulanan ajke' wainji' shuikitaa janu tsuyu, timi.

⁶²Tsenñu Jesús tsandimi: Taawashke' tu junle' jindu naa-intsuñanga tya' benesha mangueekemua chachillaya Diosnu yala' rei juu tananu dejutyuve, timi.

72 rukulanu lare' eemi.

10 ¹Tsejtu bene Bale Ruku veelanu bain 72^k ruku mi'ke' katu, ya' ajkesha pallu pallu de-eemi, ya nuka nuka jiinuu juwaaju' bain. ²Tsejtu Jesús laapu' patu yalanu tsandimi: Uwaindiyu finu puka imuya pureeve, tsaaren te'kamulaya jayun judeeve. Tsa' mitya ñnulla entsa pu' vijtya miya rukunu pa', te'kamu chachilla eede ti', pa'dei. ³Nulla jidei, tsaaren ura' meedidei: ñnulla uvejaaba dejuñu jeengucha kejtsapala eren tsanguentsuyu. ⁴Nulla naa lushi bain, naa tyeeba pu' tajinu buusa juu bain, naa sandalia juu bain yapa ta'tyudei. Tsenmin naa miñutala chachi kataake' bain uidika' kuinda kityudei. ⁵Tsenmin naaju yanu ji' vi-i' bain, entsa yanu chumulanu tiba bulla jutyu ura' dechusa tenve, ti' ajke' padei. ⁶Tsenmala juntsa yanu mallee tiba bulla jutyu ura' chunu tyamula dechushu juntsaa, ñnulla yalanu tsa detinmala, uwain tsa-inu tsuve. Tsaaren ura' chutyu deeshu juntsaa, naa tsaityuñu bain ñuichiya nejuunu tsuve. ⁷Tsenmin juntsa yanun tsana' yala ti dekuñu bain, naa ti kushnu dekuñu bain tsanguen chudei. Matyu naaju taawasha kemu chachilla bain yala' taawasha' mitya lushi kanuu junu dejuve. Tsaju' yameemee netyudei. ⁸Nulla nutsa pebulatala devijiñu, ñnullanu demika' tyeeba dekuñu bain fidei. ⁹Tsenmin junu dilu tsumulanuya ura' mandiredei, tsejtu: Diosnu rei juu tananu malu yumaa kalen jave, ti' waindei. ¹⁰Tsaaren nutsa pebulunaa demikai'ñu bain, cha' neneinu miñusha fale' maandu entsandidei: ¹¹Naa ñnulla' pebulu ujtupe lala' neepasha demai'diñu bain demangasha'pu' shuikendetsuyu, ñnulla naa kuipa deeñuba tsangue keewaandu. Tsaaren ñnullanu wainnu tsuyu, naa Diosnu rei juu tananu malu yumaa kalen jañu bain, tidei. ¹²Uwaindiyu, Dioschi kavitu dekenu malunu juntsa pebulu' chullaa kayu Sodoma' chullanuba pullake taaju ke' puinu detsuve, timi Jesús.

Meenguityu chachillanu ajaa timi.

(Mateo 11.20-24)

¹³¡Corazínnu chumu chachilla bain, Betsaidanu chumu chachilla bain! Ñulla mika taaju i' puinu detsuve. Matyu tiba tsamantsaa ke' keewara jumula, judío chachi jutyula' chunu Tiro pebulunu bain, Sidón pebulunu bain deke' keewaañuya, yalaya kaspeleren veta' pensa mangue' Diosnu demeengue', llakingue' keewaanu paba jali depana' chu', naa ju'pe juula bain mishusha detsure'banguichu deeve. ¹⁴Tsa' mitya kavitu dekenu malunu Sidónnu chulla bain, naa Tironu chulla bain ñnulla naake taaju kenuu dejuñuba tsangue taaju kenu dejutyuve. ¹⁵Tsenmala ñnulla Cafarnaúm' chullaya, ¿selusha e'laraichu deeyu pensa

^k 10.1 72 tityumujchi, mantsa yumaa kiikalanuya entsa pillave: 70.

dejuu? Tsa jutyuve, ñullaya pemula' pupunanu tena aa tujuushaa kevinu detsuve.

¹⁶Mun ñullanu meedi' bain, inu meediñuu juuve, tsenmin mun ñullanu meenguityu' bain, inu meenguityuñuu juuve. Tsenmala mun inu meenguityu' bain, inu eemunu bain meenguityuñuu juuve, timi.

72 disipulula maala.

¹⁷72¹ disipulula mikä sunden ju demiitu entsa entsandila: Bale Ruku, ñu' myta pañuya, naa dyabulu dej' bain, lala naadekiñu bain tsa tsadeive, tila.

¹⁸Tsenñu Jesús tsandimi: Uwain, iya Satanásnu kai'sha kuidya pi'ke' tusha pajtyan tsaintsu katayu. ¹⁹Iyaa ñullanu naa piñi jandala tere' pulla' bain, naa alagaa jandala tere' pulla' bain, naa tiba dera' firu' kemu kundaalanu bain vingue' pulla', tiba ityumujchi jijiinu tireyu. ²⁰Tsaaren ñullanu firu' bu'chulla meedimu deeve tyä' mytyaa tsamantsa sundyatyudei, matyu ñulla' mumu kai'sha selusha pillave pensa jutaa, kayu sundyadei, timi.

²¹Juntsa uranuren Espíritu Santo Jesúsnu yuj sundyawaanu tsandimi: Apa, selusha chumulachi bain, tusha chumulachi bain Bale Ruku, ñu yuj urave, entsa judeeshu juntsala aseetaju chachillanaa tsaa keewaatyumujchi, ne chachillanaa tsaa keewaañu' myta. Uwain tsaave Apa, ñuren tsaisa tyäuya tsaise, timi.

²²Tsejtu chachillanu tsandimi: Ti bain in Apa in tyäapanu tene dekuwave. Mu bain iya maa juñuba ura' mijdetuve, in Aparen miive. Tsenmin mu bain maa in Apa juñuba ura' mijdetuve, iya ya' Naren miiyu, tsenmala iya naaju chachillanaa in Apanu keemijakaanu bain juntsalaa ura' keemija deeve maa in Apa juñu bain, timi.

²³Tsejtu ya' disipulula' junga mayate' yalanun juu patu tsandimi: Mun ñulla naake katandetsuñuba tsangue katantsumulaya Dioschi ura' imu deeve. ²⁴Uwaindiyu Diosa' myta pamu pure' chachilla bain, pure' reila bain mikä katanu tyaturen katatyuwa deeve ñulla' kataakindetsushu juntsa; tsenmin naamika mera'kera tyä'ba, meetyuwa deeve ñulla merekendetsushu juntsa, timi Jesús.

Samariasha chumu aa ura ruku

²⁵Ma bijee Moisés' wandya lei ma mashtuu ruku Jesúsnu tujle' pakakaanu tyatu, entsandi pake'meemi: Rukui, ¿naa ketaa naa-uwanuba Diosba ura' chunuu tiyanu juwa? timi.

²⁶Tsenñu Jesús pakatu tsandimi: ¿Leinu naaju pillan? ¿Tyee lengue lengue kemuyu? timi.

²⁷Tsenñu Moisés' wandya lei mashtuu ruku pakatu tsandimi: Lei entsandive: Ñu' Bale Ruku Diosnu mikä estyade, ñu' tenbukachi, ñu'

1 10.17 72 tityumujchi, mantsa yumaa kiikalanuya entsa pillave: 70.

aamachi, ñu' derachi, tsenmin ñu' pensachi bain estya', kumuinchí ñu' pudengura estyade,^m tive; tsenmin, ñu maali naa-i estyamu ju'ba ñuba kalen chumu chachinu bain juntsai estyade,ⁿ tive, timi.

²⁸Tsenñu Jesú斯 tsandimi: Ura' pakave. Ñu tsa tsanguemushu juntsaa, uwain naa-awanuba chumu tiyanu tsuve, timi.

²⁹Tsenñu juntsa mashturu ya uwain Dios naakesa tyanuba tsanguen chumu ju'ba juntsaa keewaachi tyatu, Jesú斯nu tsandimi: Tsen, ¿maa, inchi kalen chumu chachi junu jun? timi.

³⁰Tsenñu Jesú斯 pakatu entsandi laapu' kuinda kemi: Ma ruku Jerusalénbi pu' Jericósha jinu miñunu jintsumi, tsainduren taamulachi katawa' taraimi. Tsejtu taamula juntsa rukunu ka', ya' jaliba dechi'ke', debande' ta'ke', desmeengue' mijiila. ³¹Tsenñu ma ruku, chachilla' mitya Diosnu kalen jimuruku, ya bain juntsa miñuu jindu, juntsa rukunu kataturen, masku pasha ne pullaimi. ³²Tsenmala aa eleshasha talave'mu Levínu sera' jimuruku bain junuren ji' kataturen, ya bain masku pasha tsaa ne pullaimi. ³³Tsenñuren main Samaria tusha chumu ruku bain junun pullandu juntsa rukunu kata' tenbitya', kalen jitu, ³⁴yanu dedaa bandenatala ura' deke' binu mungue', ulibu puka muli juula bain demungue', ya' dapetala jali depijte' telekemi. Tsanguetu ya' chudi' jinu animaanu e'lare' chujti', cha' tsutsudinu yasha miya' ji' washkemi. ³⁵Tsejtu Samariasha chumu ruku juntsa ayunchi miindu ya miya rukunu pai malu taawasha ke' kakenuu lushi kuwa' shuiketu tsandimi: Kayu entsa rukunu tiba kenuu junmalaya kide. Tsanguetu kayu pullake kastanguenmalaya, bene maatu mangwanu tsuyu, timi.

³⁶Tsandi' dyatu Jesú斯 manen mashtuu rukunu pake'meetu tsandimi: Ñuchiya juntsa pen rukulanu ¿naajaa juntsa taramu rukunu yachi kalen chumu chachi juuñungue ken? timi.

³⁷Tsenñu Moisés' wandya lei mashtuu ruku tsandimi: Maa tenbitya' ura' ke'ba juntsaa juntsave, timi.

Tsenñu Jesú斯 tsandimi: Tsaaya, ñu bain miji' tsanguiide, timi.

Jesú斯 Marta' junga yaa jimi.

³⁸Jesú斯 ya' disipululaba kayu Jerusalén jinu miñusha jindu ma kaa pebulunu vijila. Tsenñu junu ma shinbu, ya' momu Marta, Jesú斯nu ya' yasha mikami. ³⁹Tsenñu Marta' naatala, ya' momu María, Bale Ruku' neepa keesha chuditu naatintsuñu bain meenami. ⁴⁰Tsenñu Marta yasha tiba pure' kikenuu tanatu, maaliya te' kenu jutyu' naaken tsandyandu, Jesú斯' junga kalen jitu tsandimi: Bale Ruku, ¿ñuchiya tiba jutyuu inu in naatala, iya tiba pure' kenu juunun maali tiwaakeñu? Inu talave'de ti' yanu uudenguide, timi.

⁴¹Tsenñu Bale Ruku pakatu tsandimi: Marta, Marta, ñu tiba dekenuu juturen dekindyu' debullatayaa nentsutaa tsandintsuve. ⁴²Tsaaren mainya

kayu aa kenu meneste deeyu. Tsenñu Maríaa juntsa kayu ura' juu jumunu mi'ke' kañuve, tsenmin juntsanuya mu bain tsanguityude ti' panu dejutyuve, timi.

Diosba kuinda kenu mijakara

(Mateo 6.9-15; 7.7-12)

11 ¹ Ma bijee Jesús manbela jitu, Diosba kuinda kendu deke'
dyañu, ya' disipulu main yanu entsandimi: Rukui, lalanu
bain Diosba kuinda kenu mijakaaka, Juan bain ya' disipululanu naake
mijakaamuñuba juntsaju, timi.

²Tsenñu Jesús tsandimi: Naa-uwanu Diosba kuinda kike'ba, entsandidei:

Apa,
ñuren main juu,
tsamantsa awaa Dios juñuba,
muba demija' tsaa dekeewaasa.
Ñu' chachillachi rei tiyade.

³ Malumere lalanu tiba fikenuu jumu kuwaka.

⁴ Lala' ujcha' myta manbitsaaka,
laa bain lalanu ti urajtu dekiñu bain,
kuipa faawaatintsun jutyu tiyamu deeñu' myta.

Tsenmin lala ujcha lainuu juubillaya tsangaatyuka, tidei, timi.

⁵Tsejtu Jesús entsa bain tsandimi: Tsandenna ñulla mallee ñuichi ura'
keranu chachi miyat, ñu kejtaa kepe ya' yasha ji', juukapasha pali paliketu:
In ura' keranu chachi, inu pen pan neekaaka, ⁶inchi ura' keranu chachi
baasha pu' ja' in yasha jañuren, ti kuwan tsaayu, tinmala, ⁷ya juusha pumu
pakatu: Bulla kityuka, yumaa ya juukapa dellukaave, naa i bain, in kaila
bain yumaa ma tsudenayu. Tsa' myta kujpa' tiba ka' kuwan jutyu keeve
tinu tsuve, timi. ⁸Tsejtu Jesús kayu patu tsandimi: Tsaaren uwaindiyu, yachi
ura' kera chachi juñu' mytyaa tiba kujpa' ka' kun jutyuu ju'ba, matyu yuj
bulu tin uinachuve tyataa, ⁹kujpa' ti mutyañuba dekunu tsuve, timi. ⁹Tsa'
myta entsandi pandundiuy: Diosnu pa'dei, tsenmala Dios kuwanu tsuve;
mi'kidei, mi'kishu juntsaa katanu detsuve; juukapasha pajidei, tsenmala
juukenu detsuve. ¹⁰Matyu mun pa'mulaya kamu deeve; mun mi'kemulaya
katamu deeve; tsenmin juukapasha pajimulanuya juukemu deeve.

¹¹ Tsejtu ñuitalaba ¿naaju apalaa ya' na pi alla pakenmala, piñee kumu
dejun? ¹² ¿Naa napipu pa'ñu bain, alagaaya kumu dejun? ¹³Tsa' myta
ñulla, kayu firu' chachillaaba ñulla' kaillanu tiba uraa kumu deeshu
juntsaa, ¿kayu nejtaa kai'sha chumu ñulla' Apaa ya' Espíritu Santo
kui'chunga yanu pa'mulanuya? timi.

^o 11.8 yuj bullu tin uinachuve tyataa tityumujchi, kuwatyu' yujtyanu juyu tyataa ti'
aseetanguikara bain junu juve.

Jesúsnu, dyabulu uñee tsanguikaantsuve, tila.

(Mateo 12.22-30; Marcos 3.20-27)

¹⁴Ma rukunu dyabulu putu papatyungue tireñu, Jesús juntsa dyabulunu me-e'laami. Tsenñu juntsa ruku pamu tiyami, dyabulu maluñu. Tsenñu chachilla mika keenbashintsula, ¹⁵tsenñuren mantsalaya tsandila: Entsa rukuya, dyabulu uñi Beelzebú tsanguikañaa dyabulu me-e'laalaakive, tila.

¹⁶Tsenmala veelaya, Jesúsnu naake! kuipa pun tsandyatu: Diosyaa tsanguekaantsuve tyainuu jumu main ke' keewaaka, tiitila.

¹⁷Tsenñuren Jesíysa yala ti pensa jutaa tsandindetsuñuba mi' myta tsandimi: Ma reichi uuden juu chumu chachiitalaren kundaa juja'tee ne chudenashu juntsaa, millainu detsuve; tsenmin naaju bulula bain yaitala de-ajaavi' veta' veta' vinguiken dechushu juntsaa millaimu deeve. ¹⁸Tsa' myta Satanás bain maalin develaintsushu juntsaa, ¿naa ketaa ya' chachillanu uudenguen chu' jintsunu junu jun? Entsandimiya ñulla inu Beelzebú, dyabulu uñee entsanguikare' dyabulu me-e'laamuve detiñu' mytaa, tsandiyu. ¹⁹Nullaya inu Beelzebúa dyabulu majuka'laakaantsuve, tiidetive. Tsaaba juñuya, ¿ñulla' bendaa nemulanuya maa dyabulu majuka'laanuu tiremutun? Entsañañu' mytaa naa ñulla tujla deeñuba yalaren entsangue keewaandetsuve. ²⁰Tsaaren inu Diosya tsanguikare' dyabulu majuka'laakaamushu juntsaa, Diosnu rei juu tananu malu yumaa jave ti' keewara jutaa tsaanu tsuve, timi.

²¹Tsejtu Jesús kayu laapu' patu tsandimi: Main dee ruku yachi vinguendu menestenguikenuu jumula detaa uina' ya' yanu washnashu juntsaa, yachi tiba ya' yasha uukara tsuñu chipan jutyuve. ²²Tsaaren main kayu yanu pulla dee ruku ja' vingue' pulla!, naa yachi vinguendu menestenguikenuu jumula detaa uinañuba chi'kemiya, naa buli juula bain ka' deveekenu tsuve.

²³Tsa' myta mun iba buunatyulaya inu kundara deeve; tsenmin mun iba bulu te'kakeñuu kityulaya demasee-eekeñunguindetsu', main main deshajara' jiindetsuve, timi.

Bu'chulla chachinu malu' miitun mavimu

(Mateo 12.43-45)

²⁴Jesús tsandimi: Dioschi urajtu kuraa tiremu bu'chulla ma rukunu malu' miitu ejke tenatala lekanu mi'kes nenduren, katatyu' nuka lekachun tsandyamin pensanguetu: "In mala' maanu yanuren miinu tsuyu", tyamuve. ²⁵Tsa-i' ya' malu' miiñu chachi' junga mijinmala ya juuñuu nara mangasha ju', de-uuna mangatajimuve. ²⁶Tsenmin malu' miji' mandishpai bu'chulla kayu yanu pulla firu' jumulanu tene manga' maja!, juntsa rukunu tsaa millai devinmalaya, kaspele naajuwa ju'ba juntsanu pullai firu' tiyanu tsuve, timi.

Dioschi ura' imu chachilla

²⁷Tsejtu Jesús tsandi' pantsuren ma shinbu cha' kejtsapalaren Jesúsnu uti' patu tsandimi: ¡Ñunu naka' awakaamu shinbuya Dioschi ura' imuve, timi.

²⁸Tsenñu Jesús tsandimi: Tsaaren naaju chachillaa Diosa' kuinda mere' tsangue meenguen dechu' bain, juntsala kayu Dioschi ura' imu deeve, timi.

Diosyaa tsanguekaantsuve tyainuu ke' keewara pa'la.

(Mateo 12.38-42; Marcos 8.11-13)

²⁹Jesúsnu kulu kulu chachilla pure' wakudindetsuñu, entsandi pam: Challa tinbutala chumu chachilla yuj firu' dejuve. Tyeeba Diosyaa tsanguekaantsuve tyainuu juuya ke' keewaaka, tiidetive. Tsaaren kayu jungajte tiba ke' keewara jun jutyuve. Diosa' mitya pamu Jonás naa-i' puimuwañauba juntsa ke' keewararen mikave. ³⁰Matyu kaspee tinbunu Nínive pebulu' chullachi Jonás naa-i' keewaramuwañauba, Chachi Tiya' Nakayamu bain juntsai keewaranu juve challa chumu chachillachi.

³¹Tsenmin naa Sursha chumu reina milla bain kavitu dekenu malunu mangujpa' challa chumu chachillanu kavitu ke' kuipa punu tsuve, yaa tsamantsa baasha chumuren ja', rei Salomón' tsamantsa aseetaju' keewara kuinda meenu jamuwa' mitya. Tsaaren challa enu pumiya Salomón' chunu tinbunu i'nu jumu kayu aawa puve.

³²Nínive' chullaya kavitu dekenu malunu mangujpa' challa chumu chachillanu kavitu ke' kuipa punu detsuve, matyu yalaya Jonás ti kuindaa kiiñuba meelaren veta' pensa mangue' Diosnu meengemuwa de' mitya. Tsenmin challa enu main pumiya Jonásnu kayu pulla balee puve.

Kapuka lala' buluchi ñillu juuñuu

(Mateo 5.15-16; 6.22-23)

³³Mu bain lanpara chakaatu, mutusha pantsungaatyu deeve, tsenmin tyeeba ñillu jandala du'kaakityu deeve. Lanpaa chakaalaya kai'tala chungaamu deeve, tsenmalaa mun yasha viñu bain danguenutsu. ³⁴Ñu' kapukaa ñu' buluchi lanpara juuñuuve. Tsa' mitya ñu' kapuka urashu juntsaa, ñu' bulunu kumuinchu dandanu tsuve; tsaaren ñu' kapuka urajtushu juntsaa, ñu' bulunu dishkejtsa ju' dandajtu juunu juve. ³⁵Tsaañu' mitya aseetangue' keedei naa ñulla' ñillu dishkejtsa juuñuu jutyuñu bain. ³⁶Tsa' mitya ñulla' bulunu ñillu danjuruna' nukaba dannashu juntsaa, ñullanu danjuruna' ñillu achakali' dangaran tsananu tsuve, timi Jesús.

Jesús judíola' bale rukulanu kuipa pu' pam.

(Mateo 23.1-36; Marcos 12.38-40; Lucas 20.45-47)

³⁷Jesús tsandi' dyañu, ma fariseo ruku Jesúsnu ya' yasha, panda fijade ti' mikañu, Jesús vitu panda finsha chudimi. ³⁸Tsejtu fariseo chachillaya panda finu

uwanu tyaaa manbitsaamu deeñun, Jesúsyaa tsanguityuñu, juntsa fariseo ruku yuj keenbashmi. ³⁹Tsenñu Bale Ruku tsandimi: Ñulla fariseolaya basunu bain, palatunu bain avindalaa ura' manbitsaamu deeve, tsaaren ñulla' tenbukashaya tiba detaangue' kañu bain, tsenmin tiba firu' ke' dekañu bain tyuwake pu' tanañu denave. ⁴⁰¡Ñulla ti kenduba mijtu chachilla! ¿Avindala tiba dekemu Diosren naa tansha bain dekendyu? ⁴¹Tsaaren ñulla' tenbukasha punañunashu juntsaa tenbiyaa chumulanu kuwadei. Tsanguishu juntsaa kumuinchu ñuichi manbitsalañañuu junu tsuve.

⁴²¡Ñulla fariseo chachilla, mika taaju i' puinu dejuve! Ñulla naa aindyu mentanu bain, naa ruda tapenu bain, naa kayu vera pandaba bulu a'nutsumu juula bain paitya pela vele' tsure' manbaateya Diosnu kuwa kuwakemu deeve, tsejturen veelanu ura' kiikenu juula bain, tsenmin Diosnu estya' keewaanu juula bain juntsaaya kityu juju deeve. Tsa' myta ura pañuya juntsaaya kiikenuu dejuve, naa ñulla' kiikendetsushu juntsala bain tsaren kidyai'mujchi.

⁴³¡Ñulla fariseo chachilla, mika taaju i' puinu dejuve! Ñullaa cha' waku wakudinu yasha kayu balela' chunu chunjuutala chunu ajchundyamu deeve. Tsenmin pebulutala fale' neindu bain chachilla: Bale rukui, detisa tyatayaimu deeve.

⁴⁴¡Ñulla mika taaju i' puinu dejuve! Ñullaa kataatyu ujkun tujuu juuñu deeve. Tsenñu chachilla jundaa pulla' nendu katatyu' teemiya Dioschi ura' kurajtuu tiya'ba mijdetuve, timi.

⁴⁵Tsenñu main Moisés' wandya lei mashtuu ruku pakatu tsandimi: Ruku, ñu aantsanditu, naa lalanu bain kentsure' pantsuve, timi.

⁴⁶Tsenñu Jesúts sandimi: ¡Ñulla, Moisés' wandya lei mashtuu rukula bain, mika taaju i' puinu dejuve! Ñulla veelanu tsamantsa naaken tsaa uuden kemu deju'ba, ñullaya meengueno ke'keraa kebanguityularen tsangue uudenguemu deeve?

⁴⁷¡Ñulla mika taaju i' puinu dejuve! Ñulla' tinbu aa-apa millala, Diosa' myta pamu rukulanu tu'muwa deenmala, yala' mennanu jandala mandenga mandengakenu ti' cha'li ma-uikaakaakemu deeve. ⁴⁸¡Ñulla tsanguemu deetu, ñulla' tinbu aa-apala naakemuwa deeñuba ñuichi urave tya' aseetanguikaandetsuve, matyu yala tutemuwa deeñu, ñullaya juntsa jandala mandenga mandengakenu ti', cha'li ma uikaakaadeke' myta.

⁴⁹Tsaañu' myta Dios ya' Aseetaju' panu palaa pilla kiikanu entsandive: Diosa' myta pamu rukulanu bain, ya' myta nemu rukulanu bain eenu tsuyu. Tsenmala mantsalanuya detute', mantsalanuya firu' kenu bendaan nenu detsuve, tive, timi. ⁵⁰Tsa' myta Diosya challa chumu chachillanaa, matyu tu dekenu tinbunuren Diosa' myta pamu rukulanu tu'muwa deeñu, naa chaikama bain peyandetsuñu juntsala' myta kuipa depukenu tsuve. ⁵¹Matyu

p 11.46 naaken tsaa uuden kemu deju'ba, ñullaya meengueno ke'keraa kebanguityularen tsangue uudenguemu deeve tityumujchi, adyu buli llai'kare' eemu deju'ba, ñullaya tajive'nu ti', ne ma tyamishuchin juuñuba ta'katyu deeve ti' aseetanguikara bain junu juve.

ajke' tutamu Abel' mitya kuipa kamin, Diosa' pupunanu ya jumuba, ufeenda tsure' ju'kenunuba pensanguenmala, juntsa kejtaa tenatala Zacaríasnu tu'muwa deeñu junbi jingue kuipa kanu detsuve, challa chumu chachilla.

⁵² Ñulla Moisés' wandya lei mashturula mika taaju i' puinu detsuve! Ñulla Diosa' palaa mijainsha juuke' vinu llavi ñuichi tireketun, naa ñui bain juuke' vityumin, naa veela vinu tyamulanu bain eeputyu deeve, timi.

⁵³ Jesúts tsandiñu, Moisés' wandya lei mashturula bain, fariseola bain mika de-ajaatyatu, Jesúsnu tiba depake'meedunda' bulla pala, ⁵⁴tsangue' yanu tuje' pakakare' kuipa punu tyatu.

Tsa jutyuren tsaañungue keewaatyudei.

(Mateo 10.26-27)

12 ¹Jesúts tsandi' pantsuñu, chachilla tsamantsai dewa'ditu naa yaitalaba deshiña' terekentsula. Tsenñu Jesúts ya' disipululanaa pa' meewaandu tsandimi: Ñulla fariseola' pan pujkikaantsumi llujpepenu pashkatyudei, matyu yalaa tsa jutyuren tsaañungue keewaamu deeñu. ²Ti bain pantsunañuu jumula entsai katawan jetyuuya dejutyuve, tsenmin tiba pensasha dus miinuu jumula bain bene mijakeyan jetyuuya dejutyuve. ³Tsa' mitya tyeeba ñulla yajuunainsha pan tsa detiñu bain, bene tsaa achakalinainsha meejan tsainu tsuve; tsenmala suku lluke' vi' dus kuinda kikeñuu jumula bain, bene ya mututala uidi' daran depañu meejan tsainu tsuve, timi.

Munaa jeetyanuu juñuba

(Mateo 10.26-31)

⁴Ñulla inchi ura' kera chachillanu entsandintsyu: cha' bulunu tu'mulanuya jeetyatyudei. Naa tsangue' bain, bene kayu tiba kikenuuya dejutyuve. ⁵Tsaaren munaa ura uwain jeetyanuu juñuba wainnu tsuyu: Ñullanu tutemiya ñi jelekenu kensha eenu jumu rukunaa jeetyanuu dejuve. ⁶Tsa' mitya juntsa rukunaa uwain jeetyadei.

⁶Asu tsaatyuka ¿pái paki lushi juuchin man kaa pishku ai'mu deetyuka? Naa tsaañu bain Diosya yalanu washkidyaindyuve. ⁷Tsenmala ñullanu laapu' panmalaya, naa ñulla' mishpukasha chumu achuwanan bain nan dechuñuba Diosya main main demikaa tanave. Tsa' mitya jeetyatyudei, ñullaya pishku pure' wakukare' pensanguinuba kayu juntsa pishkuluba pulla bale deeve, timi Jesúts.

Cha' ajuusha Jesúsci deeyu tinu

(Mateo 10.32-33; 12.32; 10.19-20)

⁸Uwaindiyu mun inu keenguemu ju', chachilla' ajuusha in chachiyu timunuya, Chachi Tiya' Nakayamu bain ya' mitya Diosa' anjeela' ajuusha

balela' panu tsuve. ⁹Tsaaren mun cha' kejtsapalaren in chachi jutyuyu ti' pamunuya, i bain Diosa' anjeela' ajuusha yanu in chachi jutyuve tinu tsuyu.

¹⁰Tsenmin mun Chachi Tiya' Nakayamunu kentsure' pati' bain, juntsaya Dioschi ya' ujcha' mitya manbitsalanuu juve; tsaaren mun Espíritu Santonu kentsure' pati' bain, juntsaya Dioschi ya' ujcha' mitya manbitsalan jutyuve.

¹¹Ñullanu naa cha' waku wakudinu yatala detake!, naa uñila' ajuusha bain, naa balela' ajuusha bain deta'ñuba tyee panuj deewa, tsa jutyu'ba, naati pakataa balelakeechunga tya' pensandyatyudei, ¹²matyu juntsa uranu ñulla naati pakanuu juñuba Espíritu Santo mijakaanu tsuve. Tsa' mitya pensandyatyudei, timi Jesús.

Tejan pensangue' kityu tarukunu laapu' kuinda

¹³Ma ruku cha' kejtsapala pu' patu Jesúsnu tsandimi: Rukui, ñuya in naatalanu apa milla' shuikiñu tiba tañu jumula inchiya veekaanu uudenguide, timi.

¹⁴Tsandiñu, Jesús juntsanu tsandimi: ¿Maa inu ñuichi buli veekaanu bale ruku detiren? timi Jesús.

¹⁵Tsandi' patu, bene chachillanu tsandimi: Ñulla tiba kayu aa tadinu tene tya tyaityudei, matyu chachilla buli pure' taa chuturen chunatyu deeve, timi.

¹⁶Tsandi' Jesús bene laapu' kuinda ketu entsandimi: Main taruku ya' tunu pure' puka nandiwaakemi. ¹⁷Tsejtu juntsa ruku ya' tusha puka pure' iwaake' tana' mitya, entsangue pensanguemi: "¿Tyee kichaanga? Yumaa nuka bain detyuwaiñu' mitya nuka uukaren tsaayu", tyami. ¹⁸Tsejtu pensanguetu tsandimi: "Uwain tyee kenu ju'ba mijayu. In buli wa'kaanu yasha miji' demaseneke', vee ya kayu aawa mannu tsuyu. Tsanguishu juntsaa, finutsumu buli tene dewa'kare', naa inchi tiba tananutsumu buli jumula bain millangue wa'kare' tananu tsuyu, ¹⁹tsangue' dyamee maalin entsandinu tsuyu: Tiba pure' buli wa'kareke' tanañu' mitya, te' de-ityumujchi pure' añu tsaa tsananu tsuve. Tsa' mitya leka', panda bain fi', ishkala bain kujchi', sunden puinu tsuyu", tyami taruku.

²⁰Tsenñu Dios tsandimi juntsa rukunu: Nu tiba tejan pensangue' kityu chachi, entsa keperen peyanu tsuve. Tsenmala ñu' buli pure' wakukaashu juntsaya, ñu peyanmala ¿muchee shuwachunga? timi.

²¹Tsandi depa' dyatu, bene Jesús chachillanu tsandimi: Naaju rukula bain yachin juu tiba pure' buli wa'kaamu rukula, naa tarukuyu tyamu deju'ba, Diosa' ajuushaya taruku jutyu, pure ruku deeve, timi.

Dios ya' chachillanu washkemuve.

(Mateo 6.25-34)

²²Tsejtu Jesús bene ya' disipululanu tsandimi: Ñullanu entsandintsuyu: Ñulla tyee finuj deewa, tsenmin ti jallee pannuj deewa tya' pensanguen chutyudei. ²³Matyu lala chu' jintsuñaa, fintsuminuba kayu pulla baleve,

tsenmala lala' bulaa jalinuba kayu pulla baleve. ²⁴¡Asu tsaatyuka! Pishkulaya wajke' puka iwaatyu deeve, naa nuka puka tsure' uukarenshaba tajdetuve, tsaanuren Diosya yalanu naa-uwanuba fikenuu keewaamuve. ²⁵¡Tsaaren naajula bain pure' pensanguike'ba naaketaa juntsa uranu peyanuu ju' bain, jayu yapa manchunuu tiyanu juyu? ²⁶Tsaju' kayu atyutyuuñuu jumulanuba naake' ken tsaa dejushu juntsaa, ¿nejtaa kayu vera juulanaa aa pensa juju deeyu?

²⁷Llullu naa-i awamu deeñuba tejan keekidei. Yalaa taawasha kityu deju', naa jali bain tsejte' pantyu deeve. Tsa deeñu bain, uwaindiyu naa rei Salomón bain tsamantsa uukeraa jalin panaken chumuwa ju'ba, llullu naaju uukeraawa deeñuba tsangue pantyuwaave. ²⁸Tsaju' juntsa ishtapeya jeenbaasha chu', bene ne ikakaraimu juñuren, Dios juntsangue pandemushu juntsaa, kayu ñulla chachillanaa uukerake pandei'chunga, ñulla ura' keranguityu chachilla. ²⁹Tsa' mitya, umaa tyee finuj deewa, tsenmin tyee kujchinuj deewa tya' llakindya pensa jutyudei. ³⁰Matyu Diosnu keranguityu chachillaa entsaatala aa pensanguen chumu deeve, tsaaren ñulla' Apaya ñulla titi meneste deeñuba mive. ³¹Tsa' mitya ñullaya Diosnaa ñulla' rei juu tanamiya, Dios naakesa tyañuba tsanguen chudei. Tsanguetaa bene entsa ñulla meneste judeeshu juntsa bain kanu detsuve. ³²Tinuba jeetyatyudei, ñullaya inchi jayun juu jumu uveja juuñu deeve. Naa tsa deeñu bain, ñulla' Apaya aa ura ruku jitu, yanu ñulla' rei juu tananu tireve. ³³Tsa' mitya ñulla ti ta'ba de-ati' tiba meneste juu chumulanaa kuwadei. Ñulla tsanguishu juntsaa uinbutyu buli naraa jumula kanu detsuve, tsenmin tiba tsamantsa bale naa-uwanuba de-ityu jumulaa selusha kanu detsuve, jungaya naa taamula bain vin natyuinsha, tsenmin naa buuma bain mushketyuinsha. ³⁴Matyu ñulla nunbanaa ñuichi tiba balen juu jumula detsure' tana'ba, ñulla' pensa bain junbiren chi'kare' tananu detsuve, timi Jesús.

Diosa' Na maanu juñu, sekuwaju keenadei.

³⁵Matyu sekuwa juu dekeena', lanpara chakaraa chunadei, ³⁶tsaju' uudenchi taawasha kiiikemu chachilla juuñu deju', yala' miyan apa matsura fandangusha pu' kepe nei'ba maja' panmalan suku majuukenu keenan tsanadei. ³⁷Tsaju' ñulla' miyan apa maatu, ñulla yanu maanu dekeena' katawamulaya mika ura' imu deeve. Uwaindiyu dekeena maja' katamiya, yaren ñullanu panda finu chujti' naa naakenuu juñuba tsa tsangue' panda fikaanu tsuve. ³⁸Tsa' mitya naa aa kepe majai' bain, tsa jutyu'ba, dechanu uratala majai' bain, ya' taawasha kemu rukulanu dekeena maja' katashu juntsaa, yala mika sunden junu detsuve.

³⁹Entsa bain aseetanguidei: ya miya ruku kepe ti uratalaa taamu januuñuba mituya, taamunu eepukaatyu' taanguikaan jutyuve. ⁴⁰Tsa' mitya ñui bain naa-uwanuba jinun jutyuna' keenadei, matyu majai'chuve tyanu uwanu Chachi Tiya' Nakayamu majainu juñu' mitya, timi Jesús.

⁴¹Tsenñu Pedro pake'meetu tsandimi: Rukui, ¿entsa laapu' patishu juntsa kuinda, lalanun patii?, tsa jutyu'ba, ¿veelanu bain laapu' paa? timi.

⁴²Tsenñu Bale Ruku laapu' patu tsandimi: Keena' taawasha kekaamu bale ruku, kidanda jutyu, tyee keñña urañu bain tsa tsanguemunu, yanu uudenguemu ruku ya' yanu washkare' yachi taawasha kemu chachillanu panda finu ura tiyanmalaya, panda kuwa kuwakenu shuike' jiñu jun tsaadei.

⁴³Tsaju' yanu uudenguemu ruku naati' jiñuba yachi taawasha kemu chachi tsanguentsu mangatawamuya mikä sunden junu tsuve. ⁴⁴Uwaindiyu juntsa chachinu, yanu uudenguemu ruku ti taju' bain yanu tene dewashkenu tirenu tsuve. ⁴⁵Tsaaren juntsa yachi taawasha kemu chachi, ya' pensasha: "Inu uudenguemu ruku te' majan jutyuve", tya', yaba bulu taawasha kive'mu rukulanu bain, naa taawasha kemu shinbulanu bain defiru' kendudai', naa panda juula bain fi', naa kujchi' deviña-inba chushu juntsaa, ⁴⁶maanu tsuve tya' keenabanatyunu malunu, tsenmin majan jutyuve tyanu uranu, yanu uudenguemu ruku maamiya, meenguindanda ken chumula naa-i taaju ken chunuu dejuñuba tsa tsainu kuipa pu' tsamantsangue taaju kikaanu tsuve.

⁴⁷Tsaju' main taawasha kemu chachi, yanu uudenguemu ruku naake taawasha kesa tyamuñuba ya miren tsa tsangue taawasha kityu', naa meenguibanguityushu juntsaa, pure' bandainu tsuve. ⁴⁸Tsaaren yachi taawasha kemu chachi yanu uudenguemu ruku naake taawasha kesa tyamuñu bain mijtutaa tsa tsangue taawasha kityu', kuipa vi' taaju iinuuba jushu juntsaa, aa bandan jutyuve. Tsa' mitya munaa kayu aa kuwa' bain juntsanaa kayu aa manba'nus tsuve, tsenmin munaa kayu aa washkaanu kuwa' bain, juntsanaa kayu aa manganu tsuve.

Jesús, chachiitala devela' eekaamu
(Mateo 10.34-36)

⁴⁹Iya entsa tusha tyeeba llu'kakaren tsanguenaa jayu. Tsaju' yumaa llu'kakarenduya yuj urachuyu. ⁵⁰Iya tsamantsa taaju ke' puinuuya juyu. Tsaju' tsamantsa taaju kentsuyu juntsai de-i' pullaindyuya. ⁵¹¿Nulla' pensaya iya entsa tunu ñullanu tiba bulla jutyu ura' chujtinaa jave pensaa dejuu? ¡Tsa jutyuve! Chachilla in mityaren main main devela' jiinu detsuve. ⁵²Matyu entsa ajkeshaya naa ma bulu chachinu manda deju'ba, devela' pallu debuudi' pemalanu ajaavinu detsuve, tsaitumee, pema debuudi' pallu jumulanu ajaavinu detsuve. ⁵³Ya' apaya ya' naba ajaavi'kerake, ya' amaya ya' na'maba ajaavi'kerake, ya' anchamaya ya' suyaba ajaavi'kerake kenu tsuve, timi Jesús.

Tyee i' pullantsuñu bain aseeta judei.
(Mateo 16.1-4; Marcos 8.11-13)

⁵⁴Tsejtu Jesús chachillanu entsa bain tsandimi: Nulla pajta vinsha paba ñivijcha katashu juntsaya, shuwa janu tsuve, timu deeve. Tsenmala

uwain tsaimuve. ⁵⁵Tsenmin ishuwa nurtesha juyikenmalaya, pajta daran lu'nu tsuve timu deeve, tsenmala uwain tsaimuve. ⁵⁶Nulla, tsa jutyuren tsaañungue keewaamu chachilla, uwain ñulla naa selu bain, naa tu bain naa-inu deeñuba keemi deju' wainmu deeve, tsaaren ¿nejtaa challa tyee i' pullantsuñu bain jaiba aseetanguenu dejutyuyu?

Ñu' kundaaba ura' mandiyade.
(Mateo 5.25-26)

⁵⁷¿Nejtaa ñulla maaliren tyee keñu urañuba tsangue pensanguenuu dejutyuyu? ⁵⁸Ñunu kavitu kekaanu timu rukuren ñunu kavitu kemu bale ruku' junga miya' jinu ti', palluu tene miñusha jintsumiya, kayu junga tajindyuren, yaba ura' manba' mantse'kaanu kide. Tsangui'shu juntsaa, ñunu bale ruku' tyaapanu kuwanmala, ya bain chaitalanu kuwanu tsuve, tsenmala chaitalaya ñunu peesu punu detsuve. ⁵⁹Uwaindiyu ñu tsanguityu' peesu vimiya, ñu' neenañu lushi millangue mangüi'mujchiya malun jutyuve, timi Jesús.

Veta' pensa mannu meneste juve.

13 ¹Juntsa uratalaren mantsa rukula Jesús' junga ji' kuinda ketu tsandila: Galilea tusha chulla yala' animaa tute' Diosnu keewaantsunu uranu, Pilato uñi' suutadula dejitu, mantsa chachillanu detute', yala' animaa tu'ñu asalaba bulu deshajaakaa dekive, tila. ²Tsenñu Jesús entsandi pakami: ¿Ñuichiya juntsa rukula veela Galilea tusha chumulanuba kayu pullai ujcha lamu dejutaa tsa deive tenguen? ³Tsa jutyuve, naa ñui bain veta' pensa mangue' Diosnu meenguityushu juntsaa, yala tsaaya peyanu detsuve. ⁴Tsenmin ¿ñuichiya kaspele Siloé pebulunu bain aa katyu ya waka' pajñu 18 chachilla dedela' pemula bain, yalaa kayu veela Jerusalénsha chumulanuba pulla kuipa dejutaa tsa deive tenguen? ⁵Tsa jutyuve, naa ñui bain veta' pensa mangue' Diosnu meenguityushu juntsaa, yala tsaaya peyanu detsuve, timi Jesús.

Puka ityu igu chinu laapu' kuinda

⁶Jesús igu chinu laapu' kuinda ketu tsandimi: Ma ruku ya' uva vijpaasha igu pu' chi main wajke' tanami. Tsejtu yumaa igu inu ura tiyañu, ji' keejimi igu nameete tyatu. Tsenñuren igu indyu katatu, ⁷vijtya washkemu rukunu tsandimi: Entsa igu chinu puka mitya mityakendu yumaa pen añu ingama nentsuyu, tsenñuren tsaave igu puka maliba nadityu jujuumi. Tsa' mitya mandule' kepude, tiba kui'mujchin endala ne chunañu urajtuve, ti' uudenguemi. ⁸Tsenñuren juntsa tunu washnamu ruku tsandikami: Rukui, tsaaren ma añuya mangueedisai, iya juntsa chi keetala tu junle', naa pabandu juula bain tsutsungaanu tsuyu. ⁹Tsenmala entsa añunuuya igu i'ba inuumeete, tsanguiñuren ma ityuunmalaa manduukaade, timi.

Lekanu malunun dii shinbunu ura' manmi.

¹⁰Saaduma lekanu malunu, Jesús cha' waku wakudinu yasha ji' mijakare' ule' pantsumi. ¹¹Tsenñu junu ma shinbu dilu pumi firu' bu'chullachi ikaturen, mantse'ke' deechu' uidinu jutyu', beenbushu wayuyuuren 18 aña dilu tsanamu. ¹²Tsenñu Jesús kata' mikatu tsandimi: Shinbu, ñu umaa dilujituve, ti!, ¹³tyaapachi ta'kami. Tsenmalan juntsa shinbu jei ura' mandiya' mantse'ke' uidi', Diosnu yuj urave ti' padundami. ¹⁴Tsenñu cha' waku wakudinu yasha bale pumu ruku ajaaviimi Jesúsya saaduma lekanu malunuren dilunu ura' mandireñu' mitya. Tsejtu meenamulanu tsandimi: Taawasha kenu maluya mandishmain malu juve, juntsa malutalaan naa dilula bain ja' ura' mandikutidei, tsaaren lekanu malunuya ura' mandikutinu jatyudei, timi.

¹⁵Tsenñu Bale Ruku Jesús pakatu tsandimi: Ñulla tsa jutyuren tsaañungue keewaamu chachilla, ¿mu bain saaduma lekanu malunuren naa ñulla' wagara juulanu bain, buru juulanu bain pi kushkaanu ti' chuwa malanbu' miya' jityu dejuu? ¹⁶Tsaaren enu Abraham millanu sera' jamu shinbunu Satanás vi', yumaa 18 aña dilu ma tanañuba, ¿nenñaa entsa shinbunu naa saaduma lekanu maluñuba juntsanu mandyaikaapunu dejutyuwa? timi Jesús.

¹⁷Tsejtu Jesús juntsandi pañu, ya' kundaalaya millai yujpeyala. Tsaaren chachillaya mika sundyala Jesús tiba tsamantsa uukeraa kiikeñu kataataa deke' mitya.

Jesús mustasa ñinu laapu' pamí.

(Mateo 13.31-32; Marcos 4.30-32)

¹⁸Tsejtu Jesús entsa bain tsandimi: Diosnu rei juu tananu juñu pensangiñuya, ¿tyee juntsa keraa juñanga? ¿Tibaa laapu' panu juwa? ¹⁹Matyu ma ruku ya' bukiya chuinsha mustasa ñi wajkikiñuuve. Tsenñu juntsa ñi awa' aa chi tiyanmala, naa pishkula bain deja' ya' alitala yatape kiidekiñuu juuve.

Jesús pan pujkikaantsuminu laapu' pamí.

(Mateo 13.33)

²⁰Jesús entsa bain tsandimi: Diosnu rei juu tananu juñu pensangiñuya, ¿tibaa laapu' panu juwa? ²¹Ma shinbu pan kendu pen bateya pan kenu llujpe tana' pujkikaanutsumu pu' yande' depujkikaakeñuuve, timi.

Selusha vinshaya kaa bungu juukapa juuñuuve.

(Mateo 7.13-14, 21-23)

²²Jesús Jerusalénsha jinu miñuu jindu, naa aa pebulatala bain, naa kaa pebulatala bain, chachillanu Diosa' palaa mijakares jijiintsumi. ²³Tsenñu ma ruku Jesúsnu pake'meetu tsandimi: Rukui, ¿livee inuu chachillaya jayun judejuu? timi.

Tsenñu Jesús pakatu tsandimi: ²⁴Kaa bunguu juukapanaa pudengura ke' vinbera inu kidei. Uwaindiyu pure' chachilla vinu tyaturen vinu dejutyuve. ²⁵Tsaaren bene ya miya ruku kujpa' juukapa mallukenmala, ñulla avindala shuwamulaya, juukapanu pali pali kentsunu dejuve: Rukui, juukide, tiititu. Tsenñu juntsa ruku pakatu: Ñulla nuka chumu deeñuba kerajtuyu, tinu tsuve. ²⁶Tsenmala ñulla tsandinu dejuve: Lala' ñubaren bulu chudi' panda defi', naa pi bain kujchi kujchikemu deeyu. Lala' chundalaren ñu Diosa' palaa mijakaakaa kemuwaave, titinu detsuve. ²⁷Tsenmala ya manbakatu tsandinu tsuve: Ñullanu nuka chumu deeñuba kerajtuyu. ¡Tsa' myta ñulla kumuinchí firu' kemu chachilla in junu malu' miidei! tinu tsuve. ²⁸Tsenmala junaa deware' naa tejkuba pakaantsunu dejuve, matyu Abrahamnu bain, Isaacnu bain, Jacobnu bain, tsenmin kumuinchí Diosa' myta pamu rukulanu bain Dios rei ju' chuinsha puna dekataturen, ñullaya avindala deshuwa' myta. ²⁹Matyu nuka chulla bain janu detsuve, naa pajlainsha chulla bain, pajvinsha chulla bain, sursha chulla bain, nurtesha chulla bain janu detsuve, Dios rei ju' chuinsha chudi' panda finu. ³⁰Keekidei, challa mantsa ne chachi jumulaa bene aa bale ruku mandianu detsuve, tsenmala challa mantsa aa bale ruku jumulaa bene ne chachi juu mandinu detsuve, timi Jesús.

Jesús Jerusalénnu chumula' myta llakindyami.

(Mateo 23.37-39)

³¹Juntsa uranuren mantsa fariseola ji', Jesúsnu kuinda ketu tsandila: Enu malu' miide, Herodes uñi ñunu tu'nu tyantsuve, tila.

³²Tsenñu Jesús tsandimi: Miji' juntsa urajtu kenun bibuu rukunu tsandidei: Iya uma bain, ayu bain chachillanu pumu dyabulu avindala deme-e'lare', naa mantsa dilulanu bain ura' demannu tsuyu. Tsanguetu ma-ayushaa dekenu tsuyu, tive, tidei. ³³Tsejturen ajkeshaa jinuu menesteyu, uma bain, ayu bain, ma-ayu bain tsangue' jintsunu, matyu Diosa' myta pamulanuya Jerusalén pebulushaa den tu'mu deeve. ³⁴¡Ñulla, Jerusalénsha chumu chachilla, naa Diosa' myta pamu rukulanu bain tu'mu chachilla, naa Dioschi eramu chachillanu bain shupuka' kiikemu chachilla! Iya ñullanu pure' bijee walla' ama naakemun ya' kaillanu ja'chi pandansha tene pukemushu, i bain tsanguenu keñun ñulla tsa de-ikutityuve. ³⁵Dios ñulla' yanu' shuike' baka' miinu tsuve. Tsenmala umaa inu mangatan dejutyuve, ñullan bene: Bale Ruku' myta jamuya Dioschi ura' imuve, ti'mujchiya, timi Jesús.

Lekanu malunun lluyi rukunu ura' manmi.

14 ¹Jesús ma saaduma malu, lekanu malunu, fariseo bale ruku' yasha panda finu jimi. Tsai' jiñu, mantsa fariseola Jesúsnu dus

r 13.35 Salmo 118.26. Ñulla' yanu timiya ura yala' chunu pebulunu, tsa jutyu'ba, yala' aa eleshanu laapu' pataaa tsandimi.

keenala naakeñuba mijanu tyatu. ²Junu ma ruku lluyinchi diluu jumu Jesú's' keesha pumi. ³Tsenñu Jesú Moisés' wandya lei mashtuu rukulanu bain, fariseolanu bain pake'meetu tsandimi: ¿Saaduma lekanu malunuren dilunu ura' mandirenuu jun? ⁴ti' pake'meeñun depa'piyaila. Tsenñu Jesú juntsa dii rukunu ta'ka' ura' mandiretu: Miide, timi.

⁵Tsanguetu Jesú yalanu tsandimi: ¿Nulla mallee, naa ñu' kailla tujuusha ma lupajtyaiñu bain, naa wagara tujuusha lupajtyaiñu bain, saaduma lekanu malu juñuba, jeke mangalaren dejutyuyu? timi Jesú.

⁶Tsenñu yala naati' pakan tsandyala.

Panda five'nu mikayamula

⁷Bulu puve'nu mikaya' panda five'nu jimu chachilla, main main kayu aa balela' chuchudinu chunjuutalaan mi'ke' chundetsuñu katatu, Jesú laapu' patu tsandimi: ⁸Nullanu mallee fandangu ke' panda finu ti' demikañu ji' bain, balela' chudi' panda fifikenu chunjuunuya chutyudei. Matyu vera bene jamaa kayu ñunu pulla bale rukaaba ja'ba imive. ⁹Tsenmala ñullanu bulu puve'nu mikamu ruku: Ñu' chunjuru entsanaa mangude, ti'bandinmalaya, ñu yujpeya' mangujpa' miji' kapashaaba manchuinu tsuve.

¹⁰Tsaañu' mitya naa-uwanu fandangu ke' panda finu ti' demikañu ji' bain, kapa chunjuushaa chudei. Tsenmalaa, ñullanu bulu puve'nu mika' panda fikaamu ruku jatu: Ñuya engu kayu balela' chunu chunjuushaa maja' chudei, tishu juntsaa, veela ñuba bulu chumula ñunu balenguunu detsuve. ¹¹Matyu mun maali kayu balenguranu tya' bain, balejtu kura' yujpeyanu tsuve. Tsenmala mun balejtu kuranu tya' bain, juntsaa kayu balenguranu tsuve.

¹²Tsejtu yanu bulu puve'nu mikamu rukunu bain Jesú tsandimi: Ñu naamaa, pajta katyu uwatala juu, naa kepenusha juutala bain panda finu ti' demika'ba, ñuchi ura' kera chachillanu juu, ne ñu' naatalalananu juu, ne ñu' bululanu juu, ne ñu' keesha kalen chumu tarukulanu juu bain bulu puve'nu ti' mikatyude, matyu yala vejmi' tsa mantu ñunu juntsangue demanguenmalaya ñu' tsanguen mitya mangakeñuu kenu juve. ¹³Tsa' mitya naa-uwanu fandangu ke' panda finu ti' mikake' bain, lastemaa chumulanu bain, yujkaa chachillanu bain, ura' nenu jutyuulanu bain, kapuka katatyulanu bain juntsaalanaa mikade. ¹⁴Tsanguishu juntsaa ñuchi mika uranu juve; naa yala vejmi' tsa mannu dejutyuñu bain, tsaaren juntsan mitya bene Dios manguwanu juve, yachi naakesa tyañuba tsanguen chumu chachilla peyaturen mangujnu malunu, timi Jesú.

Fandangu jadei detiñun, jityu chachilla (Mateo 22.1-10)

¹⁵Tsandiñu meenatu, main panda finu chumu ruku Jesúsnu tsandimi: Mun Dios rei ju' chuinsha ya bain mikaya' panda finu pumuya Dioschi ura' imuve, timi.

¹⁶Tsenñu Jesús laapu' kuinda ketu yanu tsandimi: Ma ruku panda fimushtinu fandangu ke' bulu depuve'jasa tyatu, pure' chachillanu demijakaanu eemi. ¹⁷Tsejtu panda finu ura tiyañu, yachi taawasha kemu chachinu: Yumaa panda finu ura tiyañu' mitya, mangueeji': Jadei, tide, timi. ¹⁸Tsenñu ya' chachi yalanu miji' mangueejiñuren, yala muba janbai'tu ne titalaba delaapuke' dyatu, ajke' pakamu rukuya entsandimi: Iya challan tu ati'kake' mitya, junga ji' keejinu menesteyu, tsa' mitya jakeen jutyuve, timi. ¹⁹Tsenmala kamainya pakatu: Iya taawasha kemu wagarala paitya ati'ka' mitya, taawasha kekare' keejintsuyu, tsa' mitya jakeen jutyuve, timi. ²⁰Tsenmala kamainya: Iya chellan supungake' mitya jakeen jutyuve, timi.

²¹Tsa detiñu, ya' chachi maatu yanu uudenguemu rukunu, yanu naadetiñu bain tsandi dekuindakemi. Tsenñu yanu uudenguemu ruku ajaatyatu, manen ya' chachinu: Tsaashu juntsaa, apain miji' pebulusha aa miñutala bain, kaa miñutala bain, lastemaa chumu chachillanu bain, yujkaa chachillanu bain, kapuka putyu chachillanu bain, ura' netyuu chachillanu bain engu demiya' jade, ti' eemi.

²²Tsenñu ya' chachi tsangue' maatu tsandimi: Rukui, ñu naakide tiñu bain tsanguiyu, tsaaren kayu chachi vinuu ju' ujkive, timi.

²³Tsenñu yanu uudenguemu ruku ya' chachinu tsa mandimi: Manen miji' pebulu kapasha miñu miñu chachi katatu demiya' janbera ide, in ya tyuwanbera. ²⁴Matyu uwaindiyu inchi ajke' wandi' mikayanuu jumu chachillaya mu bain in yasha panda finuu dejutyuñuve, timi.

Naaketaa Jesús' disipulu tiyanuu juñuba

(Mateo 10.37-38)

²⁵Jesúsnu pure' chachilla bendaaj iindetsuñu, mayate' uiditu yalanu tsandimi: ²⁶Nulla mallee in bendaaj janu tya' bain, naa ñu' apanu, ñu' amanu, ñu' shinbunu, ñu' kaillanu, ñu' naatalalananu, naa ñu maali bain kayu inu pullai estyamushu juntsaa, in disipulu tiyanuu jun jutyuve.

²⁷Mun in mitya tutab'a tutainuu juu ya' kuusa nanakiñungue', in bendaaj jatulyaya in disipulu tiyanuu jutyuve.

²⁸Tsaju' ñulla mallee aa katyu ya kenu tya' bain {ajke' chudi' pensangue' keemu dejutyuika?, tsejtaa naa-i kasta inuuñuba mijia', uwain tsangue dekenuu tana'b'a mijanu. ²⁹Tsangui'shu juntsaa, kenbuchu ke' dyanmalaya, veela katatu: ³⁰Entsa ruku aa katyu ya kenu ti' ke'b'a, deki'mujchi ne tsangaañuve, ti' uukapunu dejuve.

³¹Tsenmin, naa ma rei bain kama reiba vinguenu jutu, yaa 10.000 suutadu miyaa ju', veraa 20.000 suutadu miyaa jumuba vinguenu jumiya, {naa keñaa yaiba vingu'e'ba pullan dejui'ñuba mijanu tyatu, chudi' pensangue' keenu jutyun? ³²Tsejtu yaiba vingu'e'ba pullan jutyushu juntsaa, kayu ya' junga kalen jaindyuren, juntsa rei ya' chachillanu ere', vee reinu veta' veta' tiba bulla jutyu ura' chudaa ti' kuinda juuyaa mijakaanu eenu juve.

³³Tsaju' naa ñui bain ti ta'ba juntsa millangue shuiki'shu juntsaa, in disipulu tiyanuu dejutyuve.

³⁴Uwain tyayu mika urave, tsaaren tyayu pijtu tiyashu juntsaa, ¿naa keñaa pi' mandiyanuu jun? ³⁵Matyu naa tusha tsuuñu bain tiba awakaren jutyuve, naa ti wajka kiyatala uutyawaachi tyá! tsuuñu bain uutyawaan jutyuve. Tsa' myita kepuñuba ne uraave. ¡Mun pungui pu'ba meedi' aseetanguidei! timi Jesús.

Jesús uveja piyamunu laapu' pamí.

(Mateo 18.10-14)

15 ¹Naa deechu' myita lushi kamula bain, naa vejan ujcha lan chumula bain Jesús' junga kalen jijiila meenanu. ²Tsenñu fariseola bain, naa Moisés' wandya lei mashturula bain entsandi paviikentsula: Ujcha lamu chachillaba buudi' panda fifikentsu' myita, entsa ruku urajtuve, tila.

³Tsenñu Jesús entsa kuinda laapu' pamí: ⁴¿Maa ñulla 100 uveja miya ju' bain, main piyanmala, 99 uveja jumulanuya jatsuwa tenasha deshuike' jitú, piyamunu mangatanbera mami'ken jutyuyu? ⁵Tsangue' mangatatu sundyanchin nanake' manda'tu, ⁶ya' yasha miimiya, sunden puinu titu, yachi ura' kera chachillanu bain, ya' keetala chumulanu bain dewa'kaatu: Iba bulu sundyave'kai, in uveja piyañuren mangata' myita ¿tinu jutyun? ⁷Uwaindiyu selusha bain tsaren juve; main ujcha lamu chachi veta' pensa mangue' Diosnu meenguishu juntsaa, juntsa ruku' myitan 99 chachilla Dios naakesa tyáñuba tsanguen chumulanuba kayu pullai sundyanu juve, yalaa veta' pensa mannu menestejdetuñu.

Jesús lushi piyamunu laapu' pamí.

⁸Entsa bain Jesús tsandimi: Naaju shinbulaa paitya pakí lushi tanaturen main piyanmala, ¿lanpa chakare', narake mami'ke', kashikeñungue' mangatanbera ken jutyun? ⁹Tsejtu mangatamiya, ¿yachi ura' keranu shinbulanu bain, ya' ya keetala chumu shinbulanu bain dewa'kaatu: Iba bulu sundyave'kai, inchi ma pakí lushi pireturen mangata' myita, tinu jutyun?

¹⁰Tsejtu Jesús tsandimi: Uwaindiyu naa Diosa' anjeela bain tsaren sundyamu deeve ma ruku ujcha lamuren veta' pensa mangue' Diosnu keenguenmala, timi Jesús.

Ma ruku' na piyamunu laapu' pamí.

¹¹Jesús entsa bain laapu' kuinda ketu tsandimi: Ma ruku pai na miyami.

¹²Tsenñu ya' kayi naya ya' apanu tsandimi: Apa, ñuchi tiba tañu jumula inchi junuu jumuya naa naake veenuu juñu bain inu millangue kuwaka, timi.

Tsenñu ya' apa ya' nalanu yachi tiba tañu jumula naa naake kuwanuu juñuba tsangue deveemi. ¹³Tsenñu ya' kayi na wajtutalaren yachi tiba jumulaya millangue atí!, juntsa lusinchí baasha vee tusha jiimi. Tsejtu junga na'baasa ken chu' lushi millangaami. ¹⁴Tsangue' lushi dekike' tajtui tiyanu

uwanu, juntsa tusha tsamantsai panda yamuñ tinbu jami, tsenñu tichi panda ati'ka' fin tsaa pullaintsumi. ¹⁵Tsaindu juntsa tusha ma ruku' junga jitu, taawasha kuwaka ti' pake pakekemi. Tsenñu juntsa ruku ya' tusha ku'chi washkekaanu eekemi. ¹⁶Tsaindu panda iiñtsu' mitya ku'chi fintsumi pandañu bain finu tyatyaimi, tsenñuren mu bain kuwaindyula. ¹⁷Tsejtu ura' kityu'ba aseetanguetu, entsandyami: "In apa' junga lushinchi taawasha kemulaya pandachi yamuñ dejutyuñuba, iyaa engu pandachiren peyanundiyantsuyu. ¹⁸In apa' junga miitü entsandinu tsuyu: Apa, iya Diosnu bain, ñunu bain ujcha layu. ¹⁹Tsa' mitya inu ñu' na jungue kurenu jutyu', ñuchi lushinchi taawasha kemu jungue kureka tinu tsuyu", tyami. ²⁰Tsejtu mangujpa' ya' apa' chuinsha miintsumi.

Tsai' miintsuñu, ya' apa baashan miñusha kata-eetu, ya' nanu tenbitya!, ya' na' junga daran jitu pilunbuke angue' estikemi.

²¹Tsenñu ya' na, ya' apanu tsandimi: Apa, iya Diosnu bain, ñunu bain ujcha layu. Tsa' mitya iya ñu' na jungue kurana jutyuyu, timi.

²²Tsenñu ya' apa yasha mandajitu, yachi taawasha kemu chachillanu tsandimi: Apain, kayu naraa jali kalare' manbandedei, tsenmin suutes bain tyamishunu manbu'; sandalia bain manbudei. ²³⁻²⁴Tsenmin nakululuke awakaanu kaa wagara bain ka' taja' tu'dei. ¡Panda fi' sunden fandangu kisai, matyu in na peya' piyantsaituren, mangatawañu' mitya! timi.

Tsenñu ya' apa naatiñuba tsa deke' fandangu kedundala.

²⁵Yala tsanguendetsuren, ya' avenju naya jeenbaasha taawasha ken pumi. Tsejtu maja', ya keesha miindu, yasha beesa meeja', fandangu ke', beelangue' jutindetsu meemi. ²⁶Tsejtu mainnu ya' apachi taawasha kemu chachinu mika' pake'meetu: ¿Yasha tyee iñu deken tsanguentsula? timi.

²⁷Tsenñu ya' apachi taawasha kemu ruku tsandimi: Ñu' benna tiba jutyu maañu mangata' mitya, ñu' apa nakululuu kaa wagara tu'kare', panda fimishtintsuñu, sunden beelanguendu dekive tsanguentsula, timi.

²⁸Tsenñu ya' uñaku ajaatyä' yasha mavindyai'ñu, ya' apa fale' ji', ya' nanu yasha mavimishtinu ti' patintsumi.

²⁹Tsenñu ya' apanu tsandimi: Ñuya mive naa iya ñuchi pure' aña taawasha kenduba ñunu meenguityuu jutyuñu bain, tsaanuren ñuya inu naa ma kaa chibu juuñuba kutyuwaave inchi ura' keranu chachillaba buudi' panda fimishtinu. ³⁰¡Tsaaren challa ñu' na, ñu' lushinchi naa munu'baasa tsa tsaimu shinbulaba detsa-i', lushi millangare' maanmalaa, ya' mitya nakululuu kaa wagara tu'keechunga! timi.

³¹Tsenñu ya' apa tsandimi: Apa, ñuya naa-awanuba ibaren chuve, tsaju' inchi tiba tañu jumulaya ñuchi tene juuve. ³²Tsaaren challa ñu' benna peya' piyan tsaituren mangatawañaa, tsangue' sunden fandangu kikenuu faañu' mitya tsanguentsuyu, timi.

Washna' keenamu deechu' kityunu laapu' pam.

16 ¹Jesús entsa bain kuinda ketu ya' disipululanu tsandimi: Main taruku, ya' chachillanu keena' taawasha kekaamu bale ruku main miyami. Tsenñu mantsa chachilla juntsa tarukunu tsandila: Ñuchi taawasha kekaamu bale ruku ñu' buli yuj na'basa dekentsuve, tiitila.

²Tsenñu yalanu uudenguemu taruku ya' taawasha kekaamu bale rukunu mikatu tsandimi: ¿Ñunu naa titu detin entsandila? Taawasha kemulanu depaangueñu pilla kiika inu challa demanguwaka. Ñu inchi taawasha kekaamu bale ruku jutyu mandiyaive, timi.

³Tsenñu taawasha kekaamu bale ruku entsangue pensanguemi: “Inu uudenguemu ruku juntsa taawasha manchipakeñu, challa tyee kenu juwa? Tutala taawasha kenuya iya dera putyuyu, naa lushi pake pakekemu chachi tiya' pa'nu bain yujtenve. ⁴;Aa! naakenaa ju'ba umaa aseetanguiyu. Iya entsanguishu juntsaa naa taawasha tajtu tiyañuba, maa inu yala' yasha mikanuu dejuñuba mijayu”, tyami. ⁵Tsejtu, yanu uudenguemu rukunu neenamulanu main main mika' mainnu pake'meetu tsandimi: Ñu, ¿inu uudenguemu rukunu nan neenayu? timi.

⁶Tsenñu pakatu tsandimi: Finutsumu muli 800 galun neenayu, timi.

Tsenñu taawasha kekaamu bale ruku tsandimi: Enu juntsa pilla kiika tanayu. Ka' chuditu muli 400 galunren pillakide, timi.

⁷Tsejtu kamainnu bain pake'meetu tsandimi: Nuya, ¿nan neenayu? timi.

Tsenñu pakatu: Iyaa 400 kindaa trigu neenayu, timi.

Tsandiñu taawasha kekaamu bale ruku tsandimi: Enu juntsa pilla kiika mangatu 300 trigu kindaaren pillakide, timi.

⁸Tsenñu yanu uudenguemu ruku naa ya' chachillanu taawasha kekaamu firu' kemu bale ruku tsangue' bibu' kemuñuba mijatu meenbashintsumi. Matyu ujcha lan chumu chachillaya yaitalaa kayu Diosnu keranguemu chachillanuba pullake ura' bibu' kemu deeve.

⁹Ñullanu tsandinu tenve: tituba kekaakenuu lushi tashu juntsaa, juntsa lushinchi veelanu ñuichi ura' keranu chachi detire' puidei, tsejtaa lushi tajtui tiyanmala, bene Dios ñullanu naa-uwanuba chuinsha mikakenuu junutsu.

¹⁰Mun ka jayun juunuren ura' washkemu jushu juntsaa, naa pure' juunu bain tsaren ura' washkemu junu tsuve. Tsenmala mun ka jayun juunuren ura' washkityu jushu juntsaa, naa pure' juunu bain, ura' washkityu junu tsuve. ¹¹Tsa' mitya ñulla na'basa kikaakenuu lushi tanaturen ura' kastanguen dechutyushu juntsaa, ¿maa ñullanu uwain ura bale juu jumula washkaanuu juñanga? ¹²Tsajui' ñulla veelachi tyeeba jumulanun ura' washkendetyuñuba, ¿maa ura ñuichi jumulaa ñullanu kuwanu juñanga?

¹³Mu bain, yanu uudenguemu ruku pallu miyashu juntsaa, juntsa pallulachi paree taawasha ken jutyuve; matyu mainchiya ura' taawasha

ke' bain, kamainchiya ura' ken jutyuve; tsa jutyu'ba mainnuya estya' bain, kamainnuya nejuu junu tsuve. Tsa' mitya Dioschi tiba kiikemu chachi juturen, lushinu bain mutya', tiba detadinu kiikenu jun jutyuve.

Jesús fariseolanu ule' pamí.

¹⁴Fariseolaya lushi aa tadinu tya' mutyamu de' mitya, Jesús tsandi' pañu meenatu ne uukapundila. ¹⁵Tsenñu Jesús tsandimi: Ñullaya veela' kerachiya Dios naakesa tyañuba tsanguen chumu chachilla juuñungue keewaamu deeve, tsaañuba Diosya ñulla' tenbukasha naadejuñuba kerave. Matyu chachillachiya kayu aa balengurainuu jumaa, Dioschiya jaiba kerandyatuu jumu juve.

¹⁶Juan Mungaamu kayu engu Jaindyunu uranuya Moisés' wandya lei bain, naa Diosa' mitya pamu rukula bain naake mijakare' pamuwa deeñuba tsangue mandanguen chumuwa deeve. Tsenmala juntsa ajkeshaya Diosnu rei juu tananu mika ura kuinda demijakare' jinmala, kumuinchi chachilla Dios rei ju' chuinsa vinbera inu tyatyaindetsuve. ¹⁷Tsaañu bain, naa selu bain, tu bain depiya deiñuba, Moisés' wandya lei pill akiikanu naa ka ma letara juuñuba juntsai' pullanbera in jutyuuya jutyuve.

¹⁸Naajuu rukulaba ya' shinbunu vela' miji' vee supu mangashu juntsaa, juntsa ruku vee matsaintsuve. Tsenmala naajulaa juntsa mavela shinbunu manga' bain, juntsa ruku bain vee matsaintsuve, timi Jesús.

Lázaro bain, taruku bain

¹⁹Jesús tsandimi: Main taruku jumi, matyu naa-uwanuba balenchi kaya jalin panaa, tsenmin malumere fandangu ke' sundya' panda fifikemu jumi. ²⁰Tsenmala main pure ruku bain jumi ya' momu Lázaro, kumuinchi ya' buluya bishpee tene juumi, tsenmin juntsa ruku taruku' ya juukapa deechusha chuchunamu jumi, ²¹matyu taruku panda findu ya' pandainsha panda llujpe pajtenmala ka' fichi tyatu. Tsenñu kuchala dejí', juntsa rukunu ya' bishpeetala vela velanguila.

²²Tsanatu juntsa pure ruku ma malu peyami, tsenñu anjeela deka', Abraham' keesha miya' jila. Bene taruku bain peyañu, yanu menla.

²³Tsejtu juntsa taruku pemula' pupunanu tenasha ji' tsamantsa taaju kendu, baasha Lázaro Abraham' keesha uina kata-ere', ²⁴ui'eetu tsandimi: Apa Abraham, inu tenbityaka, iya engu tsamantsa taaju kentsuñu' mitya Lázaronu eede, tsenmala ya' tyamish kapanu pi ajke' taja' in ñíjkanu jayu ishanbajtenutsu, timi.

²⁵Tsenñu Abraham tsandimi: In estennu ruku, mandengakide ñuya kaspele mika ura' chumuwaanmala, Lázaroya yuj lastema' chumuwaave. Tsenmala challa yaa ura' chunmala, ñuya taaju ken chuve, timi.

²⁶Tsenmin tsamantsa aa kujtu ma dalanañu' mitya, lala naa-i' ñulla' junga jin tsa deenmala, ñui bain naa-i' lala' junga jan tsa deeve, timi.

27-28 Tsenñu taruku tsandimi: Apa Abraham, tsaashu juntsaa, iya man naatala miyañu' mitya, Lázaronu in apa' junga eede, tsenmala ya ji' wainmala, yala in junga tsamantsa taaju kensha jai'nudetsu, timi.

29 Tsenñu Abraham tsandimi: Yumaa yala naa Moisés' wandya lei bain, naa Diosa' mitya pamu rukula' pikeñu jumula bain detanave; tsa' mitya naatiñuba juntsanaa demeenguisa, timi.

30 Tsenñu taruku tsandimi: Apa Abraham, juntsan juunuya meedin dejutyuve. Tsaaren main pemuren mangujpa' yala' junga ji' keeshu juntsaa, yala veta' pensa mangue' Diosnu meengueno detsuve, timi.

31 Tsenñu Abraham tsandimi: Yala Moisésnu bain, Diosa' mitya pamu rukulanu bain meedituywadeeshu juntsaa, naa pemu main mangujpañu bain keranguen dejutyuve, timi.

Veelanu ujcha lawaan jutyu.

(Mateo 18.6-7, 21-22; Marcos 9.42)

17 ¹Jesús ya' disipululanu tsandimi: Naake' bain ujcha lan jutyuuya jun jutyuve. Tsaaren mun veelanu ujcha laware'ba juntsaya mika taaju i' puinu tsuve. ²Tsa' mitya main kailla juuñuu keenguemunu ujchaaba lawaanuushu juntsaa, kayu ujcha lawarei'mujchin, aa shupuka kutunu teepuke' lamaasha keviiñaa yachi kayu uraaba junu juve. Matyu uwain juntsangue' ujcha lawaamu chachillaya ili likenu aa shupuka kutunu teevi' lamaasha kevi' pipimulanuba pullake taaju kenu detsuve.

Veta' veta' ura' mandiyau

(Mateo 18.15)

³Naadekeñu bain ura' judei. Ñuba bulu chumu ñunu firu' kenmalaya, nepade. Tsaaren veta' pensa mantu ñunu tsanguityuuba jui'yu tita maanmalaya, kuipa faawaatintsun jutyu tiyade. ⁴Naa ma malunuren mandishpai bijee ñunu firu' ketu, mandishpai bijee maja' ñunu: Firu' manguen jutyuyu, tinmalaya, yanu tsan bijee kuipa faawaatintsun jutyu tiyade, timi Jesús.

Dera' keranguide.

⁵Jesús' mitya kuinda kenu lara' eramu rukula Bale Rukunu tsandila: Lalanu kayu daran keranguekaaka, tila.

⁶Tsenñu Bale Ruku yalanu tsandimi: Uwain ñulla' keengueno pensa mustasa ñi tsantsaa juushu juntsaa, entsa chinu: Enu maya' ji' ferasha mawajkaide, detiñu bain, uwain meengueno juve, timi.

Taawasha kemuya meenguemu jude.

⁷Ñulla mallee taawasha kemu chachi miyatü, juntsa ruku naa wagaralanu tu dejunlekaañu bain, naa panbasha uvejalalu dewashke' maañu bain: ¿Engu ja' chudi' panda ka' fide, timu deeyu? ⁸Tsandityumujchi ne entsandimu deeve: Inchi

panda ke' tala' kuwaka; tsenmin iya panda fi' kushminguendu kayu vera titi finuu juñu bain detalade. Tsanguetaa bene ñu bain panda fimin kushminguenu juve, timu deeve. ⁹Tsenmin yachi taawasha kemu chachi yanu uudenguemu ruku naakide tiñuba kumuinchu juntsangueñu bain, juntsan mitya ura' kive tityu deeve. ¹⁰Tsa' mitya ñui bain Dios tyee kenuu dejuve tiñuba millangue deke' dyamiya entsandidei: Lalaya juñu' jutyu taawasha kemula juuñu deeyu, matyu Dios tyee kide tiñuba juntsaren ne kideke' mitya, tidei, timi.

Manbityu bishpeechi dilu paitya rukula

¹¹Jesús Jerusalénsha jinu miñuu jindu, Samaria tu kapa bain, Galilea tu kapa bain junu kejtaa tenatala puintsumi. ¹²Tsai' jindu ma kaa pebulusha vingumaintsuñu, paitya ruku manbityu bishpeechi tene diluu jumula fale' Jesúsnu katawa' baataa uidila. ¹³Tsejtu juntsa dii rukula uti' Jesúsnu patu tsandila: ¡Jesús, lalanu tenbityaka! tila.

¹⁴Tsenñu Jesús dii rukulanu katatu tsandimi: Chachilla' mitya Diosnu kalen jimu rukula' junga ji' keekutiidei, timi Jesús.

Tsenñu juntsa dii rukula jinduren ura' demandiyaila. ¹⁵Tsenñu ma rukuya ya' dii peya demanbiyaañu katatu, jindun masmi' majandu, daran pa' Diosnu yuj urave tisai miimi. ¹⁶Tsejtu juntsa ruku Jesú's ajuusha ya' kajuru tyullake waike' keeware', yuj ura' kive timi. Juntsa ruku Samariasha chumuwaami.

¹⁷Tsenñu Jesús pake'meetu tsandimi: ¿Ura' mandiyamula paitya ruku dejutyuu? ¿Tsen veela mandishtaapai rukulaa naa denain? ¹⁸¿Tsejtu entsa vee tusha chumu rukuren Diosnu yuj ura' kive tinu majaitu in? timi.

¹⁹Tsejtu Jesús juntsa rukunu tsandimi: Mangujpa' miide, ñu kerangue' mityaa ura' mandiyave, timi.

Dios ya' chachillachi rei ju' mandanguenutala

(Mateo 24.23-28, 36-41)

²⁰Fariseola Jesúsnu pake'meetu tsandila: ¿Naamaa Diosnu rei juu tananu malun? detiñu, pakatu tsandimi: Diosnu rei juu tananu malu juñu kapukachi entsai kataamu jutyuve. ²¹Mu bain: ¡Enu entsanave! naa: ¡Junbi jatsanave! ti baindindejutyuve, matyu ñulla' kejtsapalan Dios yumaa rei juñu' mitya.

²²Tsejtu Jesús ya' disipululanu tsandimi: Ñulla umanbi Chachi Tiya' Nakayamunu naa ma malu' mityan juuñuba mangatanu tyanu detsuve, tsejturen katan dejutyuve. ²³Mantsalaya entsandinu detsuve: ¡Enu entsanave! tsandityu'ba: ¡Junbi jatsanave! ti'bandinu dejuve. Naa tsa detiñu bain kerangue' bendaajityudei. ²⁴Matyu ma malu Chachi Tiya' Nakayamu maanu uranuya, kuidya pi'ketu naakemun, tsaa selusha nukaba depidyake' manba pi'kemin masku pashaba deputya kemushu, ya' maanu uranu bain tsaanu tsuve. ²⁵Tsaaren kayu tsai'mujchiren Chachi Tiya' Nakayamu pure' taaju i' pullainu tsuve, tsenmin challa tinbunu chumu chachillachi mutyan kerai'nu tsuve. ²⁶Matyu Noé' chunu tinbunu naa-i' puimuwaañu bain, Chachi Tiya' Nakayamu' maanu

malunu bain juntsaaren junu tsuve. ²⁷Juntsa tinbunuba Noé kayu ya' baakusha vindyuya, mantsa chachilla panda fin chu'kera, ishkala kujchin chu'kera, mantsalaya supungan chu'ba tsanguendetsuren; Noé baakusha vinmalan, shuwa ja' pi debukenmalaren chachilla depiyaimuwa deeve. ²⁸Tsenmin kaspele Lot' chunu tinbunu bain tsaren imuwaave: mantsala panda fin chu'kera, binu kujchin chu'kera, atin chu'kera, ati'kan chu'kera, wajken chu'kera, ya bain ke'ba tsanguendetsuren, ²⁹Lot Sodoma pebulunu malu' mijjinmalaren, selusha ñi bain, ju'kemu asufee bain shuwa pajan tsa-i' chachillanu detutekemuwaave. ³⁰Naa Chachi Tiya! Nakayamu maja' mangatawanu uwanu bain juntsaaren inu tsuve. ³¹Juntsa malunu mun ya kai'sha leka lekakinsha puna' bain yasha buli manganu mavityudei. Tsenmala mun jeendala puna' bain yasha miityudei. ³²Matyu Lot' shinbu naa-imuwañauba juntsanu mandengakidei.^s ³³Mun ya' chungamaya maali balengure' livee inu tyashu juntsaa, uwain naa-uwanuba livee inu katan jutyuve; tsaaren in mityan ya' chungama balenguutyu' peyashu juntsaa, naa-uwanuba chumu tiyanu tsuve. ³⁴Uwaindiyu, juntsa kepe ma tsunjurunu pallu tsuna' bain, mainya kaya' jiñuba, kamainya shuwanu tsuve. ³⁵Tsenmala pai shinbu tyeeba iliken depu' bain, mainya kaya' jiñuba, kamainya shuwanu tsuve, timi. ³⁶ ³⁷Jesús tsandíñu demeetu, ya' disipulula entsandi pake'meela: Bale Ruku, tsen ¿nukaa tsaa inu jun? detiñu, tsandimi: Nuka pete tsuñuba jungaa petyutyu wa'dimu deeve, timi.

Kavitu kemu ruku bain, biyuda shinbu bain

18 ¹Jesús ya' disipululanu entsa laapu' kuinda juu bain kemi naaketaa ipijpajtaiñuu ityumujchi naa-uwanuba Diosba kuinda ketintsunu juñuba mijakaanu. ²Tsejtu tsandimi: Ma pebulunu main kavitu kemu bale ruku naa Diosnu bain balengure' jeetyatyu ju', naa chachillanu bain balenguutyu ruku chumi. ³Tsenmala juntsa pebulunuren ma biyuda shinbu bain chumi. Tsejtu naa-uwanu bain juntsa bale ruku' junga ji', ya' kundaanu kavitu ke' kuka tiitimi. ⁴Tsenñuren juntsa kavitu kemu bale ruku naa-uwanuba kavitu ke' kutyu jujuumi. Tsaaturen bene ya' pensasha entsandyami: "Naa iya Diosnu balengure' jeetyatyu ju', naa chachillanu bain balenguutyu ju'ba, ⁵entsa shinbu naa-uwanuba inu bulla ketintsun jutyu, umaa ya' mitya kavitu ke' kunu tsuyu", tyami.

⁶Tsandi dekuindake' dyatu Jesús tsandimi: Juntsa firu' kavitu kemu bale rukuren juntsa shinbunu kavitu ke' kushu juntsaa, ⁷¿nejtaa kayu Diosya yachi mi'ke' kaya chachilla, yanu naa mandala bain, naa kepe bain pakatindetsushu juntsaa, kavitu ke' kun jutyun? ¿Te' kavitu ke' kutyu' keenakaanu jun? ⁸Uwaindiyu, aa keedi'mujchin jeke kavitu ke'

^s 17.32 Génesis 19.15-17, 26 lende. ^t 17.36 Entsa bersikulu 36 griego palaachi manbiike' kaya kiikatala pu' bain, kayu ura' manbiike' kaya kiikatalaya putyuuve entsa: Pallu jeenbaasha depu' bain, mainya kaya' jiñuba, kamainya laranu tsuve.

balelamishtinu tsuve. ¿Tsaaren Chachi Tiya' Nakayamu entsa tusha maanu uwanu bain chachilla chaiba yanu keenguendetsu katajachunga?

Balendyamu chachi bain, ne chachi bain

⁹Jesús entsa kuinda bain laapu' pam, mantsa rukula ura' dejuyu tya', yala' pensashaa Dios naakesa tyañuba tsanguemu ruku deeyu tya', veelanu balejtu kuremu deeñu. ¹⁰Tsejtu yalanu tsandimi: Pai ruku aa eleshasha Diosba kuinda kenu jila; mainya fariseo chachi junmala, kamainya romano uñichi deechu' mitya lushi kamu chachi jumi.

¹¹Tsenñu juntsa fariseo rukuya uyudi' ya' pensachi entsandi Diosba kuinda kemi: "Dios, iya ñunu yuj ura' kive tinu tenve, matyu iyaa ne vee rukula tsaa, taanguemu ruku bain jutyu, firu' ruku bain jutyu, ne vee matsaimu ruku bain jutyuyu, tsenmin entsa deechu' mitya lushi kamu ruku tsaa bain jutyuyu. ¹²Iyaa semananu pai bijee ñunu pensanguiike' panda fityu jujuuyu; tsenmin naake lushi kan chu' bain juntsanu paitya pela vele' manbaateya ñunu kumuyu", tyami.

¹³Tsenñu deechu' mitya lushi kamu rukuya juntsa fariseo rukunu baka' uyuna' wayunatu, naa kai'sha majelukenuba tyatyu' llakindya', ya' tenbapunu pali' papatitu tsandimi: Dios, iyaa balejtu rukuyu, inu tenbityaka, iyaa ujcha lamuyu, timi.

¹⁴Jesús, entsandi kuinda deke' dyatu, yanu meenamulanu tsandimi: Uwaindiyu, entsa deechu' mitya lushi kamu rukuya ya' ujcha' mitya Dioschi ujcha tajtu kuraaya yasha miive, tsaaren fariseoya tsa-indyuve. Matyu mun kayu mu' mityaba yaa aawa juchi tyamuya balejtu kura' umingayanu tsuve, tsenmala mun tiba daj keewaatyu chachiya aawa kuranu tsuve, timi.

Jesús, kaillanu Dioschi ura' de-ikaami.

(Mateo 19.13-15; Marcos 10.13-16)

¹⁵Naa kaillanu bain Jesús' junga taji tajiila, Jesús kaillanu ta'ka' Dioschi ura' de-ikaasa tyatu. Tsenñun ya' disipulula dekatatu, kaillanu tajimulanu ajaa tila. ¹⁶Tsenñu Jesús kaillanu mikatu tsandimi: Kaila in junga janudetsu daatadityudei, matyu Diosnu yala' rei juu tanamulaya entsa kailla tsaalaa dejuñu' mitya. ¹⁷Uwaindiyu, mun Diosnu rei juu kure' kailla tsaa yanu meenguemu jui'shu juntsaa, naa-uwanuba Diosnu yala' rei juu tanan dejutyuve, timi.

Main taruku Jesúsbä kuinda kemi.

(Mateo 19.16-30; Marcos 10.17-31)

¹⁸Ma bale ruku Jesúsnu pake'meetu tsandimi: Ura ruku, ¿naa kenu juwa naa-uwanuba Diosba ura' chunuu? timi.

¹⁹Tsenñu Jesús tsandimi: ¿Nenñundiyu inu, ura rukui, timi? Ura jumiya, Diosren main ura ruku juuve. ²⁰Ñuya Dios naa naakidei tiñuba yumaa mive.

Entsaave: *vee matsuatyude; chachiitala tu'tyude; taanguetyude; anbuti' veelanu kuipa putyude; ñu' apanu bain, naa ñu' amanu bain balengure' ura' keewaade,*^u tive, timi.

²¹Tsenñu juntsa ruku tsandimi: Iya kaa musuumalaren kumuinchi juntsa demeenguen chumuyu, timi.

²²Tsandiñu Jesús meetu tsandimi: Tsaaren entsaa kayu kendyuve: miji! ñu ti ta'ba millangue ati!, juntsa lushi purelanu veede. Tsanguishu juntsaa, ñu selusha tsamantsa balen juu tadinu tsuve. Tsangue' maatu inu keengue' in bendala jade, timi.

²³Tsandiñu meetu, juntsa ruku mikä taruku' mitya, yuj llakindiyami. ²⁴Tsai! llakindyañu, Jesús tsandimi: ¡Main tarukuchi Diosnu ya' rei juu tananu mikä li'puve! ²⁵Main tarukuchi Diosnu ya' rei juu tananu mikä li'punchiren, ma kameyu ityu kapukanu pullainuuba juñuya, juntsa kameyu kayu ura' ne pullaichuve, timi.

²⁶Tsenñu veela meenamula tsandila: Tsaashu juntsaa, ¿maa livee inuu juchunga? tila.

²⁷Tsenñu Jesús tsandimi: Tyee chachillachiya naake' ken tsaa dejuñuba, Dioschiya imu tene judeeve, timi.

²⁸Tsenñu Pedro tsandimi: Lalaya ti taawa deju' bain juntsa millangue deshuike', ñu' bendaa dejayu, timi.

²⁹Tsenñu Jesús tsandimi: Uwaindiyu, mun Diosnu ya' rei juu tanan mityan naa ya' ya shuirike, naa ya' shinbu shuirike, naa ya' naatalalanu shuirike, naa ya' apalanu shuirike, naa ya' kaillanu shuirike' bain, ³⁰matyu entsa tusha chumujchiren juntsan mitya kayu pure' mangakenu detsuve, tsejtu bene Jainu juushu juntsa tinbunuya naa-awanuba Diosba ura' chunuuya tiyanu detsuve, timi.

Jesús peyanu ju'ba mawainmi.

(Mateo 20.17-19; Marcos 10.32-34)

³¹Jesús ya' 12 disipululanu vee mujtusha mikakitu tsandimi: Diosal' mitya pamu rukula piiketu Chachi Tiya! Nakayamu naa-inu tsuve ti' piikemuwa deeñu bain kumuinchi tsaa de-i' puinu tsuve, lala Jerusalénsha dejinmala.

³²Matyu judío chachi jutyula' tyapanu kuwanu detsuve, tsenmala yanu de-uukapu'kera, firu' depa'kera, inbi dekitsure'kera, ³³naa aste bain deke', bene tu'nu detsuve. Tsaaren peyatu pen malu insha mangujnu tsuve, timi.

³⁴Tsa tsandiñuren, yalaa jaiba aseetanguityu jujuula, tsenmin Jesús naati' tsandiñuba mijtu jujuula, matyu yaichi naake' aseetanguen tsaa juñu' mitya.

Kapuka putyu rukunu Jesús ura' mandiremi.

(Mateo 20.29-34; Marcos 10.46-52)

³⁵Jesús Jericó pebulu faajingumaintsu, ma ruku kapuka putyu, miñu kelunu chunatu, jundaa puimu chachillanu tyeeba paki pakikentsumi. ³⁶Tsanatu pure' chachi jijiindetsuñu mere' pake'meetu: ¿Tyee intsuñu deiyu pure' jiintsula? timi.

³⁷Tsenñu: Nazaretsha chumu Jesús endaa puintsuve, detiñu, ³⁸kapuka putyu ruku daran uti' patu tsandimi: ¡Jesús, Rei Davidnu sera' jamu Na, inu tenbityaka! timi.

³⁹Tsandiñu ajkesha jumula juntsa rukunu mandyasa ti' de-ajaatiñun, yaa kayu daran ma-ui'tu tsandimi: ¡Rei Davidnu sera' jamu Na, inu tenbityaka! tiitimi.

⁴⁰Tsenñu Jesús uidikatu, ya' junga taadei, timi. Tsenñu ya' junga kallen demiya' jiñu pake'meetu tsandimi: ⁴¹¿Iya ñunu tyee kesa tenguen? timi.

Tsenñu kapuka putyu ruku tsandimi: Rukui, inu kapuka katakaasa tenve, timi.

⁴²Tsenñu Jesús tsandimi: Tsaaya, katamu tiyade. Ñu uwain tsainu tsuve tya' kerangue' mityaa ura' mandive, timi.

⁴³Tsenñu juntsa uranuren kapuka dandajtu ruku katamu tiya! Jesúsba jindu: Diosya yuj urave, tisai jintsumi. Tsenñu kumuinchi chachilla entsaiñu keenamula bain: Uwain Diosya yuj urave, tiitila.

Jesús Zaqueoba

19

¹Jesús Jericó pebulunu vijitu, juntsa pebulunu pullantsumi.

²Tsenñu juntsa pebulunu main taruku chumi, ya' mumu Zaqueo, matyu deechu' mitya lushi kamuutala bale ruku. ³Juntsa rukuya, Jesús naaju ruku juuñuba katanbera tyaturen, yaa da'rukuku' mitya chachilla pure' buluu jiindetsuñu katanu jutyumi, ⁴tsejtu miñu ajkesha daran jitu ma chisha lu-i' keenami, junu Jesús puinu juñu' mitya.

⁵Jesús junu pullandu, kai'sha ke'lare' Zaqueonu katatu tsandimi: Zaqueo, apain manbjade. Uma ñu' yanaa tsunu tsuyu, timi.

⁶Tsandiñu Zaqueo chisha puturen jei manbajitu, Jesúsnu ya' yasha yuj sunden mikami. ⁷Tsenñu kumuinchi chachilla dekeenatu: Jesús ujcha lamu ruku' yasharen tsunu jive, ti' na'baasa paviikentsula.

⁸Tsenñu Zaqueo uiditu Bale Rukunu tsandimi: Uwain Rukui, in tananu lushi ma tsandaa purelanu deveenu tsuyu; tsenmin mantsa chachillanu anbuti' lushi kamuwaashu juntsaya, juntsalanu taapai bijee jungue mangunu tsuyu, timi.

⁹Tsenñu Jesús Zaqueonu tsandimi: Uma entsa yanu chumula liveejу detiyave, naa entsa ruku bain Abrahamnu sera' jamuren ju' mitya,

¹⁰matyu Chachi Tiya' Nakayamuya detupiyaa chumu chachillanaa mi'ke' livee kenu jañu' mitya, timi.

Lushi laanutala laapu' kuinda

¹¹Jesús tsandintsu chachilla demeenañu, manen vee kuinda malaapu' pam, matyu yumaa Jerusalénsha faajingumakaandetsu' mitya, tsenmin chachilla' pensaya Diosnu yala' rei juu tananu malu wajtunuren entsai katawanu juve detyañu' mitya. ¹²Tsenñu Jesús tsandimi: Main aa bale

chachilla' bulu ruku, baasha masku tusha jimi, junga jinmala ya' tusha mandanguen chumu rei tire' me-eenu deeñu. ¹³Tsejtu kayu lu' ji'mujchiren ya' taawasha kemu chachillanu paitya ruku mikatu, main main pen chu'chaya taawasha ke' lushi kakeñungue dekuwami. Tsejtu tsandimi: I majainshabi entsa lushinchi taawasha ke' kayu malaadei, ti' kuwami.

¹⁴Tsaaren ya' tunu chumu chachillaya yanu tyutyamu de' mitya, dewa'ditu ya' bendala ma bulu chachi kalare' junga eela: Entsa rukunuya lala' rei tirenu tendyuve, tita dejisa tyatu.

¹⁵Tsenñuren juntsa ruku rei tiya' maami ya' tusha. Tsai' maatu ya' lushi kuwa' shuikiñu chachillanu mamikami nan demalañauba pake'meenu.

¹⁶Tsenñu main ajke' jitu tsandimi: Rukui, ñu' lushinchi paitya bijee jungue kayu aa malaayu, timi.

¹⁷Tsenñu juntsa rei pakatu tsandimi: Ñuya ura' taawasha kemu chachi ju', jayu juunuren ura' keñu' mitya, challaya paitya pebulunu mandanguemu uñi tirenu tsuyu, timi.

¹⁸Tsenñu kamain bain jitu tsandimi: Rukui, ñu' lushinchi man bijee jungue kayu aa malaayu, timi.

¹⁹Tsenñu rei tsandimi: Ñunu bain man pebulunu mandanguemu uñi tirenu tsuyu, timi.

²⁰Tsenñuren kamain jimuya entsandimi: Rukui, enu ñu' lushi entsanave. Iyaa ñu' lushi katu jalichi kuluke' ne uukaakiyu, ²¹matyu ñuya naa mandangue' bain pajashkityu ju', naa ñuchi jutyuñu bain kayu aa mangamu ju', naa ñuya wajke' puka iwaatyumujchi bain puka iware' kamu juñu, ñunu jeetenñu' mityaa tsanguiyu, timi.

²²Tsenñu juntsa rei tsandimi: Ñu, ura' taawasha kityu ruku, ñu' palaachiren kuipa vi' kavitu inu tsuve. Ñu iya naake mandangue'ba pajashkityu rukuwañañu bain mimin, naa inchi jui'ñu bain manba'muwañañu bain mimin, naa iya wajtyumujchiren puka iware' kamuwañañu bain mishu juntsaya, ²³jenñaa lushi uukaanu yasha in lushi take' kuwai'yu, i yasha maatu juntsan mitya kayu aa manganutsu? timi. ²⁴Tsejtu rei tsandimi junu pumulanu: ¡Juntsanu lushi manchi'ketu, paitya bijee kayu aa malaakiñushu juntsanaa mangudei! timi.

²⁵Tsenñu yala tsandila: Rukui, ¡tsaaren yaa yumaa paitya bijee kayu aa tanashuba! tila.

²⁶Tsenñu rei pakatu tsandimi: Uwaindiyu, aa tanamulanuya kayu aa mangewanu tsuve, tsaaren jayun taalanuya naa ka jayun tadeeñu bain tsaa millai machipanu detsuve, timi. ²⁷Tsenmala inu rei tiyatuya tyamu kundaalanuya in ajuusha detaja' iya keenaren tu'dei, timi rei.

Jesús Jerusalénsha rei juuñuu vijimi.

(Mateo 21.1-11; Marcos 11.1-11; Juan 12.12-19)

²⁸Jesús tsandi' dyatu, kayu ajkesha jindu Jerusalénsha jinu miñuu jintsumi. ²⁹Tsai' jindu Betfagé kaa pebulusha bain, Betania kaa

pebulusha bain dekalen jindu, Ulibu chi chunu kuyi keesha dejitu, Jesús pallu ya' disipululanu entsandi pa' kaa pebulusha eemi: ³⁰Junbi vijitu ma kaa buru muba chudi' kerajtu teetsuraa uyuna katanu detsuve. Tsejtu juntsa kaa burunu langa' taadei. ³¹Tsenmala mun ñullanu: ¿Tyeenguenaa kaa burunu langandetsuyu? ti' depake'meenmalaya: Bale Ruku menesteve, tidei, timi.

³²Tsenñu juntsa pai disipulula kaa pebulusha jitu, Jesús naati pa' eeñu bain buru juntsana katajila. ³³Tsejtu kaa burunu langandetsunmalan buru miya rukula pake'meetu: ¿Tyeenguenaa kaa burunu langandetsuyu? tila.

³⁴Tsenñu ya' disipulula pakatu: Bale Ruku menesteve, tila.

³⁵Tsejtu Jesús' junga deta'tu, juntsa kaa burunu jali delakare', Jesúsnu e'lare' chujtila. ³⁶Tsa-i' ya jintsu kumuinchi chachilla Jesús' jinu miñu ajkesha dejitu, yala' jali miñusha lakare' jijiila balengure' keewaatu. ³⁷Tsejtu Jesús ya' disipululaba Ulibu chi chunu butyu kujtatala pajtyaindetsunmalan, junu yaiba bulu jive'mu chachilla: Dios yuj urave, ti' utis jijiila, matyu Dios tiba tsamantsaa jumula deke' keewaañu katamu de' mitya. ³⁸Tsejtu entsa entsandila:

¡Bale Ruku' mitya jamu Reiya,

Dioschi mikä ura' imuve!'

¡Kai'sha selusha tiba bulla jetyu jusa,

aa kai'sha chumu Diosnu

yuj urave detisa! tiitila.

³⁹Tsa tsa detiñu, mantsa fariseola chachilla' kejtsapala deputu, Jesúsnu tsandila: Rukui, ñu' bendaa nemu chachillanu tsandi pakaan jetyu nepade, tila.

⁴⁰Tsenñu Jesús pakatu: Uwaindiyu, yala dedyañuya, shupukalaa Dios yuj urave, ti' ui'chu deeve, timi.

⁴¹Tsejtu Jesús dekalen ji!, Jerusalén kata-ere', junu chumula' mitya waatu ⁴²tsandimi: Ñulla Jerusalén' chulla, tyee tiba bulla jetyu ura' chujtikaamuñuba umaren aseeta dekituya, juntsangue dekisa tenve. Tsaaren challa juntsa pantsunañuu juñu' mitya, ñuichiya naake' katan tsaave. ⁴³Matyu mandinbu ñulla' kundaala dejatu, ñulla' aa pebulu kapatala tu veeta deke', yatai de-uidija' dedalekenu detsuve. ⁴⁴Tsanguetu millangue senaa-ere', naa chachillanu bain detuteke', naa shupukala bain yaitala llai'nán jetyungue mushkenu detsuve, matyu Dios ñulla' junga jañuren ñulla dekeengui'ñu' mitya, timi.

Jesús aa elesha Dioschi ura' kuraa mandiremi.

(Mateo 21.12-17; Marcos 11.15-19; Juan 2.13-22)

⁴⁵Tsejtu Jesús bene Jerusalén aa elesha chunu veeta juusha vitu, junga tiba atin pumulanu avindala demajuka'laakemi. ⁴⁶Tsejtu tsandimi: Diosa' Kiikanu

tsandive: *In yaa Diosba kuinda kenu ya junu tsuve,*^w tive, tsaanuren ñullaya entsa yanu taamula' vi' pantsudinu tujuu tiredekiñuve, timi.

⁴⁷ Jesúsyä malumere juntsa aa eleshasha mijakares neneintsumi. Tsaaren chachilla' mitya Diosnu kalen jimula' bale rukula bain, naa Moisés' wandya lei mashturula bain, naa judíola' bale rukula bain yalaya Jesúsnu naaketaa tu'naa ju' bain juntsaaya mi'kes nentsula. ⁴⁸ Tsejturen naake'ba tibanguenu jutyu jujuula, matyu chachillaya Jesú's palaanu mika tejan meemeedediñu' mitya.

Jesúsnu: ¿Maa ñunu aantsangues nekaantsun? tila.

(Mateo 21.23-27; Marcos 11.27-33)

20 ¹ Ma malu Jesú's aa elesha chunu veeta juusha chachillanu Diosa'
mika ura kuinda ule' mijakare' pantsuren, chachilla' mitya
Diosnu kalen jimula' bale rukula bain, Moisés' wandya lei mashturula
bain, naa bale rukula bain bulu dejitu, ²Jesúsnu entsandila: ¿Ti' mityaa
entsangues nentsuyu? ¿Maa ñunu aantsangues nekaantsun? tila.

³Tsenñu Jesú's tsandimi: I bain ñullanu ma pake'mera kenu tsuyu,
tsenmala pakadei: ⁴¿Maa Juannu ere' mungares nenu tireñanga? ¿Diosya
tsanguiñanga? ¿Chachillaa tsa dekiñanga? timi.

⁵Tsenñu yaitala veta' veta' paviikendu tsandila: Lala naati' Juanya
Diosa' uudenchee tsangues nemuve tin tsa deeyu. Tsandishu juntsaa:
¿Nenñaa yanu keranguityuwa deeyu? tinu juve. ⁶Tsenmin naati' chachilla'
udenchee tsangues nemuve tin tsa deeyu. Tsandishu juntsaa, kumuinchí
chachilla lalanu shupukachi ty'a'ke' tu'nu dejuve, matyu yalaya uwain
Juanya Diosa' mitya pamu rukuwaave tyamu deeñu' mitya, tila. ⁷Tsanditu
yalaa: Juannu maa uudengue' mungaanu eemuwaanu bain mijdetuyu, tila.

⁸Tsa detiñu, Jesú's bain tsandimi: Tsaashu juntsaa, i bain ñullanu
wandin jutyuyu, maa inu entsangues nekaantsuñu bain, timi.

Firu' taawasha kemulanu Jesú's laapu' pamí.

(Mateo 21.33-44; Marcos 12.1-12)

⁹Tsejtu Jesú's bene laapu' kuinda ketu chachillanu entsandimi: Ma
ruku ya' tunu uva vijtya kemi. Tsanguetu bene veelanu medya washkare',
juntsa ruku pure' malu chunanu baasha jimi. ¹⁰Tsejtu ya' puka de-inshabi
main yachi taawasha kemunu eemi medya taawasha kemu rukulanu
yachi junuu pukaya mangaide titu. Tsenñuren medya taawasha kemu
rukula juntsa jimu rukunu deta'ke' tyanjuu me-eekila. ¹¹Tsenñu juntsa tu
miya ruku manen veranu bain me-eemi. Tsenñu juntsanu bain defiru' pa',
deta'ke', yanu bain tiba tajtu me-eekila. ¹²Tsejtu veranu bain manen me-
eeñuren, juntsanu bain taawasha kemula pure' bandeke' desmeengue',
vijtya kapasha kepukila.

¹³Tsejtu pulla'bi juntsa tu miya ruku tsandyami: “¿Umaa naa kenujtuwa? Ura in estyanu nanun eenu tsuyu; yanaa balengure' jeetya'ba inuulaa tenve”, tyami.

¹⁴Tsenñuren vijtya medya taawasha kemula ya' nanu katalan yai tene entsandila: Entsaas ya' apa peyanmala, yachi tiba mandashuwanuu jumuve. ¡Yanu tuteke!, lalaa kumuinchis entsa detashuwadaa! tila.

¹⁵Tsanditu deka' vijtya kapasha detake' ji' tu'la.

Tsejtu Jesús yalanu pake'meetu tsandimi: Ñuichiya, ¿juntsa vijtya miya ruku yalanu naa kenu juve tenguen? ¹⁶Matyu ji' yalanu detuteketu, juntsa vijtya veelanu medya taawasha kekaanu mangunu tsuve, timi.

Tsenñu chachilla Jesús tsandiñu demeetu tsandila: ¡Naa-uwanuba tsaaya ityusa tenve! tila.

¹⁷Tsenñu Jesús yalanu keetu tsandimi: Tsaashu juntsaya, Diosa' kiikanu:
Ya kemula' kepu shupukaa

kayu deenamishtimu shupuka tiyaive,^x ti' pillaashu juntsa ¿naa titundin?

¹⁸Matyu mun shupu' jandala pajtyai' bain de-ijchaa pajtyainu tsuve, tsenmala munaa juntsa shupuka pajñu bain, tsaa de-ijchaa jiiñu tsuve, timi. ¹⁹Tsenñu Moisés' wandya lei mashturula bain, chachilla' mitya Diosnu kalen jimula' bale rukula bain tsandiñu meenatu, juntsa uranuren Jesúsnu peesu kanu tyala, yalanu meewaanaa Jesús tsandi' laapu' pañuba demija' mitya. Tsejturen peesu kai'la, matyu yala tsa dekenmalaya chachilla yalanu firu' kichu deeve detya' mitya.

Deechu' mitya lushi paanguenutala (Mateo 22.15-22; Marcos 12.13-17)

²⁰Tsejtu yala dus keekeenatu, mantsa rukulanu ura' ken chumu ruku juuñungue keewaaidei ti', Jesús naatiñuba meenanu eela, tsejtaa ya firu' pañuba yala demeena' kuinda manguenmala, yala juntsan mitya kuipa pu' peesu deka' uñi' tyaapasha kuwanu tyatu. ²¹Tsejtu juntsa rukula Jesúsnu entsandi pake'meela: Rukui, lala mideeyu ñuya deechu' mijakaamu ju', naaju chachillanuba tsaren kiikemu juñu bain. Tsenmin ñuya Dios naaken chusa tyañuba uwain juntsangue mijakaamu juve. ²²Tsa' mitya, ¿naajun, lala romanola' kayu aa uñinu deechu' mitya lushi paanguentsuñu uranu jun? tila.

²³Tsejtu yala naatya' depake'meeñu bain Jesús mijatu tsandimi: ²⁴Inu ma paki lushi keewaakai. Entsa lushinu, ¿mu' kajuru muutee chun?, tsenmin ¿mu' mumaa enu pillan? timi.

Tsenñu yala tsandila: romanola' kayu aa uñichive, tila.

²⁵Tsenñu Jesús tsandimi: Tsaashu juntsaa, romanola' kayu aa uñichiya yanu kuwadei, tsenmin Dioschiya Diosnu kuwadei, timi.

²⁶Tsejtu Jesús cha' kejtsapalan juntsandi ura' pakañu' mitya, naake' tujlekare' kuipa pun tsandyatu ne dekeenbashi' pa'piyaila.

Pemula mangujnuala Jesúsnu pake'meela.

(Mateo 22.23-33; Marcos 12.18-27)

²⁷Mantsa saduceo chachilla, Jesús' junga jila. Tsejtu saduceo chachillaya pemula mangujtyu deeve timu de' mitya, Jesúsnu entsandi pake'meela: ²⁸Mashturu, Moisésya lala' mitya entsangue piike' shuikemuwaave: Main supungatun, ya' shinbunu nakakarei'mujchin peyashu juntsaa, ya' naatalaa juntsa biyuda shinbunu manga', pemu milla' mitya na seenguikaanu juve,^y ti' piikive. ²⁹Ma bijee entsaa i' puive: unbee na tene mandishpai naatala jula, tsejtu avenjuya supungatu na kakaatyumujchin peyami. ³⁰Tsenñu ya' benna bain ya' suyanu mangatu, ya bain na kakaatyumujchin peyami. ³¹Tsenñu kumuinchi ya' bennala bain ya' uñaku peyanmala, ya' suyanu manga' chuchudi' bain, na kakaatyumujchin millai peyala. ³²Tsenñu pulla'bi juntsa shinbu bain peyami. ³³Tsa' mitya, peyaturen demangujnu uranu, ¿naajaa ya' shinbu tirenu jun, yala mandishpai naatala jumula kumuinchi juntsa shinbuba chumuwa de' mitya? tila.

³⁴Tsenñu Jesús pakatu tsandimi: Entsa tusha chungamaya unbee rukula supulaba chumu deeve. ³⁵Tsaaren naajulanaa Dios kavitu dekenmala, yalaya tsaikutyanuu jumu deju', bene Jainu juushu juntsa tinbunu sunden machunu ju' mangujpanu deju' bain, yalaya supu mangaru bain, unbee mangayanu bain dejutyuve, ³⁶tsenmin yalaya manbeya bain in dejutyuve, matyu yalaya anjee juuñuya junu detsuve, tsenmin yalanu Diosya mangujteñu' mitya, Diosa^z na junu detsuve.

³⁷Tsenmin naa peyamula uwain mangujnu deeñuba Moisés' pilla kiikanu lento mijamu deeyu. Junbi da'chichii llu'kantsuve ti' pillaashu jundala Bale Ruku entsandive: *Iyaa Abrahamchi bain, Isaacchi bain, tsenmin Jacobchi bain yala' Diosyu,*^x tive. ³⁸Tsaju^y yaa pemula' Dios jutyuve, chumula' Diosve, yachiya naajula bain chundene denañu' mitya, timi Jesús.

³⁹Tsenñu Moisés' wandya lei mashturula mantsalaya tsandila: Rukui, ura' pave, tila. ⁴⁰Tsanditu umaa manbake'meenu tyatyui tiyala.

Dioschi Mi'ke' Kayamu munaa sera' jañu bain

(Mateo 22.41-46; Marcos 12.35-37)

⁴¹Tsenñu Jesús yalanu pake'meetu tsandimi: ¿Nenñu detin Dioschi Mi'ke' Kayamuya Davidnaa sera' jamu nave tiitila, ⁴²matyu Davidren Salmos liburunu entsangue piikemuñuba?

Bale Ruku Dios in Bale Rukunu tsandive:

In urandyasha chudide,

43 iya ñu' kundaalanu

ñu' neepa teetanainsha detsurenbera kendyuya,^a timuwaave.

44 Tsaaaren Davidren Dioschi Mi'ke' Kayamunu Bale Ruku
tiitimuwaanuba, ¿nejtaa yanu sera' jamu nanu jun? timi Jesús.

Moisés' wandya lei mashturula tsaa jun jutyu

(*Mateo 23.1-36; Marcos 12.38-40; Lucas 11.37-54*)

45 Kumuinchi chachilla demeenaren Jesús ya' disipululanu tsandimi:

46 Nullaya Moisés' wandya lei mashturula tsaa jutyudei. Yalaya jali
aabare pana nenum ajchu deeve, tsenmin miñtala yalanu vee chachilla
katatu, yalanu aawa kure', ura' dejusa tiidetisa tyatyaimu deeve, tsenmin
yala cha' waku wakudinu yasha ji'il bain, kayu bale rukula' chuchudinu
chunjuuya mitya kemu deeve, tsenmin naa fandangu ke' wa'di'
panda fifikensa bain, kayu ura' chunjuuya mitya mityakemu deeve.

47 Tsenmin naa biyuda shinbulanu yala' ya dechi'ke' bain, tsanguiñu
jutyuu keewaanu tyatu, Diosba kuinda kemiya bare' kuinda kiikemu
deeve. Tsa deju' mityaa Dioschi kuipa vi' kayu taaju inu detsuve, timi
Jesús.

Diosnu biyuda shinbu' kuñu lushi

(*Marcos 12.41-44*)

21

¹ Jesúaa eleshasha putu, tarukula Diosnu lushi kutu,
kajunnu pupukindetsu keenami. ²Tsanguendetsuren ma
biyuda pure kaa shinbu bain pai kaa lushi pakijunnu puntsu
keenami Jesús. ³Tsejtu Jesús tsandimi: Uwaindiyu, entsa pure biyuda
kaa shinbaa naa pai kaa lushi pakijuke' bain, kayu kumuinchi
tarukulanu pullake aa puñu' kive, ⁴matyu tarukulaya yaichi
laramuren pudekeñu' mitya. Tsaaaren entsa pure biyuda kaa shinbuya
panda ka' finu lushi tsantsa tanatun ma depuke' mityaa, kayu aa
puñu' kive, timi.

Aa elesha senaa-eranu juñu Jesús wainmi.

(*Mateo 24.1-2; Marcos 13.1-2*)

⁵Mantsa chachilla, aa eleshanu juntsa shupukala bain, naa aa elesha
juusha Diosnu dekeeware' kelutala demai'teñu tsanamula bain yuj uukera
deeve, ti' papatintsula. Tsenñu Jesús tsandimi: ⁶Nulla kataakendetsushu
juntsa ma malu desenaaji-i', naa ma shupukaba dijkii tsutyui senaa-eranu
detsuve, timi.

De-inu malu kalenainsha tyee i' pullantsunuñuba
(Mateo 24.3-28; Marcos 13.3-23)

⁷Tsenñu yala pake'meetu tsandila: Rukui, ñnaamaa tsaa de-i' puinu jun? ñTyee intsuñaa, uwain yumaa juntsaa i' puinu kalenañuba mijanu dejعوا؟ tila.

⁸Tsenñu Jesús tsandimi: Ñnulla naa-uwanuba pashkatyudei, veelachi anbutikayatyudei. Matyu iya jutyuren: Dioschi Mi'ke' Kayamuyu timula pureitu: Yumaa de-inu ura tiyave, tis neneinu detsuve. Naa tsa detiñu bain meeditiyudei. ⁹Tsenmin naa vee vee tu' chumu chachilla bain peletu dekeñu, naa ma tu' chumuutala bain peletu deke' vinguenu tsuve detiñu bain, wapantyudei, matyu entsaa jumulaa ajke' de-i' puinuuñaa tsainu tsuve, tsejturen kayu millai de-inu maluya jaindyunu tsuve.
¹⁰Tsejtu kayu entsa bain tsandimi: Manbaate chachilla, kamanbaate chachillaba devingue'kera; manbaate tu' chulla, kamanbaate tu' chullaba vingue'kerakenu detsuve. ¹¹Kala bain daran ke'kerake, vee vee mujtusha panda bain yamuj tiya'kerake, naa diipeya bain defaanu tsuve. Tsenmin Diosyaa tsanguentsuve tyainuu ke' keewaañu selusha bain uu jeetyanuuba dekata' wapannu detsuve. ¹²Tsaaren kayu tsaa de-i' pullaindyuren, ñullanu firu' kenu bendaa ke' deka', cha' waku wakudinu yasha taji', kavitu ke' kuipa pu' peesu pupukenu detsuve. Tsangue' in mityaren ñullanu reila' ajuusha bain, naa uñila' ajuusha bain ta'nú detsuve. ¹³Tsa dekenmalaya in mitya yalanu patinuu faanu tsuve. ¹⁴Tsa' mitya ne naati pakeechunga tyan chutyudei. ¹⁵Juntsa uranu iyaa ñullanu ura' aseetanguikare' pakakaanu tsuyu. Tsenmala naa maliba ñulla' kundaala ura' deechu' paindetyuve, ti' masmi' pan dejutyuve. ¹⁶Tsenmin ñullanu ñulla' apalaren, ñulla' naatalalaren, ñulla' bulularen, ñuichi ura' keranu chachillaren bale rukulanu wandi' kakaanu detsuve. Tsenmala yala ñullanu mallee tu'nú dejuve. ¹⁷Tsenmin in mityaren kumuinchí chachilla ñullanu tyutyanu detsuve. ¹⁸Naa tsaañu bain, ñulla naa ma achuwa juuñuba piren dejutyuve. ¹⁹Tsajú' ñulla naake ura' kerangue' jindu bain tsaaren jindetsushu juntsaa, livee i' ura' chunu tiyanu detsuve.

Jerusalén millai senaa-eranu tsuve.

²⁰Naamaa Jerusalén pebulunu suutadula tsaa yatana uina dekata'ba, juntsa aa pebulu wajtunuren desenaa-erainu tsuve tyadei. ²¹Tsenmala Judea tu' chullaya bui'sha denepidei, tsenmala Jerusalénsha chumulaya pebulunu delu' jidei, tsenmala mantsa jeenbaasha pumulaya Jerusalénsha mavityudei, ²²matyu juntsa malutalaas Diosa' Kiikanu naati' naa naake taaju deke' puinu detsuve ti' pillawaañuba tsaa de-i' puinu malu junuuñu' mitya. ²³Juntsa malutala naaju shinbula napuu dechu' bain, naa chu'fimu kailla miyaa dechu' bain, mika taaju kenu detsuve, matyu juntsa malutalaas

entsa tusha tsamantsa taaju ke' llakingueno detsuve, tsenmin entsa chachillanuya Dios tsamantsa ajaaty'a defiru' kenu tsuve.²⁴ Mantsalaya vingue' depayanmala, vejanlaya veelachi dekaya' nuka tushaba takanu detsuve. Tsenmala Diosnuya keranguityu chachillaya Jerusalén pebulunu naakendya'ba tsanguen chunu detsuve, yaichi tsangue firu' kenu malu de-indyuya.

Chachi Tiya' Nakayamu maanu malu
(Mateo 24.29-35, 42-44; Marcos 13.24-37)

²⁵Tsenmin naa pajtasha bain, naa kepe pajtasha bain, naa makaratala bain tyeeba i' Diosyaa tsanguentsuve tyainuu jumula i' pullantsunu tsuve. Tsenmin naa ferasha bain pisunda la' jelekenu kalundintsuñu, kumuinchi tusha chumu chachilla jelanchin tyee i' tsaintsuñuba aseetangui'nu detsuve. ²⁶Tsenmin selusha bain tituba i' depi'shikentsuñu, chachillaya tyee indu de-iwa tyandu jelanchin dedesmee-iintsunu dejuve.^b ²⁷Tsenmala Chachi Tiya' Nakayamu ñivijchasha ya' pudeechi tsamantsa pi'juruu majaintsu' kataanu tsuve.^c ²⁸Tsa' mitya kumuinchi entsaa de-i' pullantsunmalaya, sunden pensa demangue' kujpaiñu-i' keenadei, matyu wajtutalan livee inu deju' mitya, timi.

²⁹⁻³⁰Tsenmin entsa bain laapu' kuinda ketu tsandimi: Naa igu chi juunu bain, naa kayu vee chi juulanu bain, matyu ya' jaki nakululuu tene mandiyaindetsushu juntsaa, yumaa shu tinbu pullantsuñaa tsaintsuñuba ñulla keemi deeve. ³¹Tsa' mitya entsa bain tsaren juve, entsaa de-i' pullantsu katashu juntsaa mijanu dejuve, naa Diosnu rei juu tananu malu yumaa kalenañu bain.

³²Tsenmin uwaindiyu entsa tinbunu chumu chachilla kayu peyaindetyuren kumuinchi entsaa de-i' puinu tsuve. ³³Naa selu bain, naa tu bain millai' de-i' puiñuba, iya naatiñu bain juntsalaya uwain tsainbera inu detsuve. ³⁴Tsenmin ñulla tiba firu' juunu tene amañandyainu kityudei, viñatyudei, tsenmin ñuichi tiba uraanuunu tene aa pensaa chutyudei, tsejtaa ñulla' tenbuka puluuñuu tiwaan jutyu. Tsaaba dechushu juntsaa, ñulla yanu keenabanai'nu malunu maja' katawainmalaya ³⁵ñulla animaayaaba ju' ilachi kayan tsa-i' naa-in tsaa tiyainu detsuve, matyu juntsa malunuya naajulanu bain maja' katawanu tsuve. ³⁶Tsa' mitya naa-uwanuba Diosba kuinda kiikentsudei, tsenmalaa tyee inuuñu bain tiba ityumujchi pulla pullainutsu. Tsejtaa Chachi Tiya' Nakayamu' ajuusha jelajtu ñulla punu detsuve, timi.

³⁷Tsejtu Jesús mandalaya malumere aa eleshasha vi', Diosa' mika ura kuinda mijakaakaa keturen, kepenmalaya pebulu kapasha Ulibu chi chunu kuyisha ji' tsutsudiimi. ³⁸Dishkepenenemee kumuinchi chachillaya aa eleshasha jijiila kuinda meemeenanu.

Judas, Jesúsnu peesu kakaanu pami.

(*Mateo 26.1-5, 14-16; Marcos 14.1-2, 10-11; Juan 11.45-53*)

22

¹Tsaintsuren pujkikaantsumi putyu pan fi' fandangu kiikenu malu yumaa kalen jantsumi. Juntsa fandangunaa Dapulla' livee kiñu fandangu tila, Bale Ruku Israel chachillanu tu'tyu' tsaa ne dapullaimuwaañu.^d ²Chachilla' mitya Diosnu kalen jimula' bale rukula bain, Moisés' wandya lei mashturula bain Jesúsnu tu'nu tyaturen naaken tsandyantsula, chachillanu dejeetya' mitya.

³Tsenñuren Jesúschi 12 disipulu jumulanu, matyu Judas Iscariotenu Satanás ya' tenbukasha viiñu, ⁴chachilla' mitya Diosnu kalen jimula' bale rukulanu bain, naa aa elesha washkekaamu bale rukulanu bain ji' kuinda kiimi naaketaa Jesúsnu kakaanuu ju'ba. ⁵Tsenñu bale rukula yuj desundiyatu, lushi paanguenu tila. ⁶Tsenñu Judas tsanguiñu urave tyatu, chachi aa deputyunu uranaa Jesúsnu ka' balela' tyaapasha kuwanu mi'kes neneimi.

Jesús kayu peyai'mujchi ya' disipululaba panda fimi.

(*Mateo 26.17-29; Marcos 14.12-25;*

Juan 13.21-30; 1~Corintios 11.23-26)

⁷Pujkikaantsumi putyu pan fifikenu ajke' malu umaa chayami, matyu Dapulla' livee kiñu fandanguchi llupu kaa uveja tute' fifikenu malu.

⁸Tsenñu Jesús Pedronu bain, Juannu bain entsandi' eemi: Ajke' ji' Dapulla' livee kiñu fandanguchi finu panda kentsudei, timi.

⁹Tsenñu yala tsandila: ¿Nunbanaa juntsa panda kenu dejuwa? tila.

¹⁰Tsenñu Jesús tsandimi: Pebulusha jidei, tsejtu junga ma unbere tu piyamanu pi puu, nanaa jintsu katatu, juntsa ruku' bendala jiidei, tsejtu ya nunbanu viñu bain junbi vitu, ¹¹ya miya rukunu entsandidei: Mashturu tsandive: ¿In disipululaba Dapulla' livee kiñu fandanguchi panda finu suku nunbanaa jun? tive, tidei. ¹²Tsenmala ya miya ruku katyu dijkisha main aa suku panda ke' finun jutyuu keewaanu tsuve. Tsenmalaa junu panda kidei, timi.

¹³Tsenñu yala jitu, Jesús naati pañuba tiba juntsana dekatajitu, junu Dapulla' livee kiñu fandanguchi finu panda kila.

¹⁴Tsejtu umaa panda finu ura tiyañu, Jesús ya' mitya kuinda kenu lara' eramu rukulaba panda finsha chunatu^e ¹⁵tsandimi: Iya kayu peyai'mujchiren ñuiba Dapulla' livee kiñu fandangu panda finu ajchundenmuwaave. ¹⁶Tsaaren uwaindiyu, Dapulla' livee kiñu fandangu panda jungajte fifikentsutyumujchi Dios rei ju' chuinsa tiba tsaa de-i'

^d 22.1 Éxodo 12.13 lende. ^e 22.14 Ura pañuya *chunatu* tityumujchi, *tsunatu* tinuuya juve, yala fandangu ke' panda fintsumiya tsunatu tene panda fifikemuwa deeñu.

pullannmala mafikenu tsuyu, timi. ¹⁷Tsejtu Jesús ma basu kake', Diosnu yuj urave ti' dyatu, ya' disipululanu tsandimi: Ñuitala entsa vele' kushdei, ¹⁸matyu uwaindiyu entsa binu ne jungajte kujchi kujchiki'mujchi Diosnu rei juu tananu malu janmala mangujchikenu tsuyu, timi.

¹⁹Tsanguetu bene pan bain ka', Diosnu yuj urave ti' dedale', ya' disipululanu deveetu tsandimi: Entsa pan in buluve, ñnulla' mitya kuwainuushu juntsa. Naa-awanuba entsanguikidei inu mandenganu, timi.

²⁰Tsejtu panda defi' dyatu, binu pumu basu bain ka' tsaren ketu tsandimi: Entsa binu basuya in asave, kasa bijee ñuiba veta' veta' tsanguedaa tiñu keewara jumu, matyu ñnulla' mitya shajaakara asa.

²¹Tsaaren challa ñnulla mijadei, firu' kekaanu wandi' inu kakaantsumu ruku ibaren enu chuve. ²²Tsaju' Chachi Tiya' Nakayamuya, tyee i' puinuu juñu bain uwain juntsaa de-i' puinu tsuve, tsaaren ;firu' kekaanu wandi' inu kakaanuu jumu rukuya mika taaju i' puinu tsuve! timi.

²³Tsenñu yaitala pake'meetu: ¿Maa tsangue' kakaanu juñundin? tiitila.

¿Maa kayu bale rukutun? ti' pake'meela.

²⁴Disipulula yaitala veta' veta' depatintsula: ¿Maa kayu yaitala bale rukutun? tiititu. ²⁵Tsenñu Jesús tsandimi: Judío chachi jetyu reila yala' chachillanu naake uudenguen chunu tya'ba tsanguen dechutu, naa firu' rei dejub'a, ya' chachillachiya ura reive tikutimu deeve. ²⁶Tsaaren ñullaya tsa jutyudei. Naajaa ñuitala kayu bale ruku juchi tya' bain, kayu wajkayi juuñuu kurade. Tsenmala naajaa mandanguemu juchi tya' bain, yaa manda-i', veelachi tiba ke' kuwa kuwakemu jude. ²⁷Matyu, ;naajaa uwain kayu bale ruku junu jun? ¿Panda finsha chudi' fimuu? Tsa jutyub'a, ;panda chujti' kumu rukuu? Uwain, panda finsha chudi' fimu rukaa kayu bale rukuve. Tsaañu bain iyaa ñuichi panda chujti' kumu ruku juuñuuyu.

²⁸Ñullaa in taaju i' puinu uwatala naa-awanuba iba bulu pumuwa deeve. ²⁹I bain ñullanu rei detiwaanu tsuyu, inu bain in Apa naake' rei tiwaañuba juntsaju. ³⁰Tsenmala iya rei ju' chuinsa ñulla iba bulu dechudi' panda fimin kushminguen detsuve, tsenmin reila' chuchudinu chunjurunu bain chudi', Israel chachilla 12 bulu sera' jimu chachillanu kavitu kenu detsuve.

Pedro Jesúsnu kerajtuyu tinu tsuve.

(Mateo 26.31-35; Marcos 14.27-31; Juan 13.36-38)

³¹Tsejtu Jesús tsandimi: Simón, ñullanu Satanás mika taaju puiware' trigu ñinu ya' kuyaba walla'eenu naake pi'shinu deeñuba juntsanguenu ti' uuden pa've. ³²Tsaaren iya ñu' mitya Diosnu la'kade ti' pa'yu inu dera' kerangues jintsunutsu. Tsaaren ñu veta' pensa mangue' kayu dera' mandimiya, ñu' keranguemu naatalalanu deelamishtide, timi.

³³Tsenñu Pedro tsandimi: Bale Rukui, iya naa ñubaren bulu peesu viinuu ju' bain, naa tutainuu ju' bain tsainuu juuyu, timi.

³⁴Tsenñu Jesús tsandimi: Pedro, uwaindiyu ñu uma keperen, kayu wallapa utindyun, pen bijee inu kerajtuyu tinu tsuve, timi.

Jesús' disipulula ti ken tsandyanu jula.

³⁵Tsejtu Jesús yalanu pake'meetu tsandimi: ¿Iya ñullanu kaspele eetu, naa jali buusa bain jutyu, lushi bain jutyu, sandalia bain jutyu eeñu, ñuichi tyee jutyuwaajun? timi.

Tsenñu yala tsandila: Tiba jundene juwaave, tila.

³⁶Tsenñu Jesús tsandimi: Tsaaren challaya lushi tashu juntsaa ta'dei, naa jali buusa bain tashu juntsaa ta'dei, tsenmin peeniya tajtushu juntsaa, ñulla' manbaali ati', juntsa lushinchee peeniya ati'kadei.

³⁷Matyu uwaindiyu, inu naa-i' puinu tsuve ti' pillawaanu bain tsaa de-i' puinu tsuve. Entsa pillawaave: *Ti uudentalaba meenguityu chachillaba ya bain juntsaañuu kurave,f tive.* Tsaju' in mitya naati pa' pillawaanu bain challa tsaa de-i' puinu tsuve, timi.

³⁸Tsenñu yala tsandila: Rukui, enu pai peeniya detanayu, tila.

Tsenñu Jesús: ¡Tsandityukai! timi.

Jesús Getsemanísha Diosba kuinda kemi.

(Mateo 26.36-46; Mateo 14.32-42)

³⁹Jesús Jerusalénbi putu, ya tsa tsaimu' mitya, Ulibu chi chunu kuyisha jimi. Tsenñu ya' disipulula bain bendaa jila. ⁴⁰Tsejtu juntsa tenabi miitu, ya' disipululanu tsandimi: Diosba kuinda kiikentsudei, ñullanu ujcha kenu pensa lai'nutsu, timi.

⁴¹Tsejtu Jesús ya' disipululanu baka' ji', shupuka detya'keñu tsai baa jitu, junu Jesús teledi' Diosba kuinda ketu tsandimi: ⁴²Apa, ñuren inu livee kenu tenñuya, entsa tsamantsa taaju ke' pullainu juuwashu juntsanu livee kika. Tsaaren iya naakenu tyañuba juntsaa jutyusa; matyu ñu naakenu tenñuba juntsaaya kide, timi.

⁴³Tsenñu ma anjee selusha pumu ja' katawami Jesúsnu madeendyawaanu. ⁴⁴Tsejtu yaa tsamantsa taaju tya', naaken tsandya' llakindiyantsutu Diosba kayu tejan pensangue' kuinda kiikemi. Tsenñu ya' chipi asa kulili keraaya la' tusha pajtya pajtyaila.^g

⁴⁵Tsejtu Jesús ya' Apaba kuinda ke' dyatu, mangujpa', ya' disipulula' puinsha miitu, ya' disipulula yuj dellakindya' mitya kasu'tsudena mangatajimi. ⁴⁶Tsejtu Jesús tsandimi: ¿Nenñu denayu ñulla kasu'tsunala? ¡Mangujpadei! Diosba kuinda kiikentsudei, ñullanu ujcha kenu pensa lai'nutsu, timi.

f 22.37 Isaías 53.12 g 22.43-44 Mantsa kayu ura' manbiike' kaya tinbu kiikatalaya bersikulu 43 bain, 44 bain putyuve.

Jesúsnu peesu kala.

(Mateo 26.47-56; Marcos 14.43-50; Juan 18.2-11)

⁴⁷ Jesú斯 kayu tsandi' pantsuren ya' junga chachilla pure' jiila. Tsenñu Judas, ya bain 12 disipulu jumulaba buunamu ruku, vee chachillanu miya' jitu Jesúsnu kalen jiimi yanu estinu. ⁴⁸ Tsenñu Jesú斯 tsandimi: Judas, ñu Chachi Tiya' Nakayamunu wandi' kakaanaa tsangue' esti' keewaatunguiyu? timi.

⁴⁹ Tsenñu Jesú斯ba pumu disipulula tyee i' puintsuñuba dekeenatu tsandila: Rukui, ¿peeniyachi vinguenu dejewa? ti' pake'meela. ⁵⁰ Tsejtu ma disipuluya chachilla' mitya Diosnu kalen jimula' kayu aa bale rukuchi taawasha kemu chachinu peeniyachi ya' urandyu pungui daapukemi, ⁵¹ tsenñu Jesú斯 ya' disipululanu tsandimi: ¡Tsanguityudei, dyadei! timi. Jesú斯 tsanditu, juntsa rukunu ya' punguinu ta'kake' ura' mandiremi.

⁵² Tsanguetu Jesú斯, yanu kanu jamula, chachilla' mitya Diosnu kalen jimula' bale rukulanu bain, aa eleshasha washkekaamu rukulanu bain, bale rukulanu bain tsandimi: ¿Nennu deiyu ñulla iya taamu rukaaba juñu kanu jan tsa de-i', naa cha'lli juula bain, naa peeniya juula bain taa jala? ⁵³ Iya kaspele ñuiba malumere aa eleshatala pupunañuba inu kanu kityuwa deeve ñulla. Tsaaren challa dishkejtsa chumu Dyabulunu, Dios tsanguekaañu, ñuichi tsanguenu malu faañu deive tsaila, timi.

Pedro: Jesúsnu kerajtuyu, timi.

(Mateo 26.69-75; Marcos 14.66-72; Juan 18.15-18, 25-27)

⁵⁴ Tsenñu Jesúsnu peesu katu, chachilla' mitya Diosnu kalen jimula' kayu aa bale ruku' yashaa tajila. Tsenñu Pedro bain yalanu baatala suree ne jiintsumi. ⁵⁵ Tsai' jiñu, ya juru kejtala avindaa tenanu ñi dejukare' ñinguelu dechuñu, Pedro bain yaiba ñingueesha chuimi. ⁵⁶ Tsenñu main taawasha kemu shinbu Pedronu ñinguelu chuna katatu, yanu ura' keendu tsandimi: Entsa ruku bain yaba nemuve, timi.

⁵⁷ Tsenñuren Pedro tsandimi: Tsa jutyuve, shinbu; iyaa yanu kerajtuyu, tikami.

⁵⁸ Tsenñu bene kamain bain yanu katatu tsa mandimi: Ñu bain uwain yaiba nemuve, timi.

Tsenñu Pedro tsa mandimi: Ruku, yaiba nemu jutyuyu, timi.

⁵⁹ Tsandiñu bene ma ura iiñu-insha kamain bain tsandimi: Entsa ruku bain uwain yaba nemuve, matyu entsa ruku bain Galileasharen chumu' mitya, timi.

⁶⁰ Tsenñu Pedro tsandimi: Ruku, ñu tyee pantsuñu bain iya aseetanguindyuyu, timi.

Tsenñu juntsa uranu, Pedro tsandi' pantsuren, wallapa ui'mi. ⁶¹ Tsenñu Bale Ruku yate' Pedronu ke-eeñu, Pedro mandengami naa Bale Ruku yanu: Ñu uma kepe, kayu wallapa utindyuren, pen bijee inu kerajtuyu, tinu tsuve, timuwañañu.

⁶² Tsejtu Pedro junu malu' miji' avindala mafaatu mikä llakindya' waami.

Jesúsnu debande' uukapula.
(Mateo 26.67-68; Marcos 14.65)

⁶³ Jesúsnu washnamu rukula uukapu' ta'kendu, ⁶⁴ kapukanu jali tele' tsandila: Ñu, aseetangue' pamushu juntsaya, challa maa tsangue' ñunu keñuba wainka, tiitila. ⁶⁵ Tsejtu tsandi' kayu tituba kentsure' pa' bulla papatila.

Jesús bale rukulachi kavitu imi.
(Mateo 26.59-66; Marcos 14.55-64; Juan 18.19-24)

⁶⁶ Umaa dechayañu judíola' bale rukula bain, chachilla' mitya Diosnu kalen jimula' bale rukula bain, Moisés' wandya lei mashturula bain wa'dila. Tsejtu kavitu kiikenu yasha Jesúsnu take! ji' pake'meendu tsandila: ⁶⁷ Ñu uwain Dioschi Mi'ke' Kayamushu juntsaa, lalanu wainka, tila.

Tsenñu Jesús pakatu tsandimi: Naa iya: Juntsayu, tiñu bain, keranguenu dejutyuve. ⁶⁸ Tsenmin naa i bain ñullanu pake'meeñuba, jaiba pakan dejutyuve. ⁶⁹ Tsaaren umaa entsa ajkeshaya Chachi Tiya' Nakayamu tsamantsa pude Diosa' urandyasha chunananu tsuve,^h timi.

⁷⁰ Tsenñu kumuinchi depake'meetu tsandila: Tsaashu juntsaya, ¿ñu uwain Diosa' Nayu? tila.

Tsenñu Jesús pakatu tsandimi: Ñullaa tsandindetsuve, timi.

⁷¹ Tsenñu yaitala tsandila: ¿Tyeenguenaa kayu veelanu pake'meenu keenanu dejuwa? Ya! fi'pakichiren tsandipañu lala ma meradekiyu, tila.

Jesús Pilato' ajuusha
(Mateo 27.1-2, 11-14; Marcos 15.1-5; Juan 18.28-38)

23 ¹ Tsejtu yala kumuinchi demangujpatu, Jesúsnu romano uñi, Pilato' jungaa tajila. ² Tsejtu junbi Jesúsnu kuipa pu' patu tsandila: Entsa ruku lala' chachillanu uñinu meranguyudei ti', masmi' firu' kekaantsuve, tsenmin romanola' kayu aa uñinu bain deechu' mitya kaya lushi paanguyudei tiitimuve, tsenmin yaa Dioschi Mi'ke' Kayamu rukuyu ti', yaa reiyu tiitive, tila.

³ Tsenñu uñi Pilato, Jesúsnu pake'meetu tsandimi: ¿Ñaa judíola' reiyu? timi.

Tsenñu Jesús pakatu: Naa tsandintsuve, timi.

⁴ Tsenñu Pilato chachilla' mitya Diosnu kalen jimula' bale rukulanu bain, kayu veelanu bain tsandimi: Iyaa entsa rukunu ti kuipa juuba kataindyuyu, timi.

⁵ Tsenñu yala kayu daran patu tsandila: Kumuinchi Judea tu' chullanu defiru' mijakaakentsuve. Tsangue' Galileabi mijakaamin, enbi jangue firu' mijakaantsuve, tila.

Jesúsnu Herodes' junga tajila.

⁶Tsa detiñu Pilato meetu, ¿Uwain juntsa ruku Galilea tusha chumuu? ti' pake'meemi. ⁷Tsenñu yala Jesús Galilea tusha chumuve detiñu, Pilato Jesúsnu Galileasha chumu uñi' jungaa eemi, ura pañuya Herodes' junga, matyu Herodes juntsa malutala Jerusalénbi puñu' mitya.

⁸Herodesya Jesúsnu katatu yuj sundyami, matyu yaa yumalaren Jesúsnu katanu tyamuwa' mitya, tsenmin yaa Jesúsnu delaapu' pañu kuindaren ne meemeekemuwaami, tsenmin Jesús yanu bain Diosyaa tsanguekaantsuve tyainuu ke' keewaasa tyamuwaami. ⁹Tsejtu Herodes Jesúsnu pure' pake'meekemi, tsenñuren jaiba pakai'mi. ¹⁰Tsenñu yanu kuipa pumula chachilla' mitya Diosnu kalen jimula' bale rukula bain, Moisés' wandya lei mashturula bain depu' mitya, yuj kuipa pu' papatintsula. ¹¹Tsenñu Herodes ya' keenu mi'namu bale rukulaba Jesúsnu balejtu dekure' dya' kayu jungajte uukapunu tyatu, Jesúsnu balela' pannu bale jali pi'kelaa pandekila. Tsanguetu bene Herodes, Pilato uñi' jungaa Jesúsnu me-eemi. ¹²Tsanguendu juntsa malunuya Pilato Herodesba kundaa jumuwaalaren, ura' keranu chachi juu tiyaila.

Jesúsnu tu'nu shuwala.

(Mateo 27.15-26; Marcos 15.6-15; Juan 18.39—19.16)

¹³Tsenñu Pilato naa chachilla' mitya Diosnu kalen jimula' bale rukulanu bain, naa judío bale rukulanu bain, naa chachillanu bain dewa'kaatu ¹⁴tsandimi: Nulla entsa rukunu inu detaatu, naaju chachillanuba uñilanu kundaa lawaanu kiikemuve detive. Tsenñu ñulla demeenaren iya yanu pake'mere' bain, ñulla yanu kuipa pu' patindetsushu juntsaya jaiba kataindyuyu. ¹⁵Naa Herodes bain ti kuipaba katatyu' mityaa, lala' junga me-eeve. Tsaju' Jesúsyta tutainuu kuipayatajtuñu' mitya, ¹⁶asten kikareke', livee ke' me-eenu tsuyu, timi.

¹⁷ⁱ ¹⁸Tsenñu kumuinchi chachilla daran patu tsandila: ¡Juntsanuya tu'dei! ¡Barrabásnaa lala' mitya livee kidei! tiitila.

¹⁹Tsaaren entsa Barrabásya chachillanu Jerusalén' uñilanu kundaa detiware' firu' dekikaren mitya bain, tsenmin cha' tuten mitya bain peesu pumi.

²⁰Tsenñu Pilatoya Jesúsnu livee kenu tya' mitya, manbammi. ²¹Tsenñu yala daran uti' manbatu tsandila: ¡Kuusanu tu'pukaade! ¡Kuusanu tu'pukaade! tiitila.

ⁱ **23.17** Entsa bersikulu 17 griego palaachi manbiike' kaya kiikatala pu' bain, kayu ura' manbiike' kaya kiikatalaya putyuve entsa: *Matyu Dapulla tinu fandangu kenu malutala Pilato uñi, chachilla naaju peesu pumunaa me-e'laade ti' depa'ñuba juntsanu me-e'larenbera kenuu juwaami.*

²²Tsenñu Pilato entsaba pen bijee pandu tsandimi: Tsaaren ḥtyee firu' ken? Iyaa entsa rukunu tiba peyainuu kuipaya kataindyuyu. Tsa' myita asten kikareke' livee ke' me-eenu tsuyu, timi.

²³Tsenñuren yala kayu daran uti' patu: ḥKuusanu tu'pudei! ti' chiritintsula. Tsandindu yala naakekaanu ty'a ba tsanguenu tirela. ²⁴Tsenñu Pilato yala naakenu detyañu bain tsanguenu shuwami. ²⁵Tsejtu yala munaa livee ke' me'e'laade detiñuba juntsanaa me-e'laami, matyu chachillanu Jerusalén' uñilanu kundaa detiware' firu' dekikaamu ju', naa chachi tuten myita bain peesu pumunu, tsejtu Jesúsnuya yala naakenu detyañuba tsanguekaanu shuwami.

Jesús kuusanu tu'vimi.

(Mateo 27.32-44; Marcos 15.21-32; Juan 19.17-27)

²⁶Tsenñu suutadula Jesúsnu kuusanu tu'punu miya' jindetsu, ma ruku, ya' momu Simón, Cirene pebulusha chumu, jeenbaasha pu' miintsu katatu, yanu kuusa nande' Jesús' bendaa eekila. ²⁷Tsenñu yala' bendala pure' chachilla jindetsunmala, mantsa supulaya Jesús' myita yuj llakindiyatu tenbapunu pali palike' uti' wares jintsula. ²⁸Tsenñu Jesús mere', benesha ke-eetu, juntsa shinbulanu tsandimi: Ñnulla, Jerusalénsha chumu shinbula, in mytyaa llakindya' waatyudei. ḥÑnulla' myita, tsenmin ñnulla' kailla' mytyaa tsandy'a' waadei! ²⁹Matyu bene ma malu entsandyanu detsuve: "Nakatyu shinbula bain, na miyajtu shinbula bain, naa-uwanuba chuchu kuwa' kerajtu shinbula bain mika ura' dejuve", tyanu detsuve. ³⁰Tsejtu chachilla yai tenen peyanu tyatu entsandinu detsuve: *Butyu, waka' ja' lalanu delanguijaka!* tsenmin kuyi jumulanu bain: *lalanu delan pajtya' dishkijaka!* tinu detsuve. ³¹Tsaju' yala inu ejkejtu chi juuñuunaaba entsa dekemiya ḥkayu ñnulla ejke chi juuñuulanaa naa kechudeenga? timi.

³²Tsenmin Jesúsba bulu tu'nú, naa pai ruku firu' kemulanu bain take' jintsula. ³³Tsa-i' Ujkun Mishu tinu tenabi dejitu Jesúsnu kuusanu tu'pu' uiakaala, tsenmin firu' kemu pai rukulanu bain tu'pu' uiakaala, mainnuya Jesús' uranya keesha, kamainnuya jalandya keesha tu'pu' uiakaakila. ³⁴Tsenñu Jesús kuusanu tu'vi' uinatu tsandimi: Apa, yalanu yala' ujcha manbitsaade, matyu yala ti kendetsu' bain mijdetuñu' myita, timi.^k

Tsenñu suutadula Jesús' jali dekatu, munaa tyulla lunuuñuba tsa tsangue deke' mijatu, yaitala veela.

³⁵Tsenmala chachillaya uina' ne ke-eenala, tsenñu naa bale rukula bain deke-eenatu, Jesúsnu uukapundu tsa tsandila: Veelanu livee kemu' myita, ya bain maalin juntsai livee isa, ya uwain Dioschi Mi'ke' Kayamu, livee kemu ruku jutuya, tiitila.

j 23.30 Oseas 10.8 k 23.34 Mantsa tinbu kiikatala entsa pilla putyuve: *Tsenñu Jesús kuusanu tu'vi' uinatu tsandimi: Apa, yalanu yala' ujcha manbitsaade, matyu yala ti kendetsu' bain mijdetuñu' myita, timi.*

³⁶Suutadula bain yanu uukapundu, kalen ji' shivi binu kunu kiiketu
³⁷tsa tsandila: Nu uwain judíola' reituya, ñu maaliren livee ide, tiitila.

³⁸Tsenmin kuusanu bain ya' mishkai'sha, ENTSÁ JUDÍOLA' REIVE, ti'
 pillami.

³⁹Junu main kuusanu tu'pu' yanamu firu' kiikemu ruku bain Jesúsnu
 kentsure' patu tsandimi: Nu Dioschi Mi'ke' Kayamu rukutuya, maali
 malivee-i', lalanu bain livee kika, tiitimi.

⁴⁰Tsenñuren kamain yaba bulu firu' kemu rukuya, juntsa rukunu
 nepatu tsandimi: ¿Nu bain tsaren tu'pu yana' juntsai peyanu ju'ba,
 Diosnu jeetendyuu? ⁴¹Uwain lalaya lala' firu' ke' kuipa lan mityaa tsa-i'
 taaju indetsuyu; tsaaren entsa rukuya tiba firu' ke' kuipa lai'mujchiren
 tsaintsuve, timi.

⁴²Tsejtu tsandimi: Jesúis, ñu rei juu tiya' chuntu, inu bain tengaka, timi.

⁴³Tsenñu Jesúis pakatu tsandimi: Uwaindiyu ñu umaren iba selusha
 naranainsha punu tsuve, timi.

Jesús peyami.

(Mateo 27.45-56; Marcos 15.33-41; Juan 19.28-30)

⁴⁴⁻⁴⁵Pajta katyu uratala tu kuraa dishpjaltya' tsaa tsanatu, kepenusha pen
 ura inshaa madanguemi. Tsenñu Diosa' pupunanu ya juusha juukapanu
 daayananu jali tsaa kejtala kiyuu tsetakemi. ⁴⁶Tsenmala Jesúsyar
 ui'tu tsandimi: Apa, in aama ñu' tyaaapanu shuikentsuyu,¹ ti' peyami.

⁴⁷Tsenñu suutadu ama junu tyee-i' puiñuba keena' Diosyaa
 tsaikaantsuñuve, ti' entsandimi: Uwain entsa rukuya ti kuipaba
 tajtuwañañuve, timi.

⁴⁸Tsenñu kumuinchchi chachilla junu wa'na' keenamula tyee iñuba
 dekeena' miindu llakindya' jeetyatu, yala' tenbapunu palisai miila.

⁴⁹Tsaaren kumuinchchi Jesúsnu kera chachilla bain, naa mantsa shinbula
 Jesúsbala Galileasha bendaa jamula bain baasha uina' ne ke-eenala,
 kumuinchchi tsaa de-i' puintsu katatu.

Jesús menami.

(Mateo 27.57-61; Marcos 15.42-47; Juan 19.38-42)

⁵⁰⁻⁵¹Ma ruku, ura ruku ju', Dios naakesa tyaañuba tsanguen chumu jumi,
 ya' momu José, Arimatea pebulusha, Judea tusha chumu. Ya bain judíolaba
 bulu kavitu kiikemu bale ruku jumi. Entsa ruku José, Diosnu rei juu tananu
 malu keenamu jumi. Yaa, mantsa kavitu kemu rukula Jesúsnu tsanguedaa
 ti' pa' tsanguendetsuñu bain, yaa masmi' patimu juwaami. ⁵²Tsejtu
 Pilato' junga ji', Jesúis' ujkun bulu pa'tu, ⁵³Jesúsnu kuusanu tu'punamunu
 manbajtetu, linu manbaalichi pijteke' ujkun mennu ke' lanbakinu vijchaa

tujuusha pukemi; juntsa tujuusha kayu munuba menajtuwaami. ⁵⁴Tsenñu jumalaa yaichiya tiba dekenu malu jumi, tsejtaa lekanu malunchiya tibanguen jutyu, tsenñu yumaa saaduma lekanu malu tingumaintsumi.

⁵⁵Jesúsba Galileasha jamu shinbulaya, Jesús' mennainsha ji' kera' naake depuñu bain katala. ⁵⁶Tsejtu yasha miitu pindyupi bain, naa vera munguentsumi juula bain kila Jesúsnu mungueno. Tsanguetu saaduma lekanu malunu Moisés' wandya lei naakidei tiñuba tsangue deke' lekala.

Jesús mangujtami.

(Mateo 28.1-10; Marcos 16.1-11; Juan 20.1-29)

24 ¹Tsejtu semana ajke' malunu, duminguma dishkepenene, juntsa shinbula Jesús' mennainsha jila, tsejtu naa pindyupi bain, naa yala' keñu kayu vera munguentsumi jumula bain taajila Jesúsnu mungueno. ²Tsai' junu mennainbi dejitu, tuuju juukapanu di'namu shupuka vee mujtu tsuna katala. ³Tsejtu juntsa shinbula tujuusha vi' keetu, Bale Ruku Jesús' ujkun bulu tsutyu katala. ⁴Tsejtu yala wapananchin naaken tsandyantsula.

Tsaintsuren pai ruku jali pi'juruu tene yaiba kalen uyuna katala. ⁵Tsenñu yala wapantu tusha wayu'kaketu, juntsa rukulanu naa ke-eekenuba tyai'lla. Tsenñu juntsa rukula tsandila: ¿Nullaa chumu rukunuba tyeenguenaa pemula' mennainsha mi'kendu dekiyu? ⁶Yaa enu putyuve, yumaa mangujtave. Matyu Galilea tusha chuumala ya naati pamuwaañu bain mandengakidei. ⁷¿Chachi Tiya' Nakayamu ujcha lamula' tyaapasha kuwa', kuusanu tu'vi' peyaturen, pen malu inmala mangujnu tsuve, tindyuka? tila.

⁸Tsenñu juntsa shinbula Jesús naatimuwañauba mandengala.

⁹Tsejtu Jesús' mitya kuinda kenu lara' eramu rukula 11 jumulanu bain, kayu veelanu bain kuinda kila tyee dekata' maja' bain.

¹⁰Jesús' mitya kuinda kenu lara' eramulanu ji' kuinda kemula entsalaa juntsa deeve: María Magdalena bain, Juana bain, Santiago' ama María bain, tsenmin kayu vee shinbula bain.

¹¹Tsenñun Jesús' mitya kuinda kenu lara' eramu rukulaya juntsa shinbula' palaanu kerangui'la, matyu yala' pensaya yuj itaaba tsandintsulaate detya' mitya.

¹²Tsenñuren Pedroya juntsa tujuusha daran ji' keejitu, wayu'kake' keeputu, jalin tsuna kataakemi, tsejtu tyee itu in tya', wapanbashi' yasha miimi.

Jesús Emaússha jinu miñusha katawami.

(Marcos 16.12-13)

¹³Tsenñu juntsa malunuren pai disipulula Emaús kaa pebulusha jinu miñuu jintsula. Juntsa miñunu pai uratalaa bare' jiinuu jumi Jerusalénbi lu' ji', Emaús pebulubi vijinu. ¹⁴Tsai' jindu tyee-i' puiñuba juntsaatala kuinda

kes jintsula. ¹⁵Tsejtu yala tsandi' veta' veta' kuinda kes jindetsuren, Jesús yala' bendala jindu mi'najitu yaiba buudi' jintsumi. ¹⁶Tsenñuren Dios yalanu keengan jutyuu tireñu, yala Jesúsnu kata' bain, mangueengai'la. ¹⁷Tsenñu Jesús yalanu pake'meetu tsandimi: ¿Tyee kuinda kes jindu detiyu? timi.

Tsenñu yala llakindya kajuru juu uidila. ¹⁸Tsenñu main, ya' momu Cleofásya, entsandimi: Kumuinchi chachilla mindene judeeve Jerusalénbi entsa malutala tyee-i' puiñu bain. Tsaaren, ¿nejtaa ñu bain Jerusalénbi pu'ba, ñuren mijtuutuuyu? timi.

¹⁹Tsenñu Jesús tsandimi: ¿Jerusalénbi tyee-i' pullan? timi.

Tsenñu yala pákatu: Lalaya Jesús, Nazaret pebulubi chumunaa laapu' kuinda kendetsuyu. Juntsa ruku naa Diosa' ajuusha bain, naa chachilla' ajuusha bain, naa ti pa' bain, naa ti kike' bain pude ruku juwaave, Diosa' myta pamu rukuya. Tsenñu kumuinchi chachilla yanu dekeemija deive naa Dios tsanguikañaña tsanguentsuñu bain. ²⁰Tsaanuren chachilla' myta Diosnu kalen jimula' bale rukula bain, naa lala' bale rukula bain yanu kuipa pu' kuusanu detu'pukare' tu'kaave. ²¹Tsaaren lalaya yaa Israel chachillanu livee kenu juve tyamuwa deeyu, tsaanuren tsangue' detu'ñu, umaa pen malu juuve. ²²Tsaaren mantsa lala' keranu shinbula uma kepenene ya' mennainsha ji' dekere' mama' lalanu kuinda dekiñu yuj dewapanyu, ²³yalaa Jesúsnu mangataindetyuyu deti', yalanu anjeela dekatawatu, Jesús mangujpa' chuve ti' dewainve detiñu, ²⁴tsenmin mantsa lala' keranu rukula bain junga mennainsha ji' dekeejitun, juntsa shinbula naanave detiñu bain tsanave detituren, Jesúsnya kataindetyuyu, detiñu' myta, tila.

²⁵Tsenñu Jesús tsandimi: ¿Naa jutu deeyu ñulla jaiba ura' aseetanguenu jutyula, tsenmin Diosa' myta pamu rukula kumuinchi naadetiñu bain juntsanu te' keranguenu jutyulaa? ²⁶Tsejtu ¿Dioschi Mi'ke' Kayamu ruku, tsamantsaa keewara' kayu balengurai'mujchiya juntsai taaju i' pullan jutyuwaa juu? timi.

²⁷Tsanditu Moisésbi jumin, Diosa' myta pamu rukula bain jingue yanu laapu' patu Diosa' Kiikanu naake mijakare' pamuwa deeñuba tsandi dekuindake' pamí.

²⁸Tsejtu umaa yala' jinu kaa pebulunu dekalen jitu, Jesúsya kayu ajkesha jinu jin tsaintsumi. ²⁹Tsenñu yaba bulu jimula tsandila: Enaa tsudaa, dekependu yumaa ma deyajuru' kakentsuve, tiidetiñu, Jesús yasha vimi yalanu tsuve'nu.

³⁰Tsejtu panda finu uranu yaiba bulu chutu, Jesús ya' tyaapachi pan ka', Diosnu yuj urave titu, pan dedale', yalanu veemi. ³¹Tsenñu juntsa uranaa yalanu mangueenganu tireñu, naa Jesúsñuba mangueengala, tsenmalaren Jesús mandijtsaa piyaimi. ³²Tsenñu yala veta' veta' tsandila: ¿Miñusha jandu lalanu, Diosa' Kiika entsa pillave ti' mijakaakishu jumala lala' tenbuka kudu' yali tendyuka? tila.

³³Tsandi tsandin keedi'mujchi demangujpa' Jerusalénsha miiitu, Jesús' myta kuinda kenu lara' eramu rukula 11 jumulanu bain, kayu yaiba

wa'namulanu bain bulu pudena mangatajila. ³⁴Tsenñu juntsa wa'namula tsandila pallu maamulanu: Uwain Bale Ruku mangujtañuve; tsejtu Simón Pedronu mangatawave, tila.

³⁵Tsenñu yai bain yala miñutala jindu tyee demijas ji' bain, tsenmin Jesús naake pan veeñaa demangueenga' bain juntsandi wainla.

Jesús ya' disipululanu mangatawami.

(Mateo 28.16-20; Marcos 16.14-18; Juan 20.19-23)

³⁶Tsejtu yala tsandi' kuinda kendetsuren, Jesús yala' kejtsapala bulu uina' katawa' patu tsandimi: Ñulla tiba bulla jutyu ura' dejusa tenve, timi.

³⁷Tsenñu yala ujmaaba tsai' katawameete tyatu, tsamantsai wapanla.

³⁸Tsenñu Jesús tsandimi: ¿Nenñu deiyu ñulla tsamantsa wapanaa jula? ¿Nenñaa ñulla! tenbukasha uwain tsa jutyumeete tya' pensa juju deeyu?

³⁹In tyaapanu bain, in neepanu bain kerakikai. Iren juyu. Taakerakikai. Ujmuya alla bain putyu, taku bain putyuve. Tsaaren ñulla dekatave iyaa alla bain, taku bain puñuba, timi.

⁴⁰Jesús tsanditu tyaapanu bain, neepanu bain keewaami. ⁴¹Tsenñu yala tsamantsa desundaya' keenbashiindetsu' myta, te' keranguindyula. Tsenñu Jesús tsandimi: ¿Tyeeba fikenuu detanayu? timi. ⁴²Tsenñu yala ma dape alla birii dekuñu, ⁴³ka' yala dekeenaren fimi.

⁴⁴Tsejtu Jesús yalanu tsandimi: Inu challa tyee i' puiñuba juntsainu tsuve ti' dewainmuwaayu kaspele ñuiba chuumala, tsejtu iya titi i' puinu tsuve ti', naa Moisés' wandya lei kiikanu bain, naa Diosa' myta pamu rukula' pilla kiikanu bain, naa Salmos liburunu bain, iya naa-inu tsuve ti' pillawaañu bain kumuinchu juntsaa puive, timi. ⁴⁵Tsejtu Diosa' Kiika pillanu ura' aseetanguenuu tiwaatu ⁴⁶entsandimi: Entsa pillave: Dioschi Mi'ke! Kayamu taaju i' peya' bain, pen malu insha mangujnu tsuve, tive, timi. ⁴⁷Tsenmalaa ya' myta naa nuka chumu chachillanu bain Diosa' palaa demijakare' pa' tsandinu dejuve: Ñulla veta' pensa demangue' Diosnu keranguidei ñulla! ujcha manbitsalanutsu, tidei. Tsaaren Jerusalénnaa peepu' jidei, ⁴⁸tsejtu ñulla entsaa i' pullantsu keenamu de' myta, veelanu bain kuinda kiikenuu dejuve.

⁴⁹Iyaa ñullanu in Apa tyee tsanguenbera kenu tsuyu timuwañañ bain juntsa eenu tsuyu. Tsaaren challaya Dios ñullanu ti pudeeba kuwaindyuya Jerusalénnu keenadei, timi.

Jesús selusha malumi.

(Marcos 16.19-20)

⁵⁰Tsejtu Jesús Jerusalén pebulubi demalu' miji!, Betania pebulu keesha demiya' jitu, ya' disipulula' myta tyaapa usake!, Dioschi ura' idei ti' pam.

⁵¹Tsejtu tsandinduren yalanu shuike' miji' selusha mandakami. ⁵²Tsenñu yala teledi' yanu aawa kure' demangujpatu, Jerusalénsha yuj sunden miila. ⁵³Tsejtu junbi aa eleshasha naa-uwanuba pupunala, Diosnu yuj urave ti' papatindu.